

● আল্লাহ তায়ালা বলিয়াছেন :—

يَا أَيُّهَا الَّذِينَ آمَنُوا إِنَّمَا الْخَمْرُ وَالْمَيْسِرُ وَالْأَزْهَابُ وَالْأَزْلَامُ رِجْسٌ
مِّنْ عَمَلِ الشَّيْطَانِ نَاجِسٌ لِّعَلَّكُمْ تَكْفُرُونَ - إِنَّمَا يَرِيدُ الشَّيْطَانُ
أَنْ يُوقِعَ بَيْنَكُمُ الْعَدَاوَةَ وَالْبَغْضَاءَ فِي الْخَمْرِ وَالْمَيْسِرِ وَيَسُدَّ
عَنْ ذِكْرِ اللَّهِ وَعَنِ السَّلَاةِ - فَهَلْ أَنْتُمْ مُنْتَهُونَ -

“হে মোমেনগণ! তোমরা হৃদয়ঙ্গম করিয়া লও—মদ, জুয়া আর পূজার মূর্তি এবং লটারী—এই সবই অপবিত্র এবং শয়তানী কার্যের বস্তু, তোমরা এই সব বর্জন করিয়া চল। ইহাতেই তোমাদের সাফল্য। শয়তান চায় যে, তোমাদিগকে মদ ও জুয়ায় লিপ্ত করিয়া তোমাদের মধ্যে শত্রুতা ও মনোমালিন্য সৃষ্টি করে; (যদ্বারা সে পরস্পর ঝগড়া-বিবাদ, মারামারি কাটাকাটির ন্যায় বড় বড় পাপ সহজেই করাইতে সক্ষম হইবে।) আর আল্লাহ ইয়াদ হইতে এবং নামায হইতে বিরত রাখে। (আল্লাহকে ভুলিয়া গেলে সংযত জীবন যাপনের মূল চাবি-কাটিই নষ্ট হইয়া গেল। নামায ছুটিয়া গেলে কুকর্ম ও অপকর্ম হইতে বাঁচিয়া থাকিবার লাগামই ছিন্ন হইয়া গেল। এইভাবে মদ ও জুয়ার মাধ্যমে গোটা জীবনই ধ্বংসের মুখে পতিত হইবে। অতএব, এখন মদ ও জুয়ার ধ্বংসাত্মক অপকারিতা বৃদ্ধিতে পারিয়াছ এবং আমার স্পষ্ট নিষেধ শুনিয়া নিয়াছ?) এখন ত তোমরা অবশ্যই এই সব হইতে বিরত থাকিবে?” (৭ পারা ২ রুকু)

উল্লেখিত আয়াত সম্পর্কেই নিম্নে বর্ণিত হাদীছ খানা—

১৯০৯ হাদীছ :- আবুল্লাহ ইবনে ওমর (রাঃ) হইতে বর্ণিত আছে, শরাব বা মদ হারাম বলিয়া যেই সময় কোরআনের ঘোষণা নাযেল হইয়াছে তখন মদীনা এলাকায় পাঁচ প্রকার পানীয় মাদক দ্রব্য প্রচলিত ছিল। উহার কোন একটিও আঙ্গুরের রশে তৈরী হইত না।

ব্যাখ্যা :- উল্লেখিত বক্তব্যের উদ্দেশ্য এই যে, কোরআনে বর্ণিত “خمر—খামর” শব্দটির অর্থ যাহারা আঙ্গুরের রশে তৈরী মদের মধ্যে সীমাবদ্ধ রাখিতে চায় তাহারা কোরআনের অপব্যাখ্যাকারী এবং স্বয়ং হযরত রসূলুল্লাহ (দঃ) ষাঁহার উপর কোরআন নাযেল হইয়াছিল ও আরবী ভাষা-ভাষী ছাহাবীগণ—ষাঁহাদের সম্মুখে কোরআন নাযেল হইয়াছিল—ঐহাদের সকলের ব্যাখ্যার বিরোধী ব্যাখ্যাকারী।

কারণ, মদ হারাম হওয়ার ঘোষণা **خمر**—খাম্র শব্দের মাধ্যমে নাযেল হওয়ার সঙ্গে সঙ্গে হযরত রসুলুল্লাহ (দঃ) ও ছাহাবীগণ উক্ত বিধান মদীনা এলাকায় প্রচলিত পানীয় মাদক দ্রব্যসমূহের উপর প্রবর্তন করিয়াছিলেন। ঢোল-শোহরতের মাধ্যমে উহার ব্যবহার এবং লেন-দেন ও ক্রয়-বিক্রয়কে হারাম ও নিষিদ্ধ ঘোষণা করিয়াছিলেন। ঐ সব পানীয় তৈরীর পাত্র সমূহকেও ভাঙ্গিয়া চুরমার করিয়াছিলেন। এমনকি ঐ সব পাত্রের সাধারণ ব্যবহারও দীর্ঘ কাল পর্যন্ত হারাম করিয়া রাখিয়াছিলেন। লোকদের মালিকানায় পূর্ব হইতে ঐ সব পানীয়ের যে ঠেক মোজুদ ছিল, ঘোষণার সঙ্গে সঙ্গে উহা ফেলিয়া দিয়া মদীনা এলাকার রাহা-ঘাট, অলি-গলি সমূহকে প্রবাহিত মদের নালায় পরিণত করা হইয়াছিল। পবিত্র কোরআনে উল্লেখিত আয়াতে মদ বা শরাবকে নিষিদ্ধ হারাম, নাপাক, অপবিত্র ও শয়তানী বস্তু ঘোষণা করিয়া এবং উহা বর্জন করার সুস্পষ্ট নির্দেশ দিয়া **—نَهَىٰ أَنْ تَكُونَ مِنْكُمْ مَنۢ مُّشْرِكُونَ**— তোমরা উহা বর্জন করিবে ত ?” প্রশ্ন করা হইলে মদীনার ছাহাবীগণ বলিয়া উঠিয়াছিলেন— **أَنْتَهُنَّأَنَا، بِنَا أَنْتَهُنَّأَنَا، رَبَّنَا**—

“হে প্রভু পরওয়ারদেগার! আমরা চিরতরে উহা বর্জন করিলাম—হে প্রভু পরওয়ারদেগার! আমরা চির তরে উহা বর্জন করিলাম।”

خمر—খাম্র শব্দের মাধ্যমে মদ বা শরাব হারাম হওয়ার বিধান কোরআনে নাযেল হওয়ার সঙ্গে সঙ্গে স্বয়ং হযরত (দঃ) এবং উপস্থিত ছাহাবীগণ এই সব করিয়াছিলেন। অথচ মোসলমানদের এলাকা মদীনা অঞ্চলে তখন যত প্রকার পানীয় মদ ছিল উহার মধ্যে কোনটিই আঙ্গুরের রশে তৈরী হইত না। সুতরাং যে কোন বস্তুতেই তৈরী হউক সকল প্রকার মদই হারাম।

নিম্নে বর্ণিত হাদীছদ্বয়েও ঐ তথ্যেরই আরও বিবরণ দেওয়া হইয়াছে—

১৯১০। হাদীছ :—আনাছ (রাঃ) বর্ণনা করিয়াছেন, আমাদের মদীনা অঞ্চলে পানীয় মদ একমাত্র উহাই ছিল যাহাকে “ফজীখ্” বলা হইয়া থাকে (যাহা কাঁচা খেজুরের পচাই দ্বারা তৈরী হয়।)

আনাছ (রাঃ) বলেন, একদা আমি (আমার মাতার দ্বিতীয় স্বামী—ছাহাবী) আবু তাল্হাযর গৃহে তাঁহার সঙ্গে কতিপয় ছাহাবীকে ঐ মদ পান করাইতে ছিলাম। এমতাবস্থায় তথায় এক ব্যক্তি উপস্থিত হইল এবং বলিল, আপনারা খবর পান নাই কি? সকলেই তাহাকে জিজ্ঞাসা করিলেন, কোন্ খবর? সে বলিল, শরাব হারাম হওয়ার ঘোষণা হইয়াগিয়াছে। তৎক্ষণাৎ উপস্থিত সকলে আমাকে মদের কলসগুলি ভাঙ্গিবার আদেশ করিলেন। ঐ একজন মাত্র লোকের সংবাদেই তাঁহারা উহা করিলেন। এ সম্পর্কে আর অধিক যোগ-জিজ্ঞাসাও করিলেন না।

১৯১১। হাদীছ :—আবদুল্লাহ ইবনে ওমর (রাঃ) বলিয়াছেন, আমি খলীফা ওমর (রাঃ)কে মিস্বারে দাঁড়াইয়া এই ভাষণ দিতে শুনিয়াছি :—

হে লোক সকল! খাম্ব—মদ বা শরাবেকে পবিত্র কোরআনের স্পষ্ট ঘোষণায় হারাম সাব্যস্ত করা হইয়াছে। তোমরা জানিয়া রাখিও, উহা (শুধু আপুরের রশে তৈরী বস্তুতে সীমাবদ্ধ নহে। বরং উহা) সাধারণতঃ পাঁচ প্রকার বস্তুতে তৈরী হইয়া থাকে, যথা—আপুর, খুরমা, মধু, গম ও যব। এতদ্ভিন্ন যে কোন বস্তুর মাদকাতায় হুস্-জ্ঞান আচ্ছন্ন হইয়া পড়ে, উহাই খাম্ব বা মদ ও শরাবের শ্রেণীভুক্ত।

১৯১২। হাদীছ :—ইবনে আব্বাস (রাঃ) হইতে বর্ণিত আছে, এক শ্রেণীর (মোনাক্কে) লোক ছিল যাহারা হযরত রসুলুল্লাহ ছালাল্লাহু আলাইহে অসাল্লামকে হানি-ঠাট্টা ও রং-তামাসারূপে নানা প্রকার প্রশ্ন করিয়া থাকিত। (তাহাদের দেখাদেখি কোন কোন সাদা-সিধা মোদলমান ঠাট্টা ও তামাসারূপে নয়, কিন্তু অসংগত ধরণের প্রশ্ন করিল, যেমন—) এক ব্যক্তি জিজ্ঞাসা করিল, আমার পিতা কে? আর এক ব্যক্তি যাহার উট হারাইয়া গিয়াছিল, সে জিজ্ঞাসা করিল, আমার উটটি কোথায়? এই শ্রেণীর প্রশ্নকারীদেরকে হুশিয়ার করিয়া এই আয়াত নাযেল হয়—

يَا أَيُّهَا الَّذِينَ آمَنُوا لَا تَسْأَلُوا عَنَ أَشْيَاءٍ إِن تَبَدُّ لَكُمْ تَسْأَلُكُمْ -

“হে মোমেনগণ! তোমরা এমন বিষয়াবলী সম্পর্কে প্রশ্ন করিও না (যাহার মধ্যে এমন উত্তরের সম্ভাবনা থাকে) যাহা প্রকাশে তোমাদের পক্ষে খারাবী হইবে।”

(ছুরা মায়দাহ—৭ পারা ৪ রুকু)

ব্যাখ্যা :—বিভিন্ন ধরণের লোকগণ হযরত রসুলুল্লাহ (সঃ)কে নানা প্রকার অনাবশ্যক, বরং অসংগত প্রশ্নাবলী করিয়া বিরক্ত করিয়া থাকিত। এমনকি একদা তিনি ঐ শ্রেণীর প্রশ্নাবলীর আধিক্যে উত্ত্যক্ত হইয়া মিস্বারে আরোহণ করতঃ রাগের সহিত বলিলেন, তোমরা প্রশ্ন কর। যত প্রশ্নই করিবা আমি উত্তর দিব। বিশিষ্ট ছাহাবীগণ হযরতের রাগ বুঝিতে পারিলেন। এমনকি তাঁহারা মাথা গোঁজিয়া কাঁদিতে লাগিলেন। কিন্তু সাদা-সিধা রকমের কতিপয় ছাহাবী তাহা লক্ষ্য করিলেন না। তাঁহারা হযরতের উক্তিকে প্রশ্ন করার সুযোগ মনে করিয়া ঐ অসংগত শ্রেণীর প্রশ্ন করিতে লাগিলেন—

(১) আবদুল্লাহ-ইবনে-হোযাফাহ (রাঃ) নামক এক ছাহাবী ছিলেন, তাঁহার আকৃতি স্বীয় পিতা হোযাফাহ রাজিয়াল্লাহু তায়ালা আনহুর আকৃতির সঙ্গে অসামঞ্জস্য ছিল বিধায় ঝগড়া-বিবাদের সময় লোকগণ তাঁহাকে পিতা সম্পর্কে বিদ্রোপোক্তি করিত। বহু দিন হইতে তিনি এই ব্যাপারে বিরত ছিলেন। আজ

তিনি সুযোগ মনে করিয়া হযরত (দঃ)কে জিজ্ঞালা করিলেন, আমার পিতা কে ? তাহার উদ্দেশ্য এই ছিল যে, হযরত (দঃ) আমার পিতার নাম হোযাফাহ বলিয়া দিলে আর কাহারও কিছু বলিবার অবকাশ থাকিবে না।

(২) আর এক ব্যক্তি (তাহার পিতার মৃত্যু হইয়াছিল সে) জিজ্ঞাসা করিল, আমার পিতা কোথায় স্থান পাইয়াছে ?

এই শ্রেণীর প্রশ্নাবলীর উত্তরে এমন একটা দিকের সম্ভাবনা রহিয়াছে যাহার প্রকাশ মানুষ অবশ্যই খারাব মনে করিবে। যেমন প্রথম প্রশ্নকারীকে হযরত (দঃ) তাহার পিতার নাম হোযাফাহই বলিয়া দিলেন, কিন্তু তাহার বুদ্ধিমতী মাতা তাহাকে তাহার ঐ প্রশ্ন সম্পর্কে তিরস্কার করিলেন এবং বলিলেন, খোদা-নাখাস্তা যদি তোমার মাতার দ্বারা কোন খারাব কাজ অনুষ্ঠিত হইয়া থাকিত যাহা এত দিন গোপন ছিল তবে হযরত (দঃ) ত তোমার প্রশ্নের উত্তরে অগ্ন ব্যক্তির নাম বলিয়া দিতেন এবং চিরকালের জগ্ন সর্বসমক্ষে মান-ইজ্জতের সমাধি-রচিত হইত।

দ্বিতীয় প্রশ্নকারীর উত্তরে হযরত বলিয়াছিলেন—**فى النار**, অর্থাৎ তোমার পিতার বাসস্থান দোযখে। এই বিষয়টি প্রকাশ হওয়া তাহার জগ্ন খারাব হইল।

আরও একবারের ঘটনা :—হযরত (দঃ) এলান করিলেন, সামর্থ্যবান লোকদের উপর হজ্জ ফরজ। প্রশ্ন ফরা হইল, প্রতি বৎসর ? হযরত (দঃ) কিছু সময় চুপ থাকিবার পর বলিলেন, না—অর্থাৎ মাত্র একবার ফরজ। এই প্রশ্নটিও অবাস্তর ছিল এবং সম্ভাবনা ছিল, “হাঁ” বলিয়া দেন—তা হইলে ব্যাপারটা কত কঠিন হইয়া পড়িত ! হযরতও এই বিষয়ের ইঙ্গিতে বলিয়াছেন, **لوقات نعم لوجيبات**, “যদি আমি “হাঁ” বলিয়াদিতাম তবে প্রত্যেক বৎসরের জগ্নই হজ্জ ফরজ হইয়া যাইত।”

অসংগত প্রশ্ন সম্পর্কে খারাব উত্তরের সম্ভাবনা অন্ততঃ এতটুকু ত অবশ্যই থাকে যে, তিরস্কার বা রাগ ও অসন্তুষ্টি প্রকাশ হইবে। যেমন এক ব্যক্তির উট হারাইয়া গিয়াছিল সেই ব্যক্তিও পূর্ববোলেখিত হযরতের ক্রোধজনিত সুযোগদানের কথায় এই প্রশ্ন করিয়া বসিল, আমার উটটি কোথায় হারাইয়াছে ? এইরূপ প্রশ্নের উত্তরে তিরস্কার ও রাগ প্রকাশ পাইবার সম্ভাবনা রহিয়াছে যাহা অবশ্যই খারাব মনে করা হইবে। সুতরাং এই শ্রেণীর প্রশ্ন করা হইতে নিষেধ করা হইয়াছে !

বর্তমান কালেও দেখা যায়, নায়েবে-নবী—আলেমগণের নিকট পরীক্ষামূলক হাসি-তামাসা মূলক বা বিব্রত করার উদ্দেশ্যক অসংগত ও অনাবশ্যক প্রশ্নাবলী করা হইয়া থাকে। এইরূপ প্রশ্ন মোটেই করা চাইনা। আলেমগণের নিকট শরীয়তের বিধান ও আখেরাতের উন্নতির পথ পাইবার উদ্দেশ্যজনক প্রশ্নই করা যাইতে পারে।

● আল্লাহ তায়ালা বলিয়াছেন :—

مَا جَعَلَ اللَّهُ مِنْ بَعْضِهِمْ لَنَا بَعْضًا وَلَا سَائِبَةً وَلَا وَهْبَةً وَلَا حَامٍ وَلَكِنَّ الَّذِينَ كَفَرُوا يَغْتَوِنَ عَلَى اللَّهِ الْكُذْبَ وَكَثُرَ لَهُمْ لَا يُعِيقُونَ -

তফছীর :— অন্ধকার- যুগে ছইটি কুপ্রথা ছিল—(১) দেব-দেবীদের নামে জানোয়ার ছাড়িয়া দেওয়া হইত। (২) বিশেষ বিশেষ জানোয়ার দেব-দেবীদের নামে নির্দিষ্ট করিয়া রাখা হইত ও তাহাদের জন্ত নিয়ত করিয়া রাখা হইত এবং এই সূত্রে ঐ জানোয়ারকে সম্মান করা হইত। “বাহীরাহু” “ছায়েবাহু” “অছীলাহু” “হাম”— এই সব বিভিন্ন নামে ঐ শ্রেণীর জানোয়ারের নাম করণ হইয়া থাকিত।

উল্লেখিত আয়াতে ঐ শ্রেণীর কুপ্রথা সম্পর্কে বলা হইয়াছে যে, ঐ ধরণের প্রথা আল্লাহ তায়ালা কখনও প্রবর্তন করেন নাই, বরং উহা কাকের-মোশরেকদের গহিত কাজ। অবশ্য উহা দ্বারা তাহারা মিছামিছি আল্লাহ তায়ালায় সন্তুষ্টির দাবি ও আশা করিয়া থাকে, ইহা তাহাদের নির্বুদ্ধিতার পচিচয়। (৭ পারা ৪ রুকু)

পাঠকবর্গ! উল্লেখিত প্রথাগুলির মূল দোষ হইল এই যে, উহা শেরেকী কাজ ; আর শেরেকী কাজ দেব-দেবীর নামে হইলেও যেরূপ পীর-পয়গাম্বর ও লী-দরবেশের নামে হইলেও তদ্রূপই। সুতরাং মোসলমান নামধারী এক শ্রেণীর লোকের মধ্যে যে—পীর, ওলী, দরবেশ বা তাহাদের মাজারের ও ওরোসের নামে কোন জানোয়ার ছাড়া হয় কিম্বা কোন জানোয়ারকে ঐ নামে নির্দিষ্ট করিয়া, ঐ নামে নিয়ত করিয়া উহার তাজিম ও সম্মান করা হয়। এমনকি উহাকে কেন্দ্র করিয়া খানা-পিনার বা গান-বাণের ধুমধাম করা হয়, উহার জলুস ও মিছিল করা হয় এই সবই শেরেকী কাজ। যেরূপ দেব-দেবীর নামে বা পীর-পয়গাম্বর, ওলী-দরবেশের নামে কোন জানোয়ার জবেহ করিলে তাহাও শেরেকী কাজ।

মছ আলাহ :— আল্লাহ ভিন্ন অস্ত্র কাহারও নামে জানোয়ার জবেহ করিলে যেরূপ উহা মৃত গণ্য হইয়া হারাম হইয়া যায় তদ্রূপ আল্লাহ ভিন্ন অস্ত্র কাহারও নামে নির্দিষ্ট করিয়া রাখিলে—নিয়ত করিয়া রাখিলে, এই অবস্থায় উহাকে আল্লাহ নামে জবেহ করিলেও উহা হারাম গণ্য হইবে। ঐ জানোয়ারকে হালাল করিতে হইলে উহা জবেহ করার পূর্বে অস্ত্রের নামে নিয়ত ও নির্দিষ্ট করার কার্য হইতে খাঁচী তওবা করিতে হইবে। তারপরে উহাকে আল্লাহ নামে জবাহ করা হইলে উহা হালাল হইবে। (তফছীর বয়ানুল-কোরআন দ্রষ্টব্য)

আল্লাহ ভিন্ন অস্ত্রের নামে জানোয়ার ছাড়া বা নির্ধারিত করা যে, ইসলামের বা কোন মোসলমানের কার্য নহে, বরং উহা জাহান্নামী কাকেরদের প্রবর্তিত প্রথা— নিম্নে বর্ণিত হাদীছে উহার একটি বিশেষ তথ্য ব্যক্ত হইয়াছে।

১৯৩। হাদীছ :- আয়েশা (রাঃ) (এক হাদীছে সূর্যগ্রহণের নামাযের বিবরণ দান পূর্বক) বর্ণনা করিয়াছেন, নামায শেষ করিয়া হযরত রসূলুল্লাহ (দঃ) বলিলেন, চন্দ্রগ্রহণ ও সূর্যগ্রহণ উভয়টিই আল্লাহ তায়ালার (অসীম ও সর্বময় কুদরতের অসংখ্য) নিদর্শন সমূহের দুইটি নিদর্শন। উহা যখন তোমাদের সম্মুখে প্রকাশ পায় তখন তোমরা (আল্লাহ তায়ালার প্রতি ধাবিত হওয়ার উদ্দেশ্য) নামাযে মশগুল থাক যাবৎনা উহা অপসারিত হইয়া যায়।

হযরত (দঃ) আরও বলিলেন, আমার এই নামায পড়াকালে আমাকে পরকালের সব কিছু দেখান হইয়াছে যাহার সংবাদ আমাকে দেওয়া হইয়াছিল। এমনকি (আমাকে বেহেশত এত নিকটবর্তী দেখানো হইয়াছে যে,) আমি বেহেশত হইতে আঙ্গুরের একটি ছড়া লইবার জন্ত হাত বাড়াইয়া ছিলাম; যখন তোমরা আমাকে দেখিয়াছ, আমি সম্মুখ দিকে আগাইয়া ছিলাম। ঐ সময় আমি দোষখণ্ড দেখিয়াছি, উহার অগ্নিশিখাগুলি কিলবিল্ করিতেছিল; তখনই তোমরা দেখিয়াছ, আমি পিছনের দিকে হটিয়া ছিলাম। তখন দোষখের মধ্যে আমার-ইবনে (লুহা'ই) খোমারীকে দেখিয়াছি—তাহার নাড়ি-ভুঁড়ি মলদ্বার দিয়া বাহির হইয়া গিয়াছে এবং সে ঐগুলিকে হেঁচড়াইয়া চলিতেছে। সে-ই সর্ব প্রথম দেব-দেবীর (তথা গায়কুল্লাহ—আল্লাহ ভিন্ন অণ্ডের) নামে জীব-জন্তু ছাড়ার প্রথা চালু করিয়াছিল।

● আল্লাহ তায়লা বলিয়াছেন :-

وَعِنْدَهُ مَفَاتِيحُ الْغَيْبِ لَا يَعْلَمُهَا إِلَّا هُوَ - وَيَعْلَمُ مَا فِي الْبُرِّ وَالْبَحْرِ -
وَمَا تَسْقُطُ مِنْ وَرَقَةٍ إِلَّا يَعْلَمُهَا - وَلَا حَبَّةٌ مِنْ نَبْتٍ ظَلَمْتِ الْأَرْضَ وَلَا رَطْبٌ
وَلَا يَأْبِسُ إِلَّا فِي كِتَابٍ مَبِينٍ -

পাপীদের কোন পাপই আল্লাহ তায়ালার অগোচরে থাকিতে পারে না—তাহা উপলক্ষ্য করিয়া উল্লেখিত আয়াতে আল্লাহ তায়ালার জ্ঞান ও অবগতির অসীম ব্যাপকতা বর্ণনা করা হইয়াছে। মানুষের কার্য-কলাপ ত একটা সাধারণ জিনিষ—“আল্লাহ এলম তথা তাহার অসীম জ্ঞান ও অবগতির আয়াত্তে রহিয়াছে—সমুদয় গায়েব তথা ভূতভবিষ্যতের অগোচর, অদৃশ, গোপন কার্য কলাপ ও রহস্যাদির ভাণ্ডারসমূহ এবং উহার চাবিকাঠি তাহারই হাতে রহিয়াছে। সেই ভাণ্ডার সমূহ বা উহার চাবিকাঠি আল্লাহ ভিন্ন অণ্ড কাহারও অনুভূতির আয়াত্তে নাই। জলে-স্থলে—যথায় যাহা কিছু ঘটে, ঘটয়াছে বা ঘটবে সবই আল্লাহ জ্ঞাত আছেন। (নিবিড় জঙ্গলে গভীর অন্ধকারে ছোট্ট হইতে ছোট্ট) একটি পাতাও যদি ঝরে

তাহাও আল্লাহর অজ্ঞাতে হইতে পারে না। তাহাও আল্লাহ তায়ালা সম্যকরূপে জ্ঞাত থাকেন। কোন একটি ক্ষুদ্রতম দানা বা বীজ যাহা ভূগর্ভে অন্ধকারের অন্তরালে রহিয়াছে তাহা এবং যত প্রকার তাজা বা শুষ্ক বস্তু রহিয়াছে (সব কিছুই আল্লাহ তায়ালা জানা রহিয়াছে। শুধু তাহাই নহে, বরং) সব কিছু লওহে-মাহফুজে লিখিত রহিয়াছে।” (ছুরা আন্যাম—৭ পারা ১৩ রুকু)

মহান আল্লাহর গুণাবলীর অসীমতা সম্পর্কে মানুষ এতটুকুই ভাবিতে পারে—
 اے برتر از قباس و خیال و گمان و وهم - و از هر چه گفندہ تبیم و خوا ند تبیم

হে খোদা! তুমি সব কিছুই উর্দে, সব কিছুই নাগালের বাহিরে—আমাদের অনুমানের, আমাদের কল্পনার, আমাদের ধারণার, আমাদের চিন্তার এবং যতদূর আমরা বলিতে পারি, যতদূর আমরা গবেষণা করিতে পারি।

উল্লেখিত আয়াতে গায়েবের ভাণ্ডারসমূহ বা গায়েবের চাবিকাঠি সমূহ এক মাত্র আল্লাহ তায়ালাই আয়ত্তে বলা হইয়াছে; অর্থাৎ অশ্ব কেহই সামগ্রিকভাবে গায়েবের সকল বিষয় জানে না। তাহা বুঝাইবার জন্ত নমুন। বা উদাহরণ স্বরূপ নিম্নে বর্ণিত হাদীছে পাঁচটি বিষয়ের উল্লেখ হইয়াছে যাহা সচরাচর সকলের সম্মুখেই উদ্ভাসিত হইয়া থাকে, কিন্তু ঐগুলি যে পর্যন্ত গায়েব তথা অদৃশ্যের অন্তরালে থাকে সে পর্যন্ত কেহই উহাকে নির্দিষ্ট ও সম্যকরূপে জ্ঞাত হইতে পারে না। আল্লাহ তায়ালা ঐ অবস্থায়ও ঐগুলিকে পূঙ্খানুপূঙ্খরূপে জ্ঞাত থাকেন।

১৯১৪। হাদীছ ৩—আবদুল্লাহ ইবনে ওমর (রাঃ) হইতে বর্ণিত আছে, হযরত রসূলুল্লাহ ছাল্লাল্লাহু আলাইহে অসাল্লাম বলিয়াছেন, (পবিত্র কোরআনে যে,) গায়েবের ভাণ্ডারসমূহ বা চাবিকাঠি সমূহ (বলা হইয়াছে উহার উদাহরণমালা কোরআনেই অশ্বত বর্ণিত আছে, তাহা) পাঁচটি। যথা—(১) আগামী কাল কি হইবে, কে কি করিবে তাহা আল্লাহ ভিন্ন অশ্ব কেহ সম্যকরূপে জ্ঞাত নহে। (২) নারীদের গর্ভাশয় যাহা খালাস করিয়া থাকে (খালাস হওয়ার পূর্বে) উহার পূর্ণ অবস্থা সম্যকরূপে আল্লাহ ভিন্ন আর কেহই জ্ঞাত নহে। (৩) বৃষ্টি কবে এবং ঠিক কোন সময় বর্ষিবে তাহার পূর্ণ ও সঠিক তথ্য অটল, অনড় ও নিভুলভাবে আল্লাহ ভিন্ন আর কেহই জ্ঞাত নহে। (৪) কেহই তাহার মৃত্যু কোথায় হইবে তাহা জানে না (আল্লাহ তায়ালা তাহা জানেন)। (৫) কেয়ামত বা মহাপ্রলয় কবে হইবে তাহা আল্লাহ ভিন্ন আর কেহই জানে না।

(এই প্রসঙ্গে হযরত দঃ) এই আয়াতটি তেলয়াত করিলেন—)

اِنَّ اللّٰهَ عِنْدَهُ عِلْمُ السَّاعَةِ - وَيُنَزِّلُ الْغَيْثَ - وَيَعْلَمُ مَا فِي الْاَرْحَامِ -

وَمَا تَدْرِي ذَنْفُسُ مَاذَا تَكْسِبُ ذَدًا - وَمَا تَدْرِي ذَنْفُسُ بِأَيِّ أَرْضٍ
 تَهْوَتْ - إِنَّ اللَّهَ عَلِيمٌ خَبِيرٌ -

আল্লাই জানেন কেয়ামত সম্পর্কে এবং তিনিই বৃষ্টি বর্ষণ করিয়া থাকেন। এবং মাতৃগর্ভে যাহা আছে তাহার পূর্ণ হাল অবস্থাও তিনিই জানেন। আর কোন ব্যক্তি নিজেও জানে না, সে আগামী কাল কি করিবে এবং কোন ব্যক্তি নিজেও জ্ঞাত নহে, তাহার নৃত্য কোন স্থানে হইবে। কিন্তু আল্লাহ তায়ালা নিশ্চয় সব কিছু জানেন ও খবর রাখেন।” (২১ পাঃ—ছুরা লোকমান সমাধে)

ব্যাখ্যা—উল্লেখিত আয়াতে খাজানায়-গায়েব তথা গায়েব বা অদৃশ্য বস্তু সমূহের ও গোপন রহস্যাবলীর ভাণ্ডার হইতে পাঁচটি বিষয়ের উল্লেখ হইয়াছে। রসূলুল্লাহ (দঃ) আলোচ্য হাদীছে **مفاتيح النيب**—মাক্কাতেহুল গায়েব তথা খাজানায়-গায়েবের উদাহরণ রূপে উক্ত পাঁচটি বিষয়ই বর্ণনা করিয়াছেন। গায়েবের মালিক একমাত্র আল্লাহ; গায়েব সম্পর্কে হস্তক্ষেপের ক্ষমতা আর কাহারও নাই, তাহা চাক্স প্রামাণিকরূপে বুঝাইবার জন্য উক্ত পাঁচটি বিষয়ের উদাহরণ অত্যন্ত উপযোগী।

(১) কেয়ামত কবে হইবে?

সমস্ত লোকই এই ধরাপৃষ্ঠে বসাবস করিতেছে, বুদ্ধিমান বৈজ্ঞানিক রাজা-বাদশা, নবী-রসূল, পীর-আওলিয়া সকলেই এই বস্তুকরার অধিবাসী, কিন্তু কেহই বলিতে পারে না ও পারে নাই—ইহার বিলুপ্তি ও পরিসমাপ্তির দিন কেনট। নিজ গৃহের খবরই যাহার নাই সে খাজানায়-গায়েবের অগণিত রহস্যাবলীর জ্ঞান আয়ত্তকারী কিরূপে হইতে পারে?

(২) বৃষ্টি সম্পর্কীয় সম্যক জ্ঞান :

মানুষের এই আবাসগৃহ ভূমণ্ডলের জীবনী শক্তি নির্ভর করে বৃষ্টির উপর এবং মানুষের জীবনধারণের উপকরণগুলির অস্তিত্বও সেই বৃষ্টির উপরই নির্ভরশীল। এমন একটি আবশ্যকীয় বস্তু উহা এবং সকলের সম্মুখেই উহার গমনামন হইতেছে, এতদসত্ত্বেও মানুষ উহার গোপন রহস্যগুলির সম্যক জ্ঞান হইতে সম্পূর্ণ অজ্ঞ। মানুষ নিতুলরূপে এতটুকুও জানে না, ঠিক কোন সময়, কোথায় কি পরিমাণ বৃষ্টি বর্ষিবে *। সেই মানুষ খাজানায়-গায়েবকে তাহার আওতায় কিরূপে আনিতে

* বিজ্ঞানের এই সর্বাঙ্গিক উন্নতির যুগেও যান্ত্রিক সাহায্য যতটুকু উপলব্ধি করিতে পারিতেছে তাহা পূর্বাভাস মাত্র। নিতুল সঠিক সংবাদ সরবরাহের কোন ব্যবস্থা সম্ভব (পর পৃষ্ঠায় দেখুন)

পারে? অবশ্য আল্লাহ তায়ালা উহা এবং উহার সমুদয় সৃষ্টি রহস্যও সম্যকরূপে জ্ঞাত আছেন। কেননা, তিনিই রুষ্টির এবং উহার বর্ষণ তাঁহারই ক্ষমতা ও আদেশাধীন।

(৩) গর্ভাশয়ের সন্তান সম্পর্কীয় জ্ঞান :

গর্ভস্থ সন্তান সম্পর্কীয় জ্ঞান যে, উহা নর, না—নারী এবং গর্ভ খালাসে সময় বেশী বাইবে না কম তাহাও মানুষ সম্যক, সঠিক ও নিতুলরূপে নির্ণয় করিতে অক্ষম। বিজ্ঞানের এই জয়জয়কারের যুগেও তাহা সম্ভব হয় নাই। মাতা দীর্ঘ দিন উহা বহন করিয়া থাকে সেও উহা নির্ণয় করিতে অক্ষম। এত নিকটস্থ এবং এত আঙ্গাঙ্গিভাবে বিজড়িত একটি বস্তু সম্পর্কে যে মানুষ এত অজ্ঞ সেই মানুষ খাজানায়-গায়েবকে কিরূপে জয় করিতে পারিবে?

(৪) আগামী কল্য কি করিবে?

অপরের ত দূরের কথা নিজে আগামী দিন কি করিবে এবং আগামী দিন তাহার পক্ষে কি ঘটবে সে সম্পর্কেও প্রত্যেকটি মানুষ সম্পূর্ণ অজ্ঞ। যে মানুষ নিজের সম্পর্কেই এত অজ্ঞ সে খাজানায়-গায়েবকে কিরূপে জানিতে পারে?

(৫) কোথায় মৃত্যু হইবে?

প্রত্যেক মানুষ নিজের সম্পর্কেই এত অজ্ঞ যে, তাহার ইহজগতের সর্ববশেষ অবস্থা যে মৃত্যু সেই মৃত্যু কোন্ সময় কোথায় আসিবে তাহাও সে জানে না। সেই মানুষ অসীম অসংখ্য খাজানায়-গায়েবের জ্ঞান জয়কারী কিরূপে হইবে।

বিশেষ দৃষ্টব্য :—ভূত-ভবিষ্যৎ ও বর্তমানের সমুদয় গায়েব তথা গুণী-জ্ঞানী, বিজ্ঞানী সমগ্র মানব-দানবেরও দৃষ্টির আগোচরে ও সমগ্র সৃষ্টির অনুভূতির অন্তরালে যে রহস্যমালার অসীম ময়দান ও কুলহীন সমুদ্র আছে তাহা একমাত্র আল্লাহ তায়ালায় আয়ত্তাধীন রহিয়াছে বলিয়া পবিত্র কোরআনের অনেক স্থানেই বিঘোষিত রহিয়াছে। ইহা দ্বারা মানব সমাজকে এই শিক্ষা গ্রহণ করিতে হইবে যে—

পবিত্র কোরআন বা প্রেরিত রসূল মারফৎ আল্লাহ তায়ালা যে আদর্শ দান করিয়াছেন এবং উহাতে যে, বিধি-বিধান প্রবর্তন করিয়াছেন, যে আদেশ নিষেধ প্রদান করিয়াছেন, যে যে ভাগ-বন্টন বা সীমা রেখা নির্ধারিত করিয়া দিয়াছেন,

হয় নাই, হইবেও না। এতদ্ভিন্ন এই পূর্বাভাসও এলমে-গায়েব মোটেই নহে, বরং কোন বস্তুর লক্ষণ দেখিয়া উহার আগমণের ধারণা করা মাত্র, যাহা একটি অতি সহজ ও স্বাভাবিক বিষয়। যেক্রম আকাশে মেঘের সঞ্চারণ দেখিয়া বৃষ্টির আগমণ সাধারণ ভাবেই অনুভব করা হইয়া থাকে। সাধারণ দৃষ্টিতে মোটা জিনিষই ধরা পড়ে। তাই এখানেও মোটা নিদর্শনের উপরই নির্ভর করা হয়। বাস্তবিক সাহায্যে সূক্ষ্ম নিদর্শনও দেখা যায় যাহা সাধারণ দৃষ্টিতে দেখা যায় না। তাই যন্ত্রধারীগণ সাধারণ লোকদের একটু পূর্বের সংবাদ দিতে পারে। প্রকৃত প্রস্তাবে উভয়েই লক্ষণ দেখিয়া বস্তুর আগমণ অনুভবকারী।

উহার (Revise, reform) পরিবর্তন পরিবর্জন ও সংশোধন বা উৎকর্ষ সাধন ইত্যাদি কোন প্রকার হস্তক্ষেপের অবকাশ কোন স্থষ্টের জন্ত থাকিতে পারে না। কোন ক্ষেত্রে এরূপ কোন হস্তক্ষেপ যুক্তিযুক্ত বিলয়া দৃষ্ট হইলে তাহা স্থষ্টির দৃষ্টির ক্ষুদ্রতা ও সীমাবদ্ধতার কারণেই হইবে। তাই উহার প্রতি অক্ষিপ না করিয়া আলেমুল-গায়েব স্থষ্টিকর্তার আদেশকেই মানিয়া চলিতে হইবে।

● আল্লাহ তায়ালা বলিয়াছেন—

قُلْ هُوَ الْقَادِرُ عَلَىٰ أَنْ يَبْعَثَ عَلَيْكُمْ عَذَابًا مِّنْ نَّوَقِكُمْ أَوْ مِّنْ تَحْتِ
أَرْجَالِكُمْ أَوْ يَلْبَسَكُمْ شِيعًا وَيُذِيقَ بَعْضَكُمْ بَأْسَ بَعْضٍ -

মানুষকে বিপদ-আপদ হইতে আল্লাহ তায়ালাই সুরক্ষিত রাখেন। মানুষ সুখে থাকিয়া আল্লাহ তায়ালাকে যেন ভুলিয়া না যায়, সেই উদ্দেশ্যে মানুষকে সতর্ক করিয়া দিতেছেন যে, আল্লাহ তায়ালা যেরূপ রক্ষা করিতে পারেন তদ্রূপ তাঁহার নাফরমানী করিলে “তিনি ইহাও করিতে পারেন যে, তোমাদেরে ধ্বংসকারী আজাব পাঠাইয়া দেন উপরের দিক হইতে, (যেমন উপর হইতে শিলা-পাথর বর্ষণ, অগ্নিময় বজ্রপাত, অগ্নিময় বা হিম বায়ু প্রবাহণ, ঝড়, তুফান ইত্যাদি।) বা নীচের দিক হইতে, (যেমন দেশময় প্রলয়কর ভূকম্পন ও ভূধসন ইত্যাদি।) কিম্বা তোমাদের মধ্যে দলাদলী স্থষ্টি করিয়া পরস্পর ঝগড়া-বিবাদ, মারামারি কাটাকাটিতে লিপ্ত করিয়া দিতে পারেন।” (ছুরা আন্বা’ম—৭ পারা ১৪ রুকু)

নাফরমানদিগকে আল্লাহ তায়ালা আখেরাতে পূর্ণ শাস্তি দিবেন, দুনিয়াতেও তাহাদিগকে শায়েস্তা করার জন্ত এবং পরবর্তী যুগকে শিক্ষা দান ও সতর্ক করার জন্ত বিভিন্ন প্রকার আজাব পাঠাইবার ব্যবস্থাও রাখিয়াছেন। আলোচ্য আয়াতে সেই সব আজাবেরই বর্ণনা দান করা হইয়াছে। ইতিহাসের সাক্ষ্য বিচ্যমান রহিয়াছে, পূর্ববর্তী নবীদের উন্মৎগণ নাফরমানীতে লিপ্ত হইলে তাহাদের উপর উল্লেখিত আজাব সমূহ আসিয়াছে এবং তাহারা উহাতে ধ্বংস হইয়াছে। তাহাদের ধ্বংসের বহু ইতিহাস চতুর্থ খণ্ডে পবিত্র কোরআন হইতে উদ্ধৃত হইয়াছে।

আমাদের প্রিয় নবী হযরত মোহাম্মদ মোস্তফা (দঃ) স্বীয় উন্মৎতের স্নেহ-মমতা তাহাদের সুখ সুবিধার আকাঙ্ক্ষা কোন ক্ষেত্রেই ভুলেন নাই। তিনি ভাবিলেন, উক্ত আয়াতে বর্ণিত প্রথম দুই প্রকারের আজাব আসিলে অপরাধীগণ তওবা করার ও সংশোধিত হওয়ার সুযোগ খুব কমই পায় এবং সহসা ধ্বংস হইয়া যায়—যেক্ষণে পূর্ববর্তী উন্মৎগণ হইয়াছে। অবশ্য তৃতীয় প্রকারের আজাবটি এরূপ যে, ঐ ক্ষেত্রে

দীর্ঘ দিনের সুযোগ পাওয়া যায় এবং অপরাধীগণ সহসা সমূলে ধ্বংস হইয়া যায় না। তাহারা তওবার ও সংশোধনের সুযোগ পাইতে পারে।

নাফরমান অপরাধীগণকে সতর্ক করিয়া যখন আল্লাহ তায়ালা পবিত্র কোরআনে উল্লেখিত আজাবত্রয়ের বিবরণ দান করিলেন, তখন অপরাধীগণের পক্ষেও দয়াল নবীর স্নেহ মমতার ঢেউ উদ্বেলিত হইয়া উঠিল। তিনি আল্লার দরবারে হাত উঠাইলেন—হে পরওয়ারদেগার! আমার উম্মৎ যদি শাস্তির উপযুক্ত হইয়া পড়ে তবুও তাহাদের উপর প্রথম ও দ্বিতীয় প্রকার আজাব পাঠাইওনা। তোমার প্রতি ধাবিত করার উদ্দেশ্যে শায়েস্তা ও সতর্ক করার প্রয়োজনে তাহাদিগকে তৃতীয় প্রকারের আজাব দ্বারা হুশিয়ার করিও, যেন তাহারা তওবা করার এবং সংশোধিত হওয়ার সুযোগ পায়। নিম্নে বর্ণিত হাদীছে হযরতের এই দোয়ারই বর্ণনা হইয়াছে এবং হযরতের এই দোয়া আল্লার দরবারে কবুল হইয়াছে।

১৯১৫। হাদীছ :- ছাহাবী জাবের (রাঃ) উল্লেখিত আয়াত নাযেল হওয়ার-কালের বর্ণনা করিয়াছেন, “عذاباً من فوقكم” উপরের দিক হইতে আগত আজাব” এর উল্লেখ হইলে সঙ্গে সঙ্গে হযরত রসূলুল্লাহ (দঃ) দোয়া করিয়াছেন, হে পরওয়ারদেগার! আমি করজোড়ে তোমার নিকট এই শ্রেণীর আজাব হইতে পানাহ্ চাই এবং “ومن تحتك أرجلكم”—নীচের দিক হইতে আগত আজাব—এর উল্লেখ হইলে হযরত (দঃ) দোয়া করিয়াছেন, হে পরওয়ারদেগার! আমি তোমার নিকট এই শ্রেণীর আজাব হইতেও পানাহ্ চাই। অতঃপর —“ويلبسكم شيعاً”—তোমাদের মধ্যে বিভেদ ও দলাদলী সৃষ্টি করিয়া সংঘর্ষে লিপ্ত করিতে পারেন” এর উল্লেখ হইলে হযরত রসূলুল্লাহ (দঃ) বলিলেন, ইহা পূর্বের দুইটি অপেক্ষা সহজ ও নরম আজাব, (যেহেতু ইহার ক্ষেত্রে তওবা ও সংশোধনের সুযোগ পাওয়া যায়।)

ব্যাখ্যা :- উল্লেখিত আয়াত ও হাদীছ দ্বারা প্রমাণিত হইল—জাতীয় অনৈক্য, বিভেদ ও দলাদলি তুচ্ছ ও অবহেলার বস্তু নহে, প্রকৃত প্রস্তাবে উহা আল্লার আজাব। জাতিগতভাবে আল্লার নাফরমানী করা হইলে আল্লাহ তায়ালা জাতিকে এই আজাবে লিপ্ত করিয়া থাকেন, তাই ইহা হইতে বাঁচিতে হইলে সশ্লিলিতভাবে আল্লার প্রতি ধাবিত হওয়া একান্ত কর্তব্য।

স্মরণ রাখিবেন—প্রথম ও দ্বিতীয় প্রকারের আজাব ব্যাপক আকারে সমুদয় জাতিকে সহসা ধ্বংস করিয়া দেয়। যেকোন পূর্ববর্তী উম্মৎদের অবস্থা হইয়াছে—তাহা হইতে আল্লাহ তায়ালা এই উম্মৎকে রেহায়ী দিয়াছেন। কিন্তু এক জনের দ্বারা দশ জনকে সতর্ক করার জগ্ন স্থান বিশেষে ঐরূপ আজাব এই উম্মতের মধ্যেও আসিতে পারে, কিন্তু ব্যক্তি বা স্থান বিশেষে আসে; ব্যাপকরূপে আসে না।

১১১৬। হাদীছ :- আবু হোরায়রা (রাঃ) হইতে বর্ণিত আছে, হযরত রসূলুল্লাহ ছাল্লাল্লাহু আলাইহে অসাল্লাম বলিয়াছেন, কেয়ামত কায়েম হওয়ার পূর্বে অবশ্যই একদিন সূর্য্য তাহার অস্ত যাওয়ার দিক হইতে উদিত হইবে এবং সকলেই তাহা দেখিতে পাইবে। তৎকালীন বিশ্ববাসী উহা দেখিয়া (বিশ্বাস করিতে বাধ্য হইবে যে, কেয়ামত অবশ্যজ্ঞাবী, তাই তখন) সকলেই ঈমান আনিবে, কিন্তু (যাহারা পূর্বে হইতে ঈমানদার ছিল না, শুধু তখন ঈমান আনিয়াছে—তাহাদের ঈমান গৃহিত হইবে না। কারণ,) তখনকার সময়টিই ঐ সময় যখন ঈমান গ্রহণীয় নহে বলিয়া কোরআনের ঘোষণা রহিয়াছে—

لَا يَنْفَعُ نَفْسًا إِيْمَانُهَا لَمْ تَكُنْ أَمَنَتْ مِنْ قَبْلُ أَوْ كَسَبَتْ فِي إِيْمَانِهَا

ব্যাখ্যা :- আল্লার কালান কোরআন এবং আল্লার রসূল ও তাঁহার বর্ণনায় বিশ্বাস করিয়া বা সৃষ্টিগত সত্য-উপলব্ধি শক্তির প্রভাবে আল্লার প্রতি ইমান আনা, আখেরাতের প্রতি ইমান আনা এবং আল্লার ভয়ে ও আখেরাতের ভয়ে পাপ হইতে তওবা করা—এই ঈমান ও তওবাই হইল যথার্থ ও ফলদায়ক এবং সেই ঈমান ও তওবাই গ্রহণীয়। পক্ষান্তরে আখেরাতে সকলেই ঈমান প্রকাশ করিবে। কিন্তু সেই ঈমানের প্রতি মোটেই ক্রক্ষেপ করা হইবে না বলিয়া পবিত্র কোরআনের বহু জায়গায় উল্লেখ রহিয়াছে। তদ্রূপ ইহজগৎ ত্যাগের মুহূর্ত্ত উপনীত হইলে— যখন ক্ষেরেশতা ইত্যাদি দেখার স্বাভাবিক চক্ষু খুলিয়া যায়, তখনকার ঈমান এবং তওবাও গ্রহণীয় নহে। এতদ্ভিন্ন কেয়ামত অতি নিকটবর্ত্তী হওয়ার কতিপয় বিশেষ নিদর্শন আছে উহা প্রকাশিত হইয়া কেয়ামতের বাস্তবতা প্রত্যক্ষের পর্য্যায়ে প্রমাণিত হইয়া গেলে তখনকার ঈমান এবং তওবাও গৃহিত হইবে না এই বিষয়টিই এই আয়াতে বর্ণিত হইয়াছে—

يَوْمَ يَأْتِي بَعْضُ آيَاتِ رَبِّكَ لَا يَنْفَعُ نَفْسًا إِيْمَانُهَا لَمْ تَكُنْ أَمَنَتْ

مِنْ قَبْلُ أَوْ كَسَبَتْ فِي إِيْمَانِهَا خَبِيرًا -

“যে দিন তোমার প্রভু-পরওয়ারদেগারের তরফ হইতে (কেয়ামতের বড় বড় নিদর্শগুলির) বিশেষ নিদর্শনটি প্রকাশ হইয়া যাইবে সেদিন ঐ ব্যক্তির ঈমান ফল-প্রদ হইবে না যে ব্যক্তি পূর্বে ঈমান আনিয়াছিল না। কিম্বা (পূর্বে হইতে ঈমান ছিল, কিন্তু ঈমান অবস্থায় কোন নেক আমল করে নাই—সারা জীবন গোণার কাজে নিমগ্ন ছিল, তওবা করে নাই; সেই দিন ঐ অবস্থা দেখিয়া তাহার চৈতন্য হইয়াছে এবং তওবা করিয়াছে,) তাহার তওবাও কোন ফল-প্রদ হইবে না।”

এই আয়াতে যে বিশেষ নিদর্শনের উল্লেখ রহিয়াছে উহারই ব্যাখ্যা আলোচ্য হাদীছে করা হইয়াছে—উহা হইল সূর্য্য অস্ত যাওয়ার দিক হইতে উদিত হওয়া। কেয়ামত অতি নিকটবর্তী হওয়ার সর্বপ্রধান ও সর্বাধিক ব্যাপক নিদর্শন এই যে— একদিন সূর্য্য উদিত হওয়ার দিক হইতে উদিত না হইয়া অস্তমিত হওয়ার দিক হইতে উদিত হইবে। ঐদিক হইতে চলিয়া মধ্য আকাশে পৌঁছিব, পূরণায় ঐ দিকে ফিরিয়া যাইবে এবং স্বাভাবিকরূপে অস্তমিত হইবে। অবশ্য অতঃপর যে কয়দিন ছনিয়া বাকি থাকিবে স্বাভাবিকরূপেই উদিত ও অস্তমিত হইবে।

বিশেষ দ্রষ্টব্য :—অস্ত যাওয়ার দিক হইতে সূর্য্য উদয় হওয়া সম্পর্কে ছুরা ইয়াছীনের একটি আয়াতের তফছীরে বর্ণিত একটি হাদীছে কিছু তথ্য রহিয়াছে। নিম্নে ঐ হাদীছটি ৪৫৪ পৃষ্ঠা হইতে উদ্ধৃত করা হইল—

১১১৭। **হাদীছ :**—আবুজর গেফারী (রাঃ) বর্ণনা করিয়াছেন, একদা আমি সূর্য্য অস্ত যাওয়াকালে হযরত রসুলুল্লাহ ছাল্লাল্লাহু আলাইহে অসাল্লামের সঙ্গে মসজিদে ছিলাম। হযরত (দঃ) আমাকে জিজ্ঞাসা করিলেন, হে আবুজর! জান কি, সূর্য্য কোথায় যাইতেছে? আমি আরজ করিলাম, একমাত্র আল্লাহ এবং আল্লার রসুলই তাহা জানেন। হযরত (দঃ) বলিলেন, সূর্য্য চলিতে চলিতে আরশের নীচে যাইয়া সেজ্দা করিবে এবং (সম্মুখপানে চলিয়া উদিত হওয়ার) অনুমতি প্রার্থনা করিবে। তাহাকে অনুমতি দেওয়া হইবে! কিন্তু এমন একটি দিন নিশ্চয় আসিবে যে দিন সে এইরূপ সেজ্দা করিবে, কিন্তু তাহার সেজ্দা কবুল হইবে না (তথা তাহার সেজ্দার উদ্দেশ্য পূরণ করা হইবে না)। অনুমতি চাহিবে, কিন্তু তাহাকে ঐ অনুমতি দেওয়া হইবে না। তাহাকে আদেশ করা হইবে—যেই পথে আসিয়াছ সেই পথে ফিরিয়া যাও। যাহার ফলে সূর্য্য অস্তমিত হওয়ার দিক হইতে উদিত হইবে। ইহাই তাৎপর্য্য এই এই আয়াতের—

وَالشَّمْسُ تَجْرِي لِمُسْتَقَرٍّ لَّهَا ۚ ذَٰلِكَ تَقْدِيرُ الْعَزِيزِ الْعَلِيمِ -

“(ইহাও মহান আল্লাহ তায়ালার তোহীদ ও একত্বের একটি প্রমাণ যে,) সূর্য্য তাহার নির্দ্ধারিত ঠিকানার দিকে চলিতে থাকে; ইহা সর্বশক্তিমান সর্ববজ্ঞ আল্লাহ তায়ালারই নির্দ্ধারিত সূশৃঙ্খল নিয়ম।”

ব্যাখ্যা :—সারা সৃষ্টি জগতের পক্ষে কল্যাণময় এই বিশাল সূর্য্য যাহা এই ভূমণ্ডল অপেক্ষা ১৩ লক্ষ গুণ বড়, যাহার গুণাগুণ বা বিশালতা দৃষ্টে উহাকে এক শ্রেণীর লোক পূজনীয়রূপে বরণ করিয়াছে। আবহমান কাল হইতে সর্ব সমক্ষে সূশৃঙ্খলতার সহিত সূর্য্যের গতিবিধি পরিচালিত হইতেছে, কিন্তু সূর্য্য তাহার

গতিবিধিতে স্বয়ংক্রিয় বা স্বাধীন নহে। তাহার জগ্ন নির্ধারিত নিয়মের চুল পরিমাণ ব্যতিক্রমও সে করিতে পারে না। সুতরাং ইহা বাস্তবিকই মহান আল্লার একত্বের প্রকৃষ্ট নিদর্শন। এই বিষয়টাই আলোচ্য হাদীছে সুস্পষ্ট ভাষায় খুলিয়া বলা হইয়াছে।

চন্দ্র সূর্য ও উহাদের কক্ষগুলি সহ সমুদয় সৌর-জগৎই আরশের নীচে রহিয়াছে। আরশ ত এই সুবের সমষ্টি হইতে বহু বহু গুণে সুপ্রশস্ত। সুতরাং সূর্য প্রত্যেক অবস্থায় এবং প্রত্যেক স্থানে সদা সর্বদাই আরশের নীচে রহিয়াছে। অতএব, আলোচ্য হাদীছে সূর্য আরশের নীচে যাওয়ার তাৎপর্য এই যে, যে মহাশক্তির পরিচালন-ক্ষমতা ও নিয়ন্ত্রণ-কার্যের বিকাশ হইয়া থাকে আরশ হইতে* সেই শক্তির করায়ত্ত, অধীনস্থ ও অনুগতরূপে সূর্য ঐ ঐ স্থানের দিকে চলিতে থাকে যে যে স্থানকে বিভিন্ন ভূখণ্ডের জগ্ন সেই মহাশক্তি সূর্যের কেন্দ্ররূপে নির্ধারিত করিয়া দিয়াছেন যে, তথায় যাইয়া সূর্যকে অনুমতি গ্রহণ পূর্বক অগ্রসর হইতে হইবে।

আল্লার রসূল বুঝাইতে চাহিতেছেন, আবহমান কাল হইতে যে দেখা যায়, সূর্য একদিক হইতে উদিত হইয়া অপর দিকে অস্তমিত হইতেছে। তাহার এই বিরামহীন গমনাগমন নিছক স্বেচ্ছাক্রমের ও স্বক্রিয় ভাবের নহে, বরং উহার মূলে রহিয়াছে মহান আল্লার তরফ হইতে তাহার জগ্ন নির্ধারিত বিভিন্ন কেন্দ্র ও স্টেশন অতিক্রম করার আদেশ ও অনুমতি। সুতরাং প্রতীয়মান হইল যে, সূর্যও সেই মহাশক্তি তথা মহান আল্লার সম্মুখে একটি নগণ্য অনুগত দাসই বটে। অতএব সূর্যকে পূজা না করিয়া মহান আল্লাহকেই একমাত্র পূজণীয় রূপে গ্রহণ করিবে।

সূর্যের সেজদা-রহস্য সম্পর্কে পবিত্র কোরআনের একটা সংবাদ স্মরণ করা বিশেষ ফলদায়ক হইবে। আল্লাহ তায়ালা বলিয়াছেন—“বিশ্চচরাচরের প্রতিটি বস্তুই নিজ নিজ কায়দায় সৃষ্টিকর্তা আল্লাহ তায়ালা তছবীহ পাঠ (তথা গুণ-গান ও পবিত্রতা বর্ণনা) করিয়া থাকে। অবশ্য তোমরা উহাদের তছবীহ পাঠ বুঝিতে ও অনুধাবন করিতে সক্ষম নও।” (১৫ পারা — ৫ রুকু)

দার্শনিক কবি মাওলানা রুমী আর একটি তথ্যও পেশ করা হইল—

خاک و باد و آب و آتش بندۂ اند - با من و تو مردۂ با حق زندۂ اند

আগুন, পানি, বায়ু, মাটি সবই আল্লাহ তায়ালায় অনুগত বান্দা; আমার ও তোমার পক্ষে ঐ শ্রেণীর বস্তুগুলি নিজীব দেখাইলেও সৃষ্টিকর্তা আল্লাহ তায়ালায় পক্ষে ঐ সবগুলিই জীবন্ত!

* যেমন একটি লোক লাহোর হইতে খুলনা বা ফরিদপুরের দিকে যাত্রা করিলে বলা যাইতে পারে যে, সে ঢাকার আগারে যাইতেছে, যেহেতু খুলনা ফরিদপুর এক একটি কেন্দ্র যাহা রাজধানী ঢাকার পরিচালনায় প্রতিষ্ঠিত।

● আল্লাহ তায়ালা বলিয়াছেন—

وَلَا تَنْفَرُوا بِالْفُجْوَاحِشِ مَا ظَهَرَ مِنْهَا وَمَا بَيْنَ... ذَلِكَمُ وَهُكُمُ بِهِ

“আর তোমরা প্রকাশ্য অপ্রকাশ্য—সর্ব প্রকারের নিলজ্জ শালীনতাহীন ফাহেসা কার্যাবলী হইতে সর্বদা দূরে থাকিও ঐ সবের ধারে-কাছেও যাইও না।.....এই সব আদেশ-উপদেশ দ্বারা আল্লাহ তায়ালা তোমাদিগকে সতর্ক করিয়াছেন যেন তোমাদের কার্যকলাপে বিবেক-বুদ্ধির পরিচয় পাওয়া যায়। (৮ পারা ৬ রুকু)

قُلْ إِنَّمَا حَرَّمَ رَبِّي الْفُجْوَاحِشِ مَا ظَهَرَ مِنْهَا وَمَا بَيْنَ.....

“আপনি জগৎবাসীকে জানাইয়া দিন, আমার প্রভু-পরওয়ারদেগার প্রকাশ্য অপ্রকাশ্য সকল প্রকার নিলজ্জ শালীনতাহীন ফাহেসা কার্যাবলীকে হারাম ও নিষিদ্ধ করিয়া দিয়াছেন। (ছুরা আ'রাফ—৮ পারা ১১ রুকু)

উল্লেখিত আয়াতদ্বয়ের মধ্যে আল্লাহ তায়ালা কর্তৃক নিলজ্জ শালীনতাহীন ফাহেসা কার্যাবলী হারাম ও নিষিদ্ধ বর্ণিত হইয়াছে সে সম্পর্কে হযরত রসুলুল্লাহ ছালাল্লাহু আলাইহে অসাল্লাম বলিয়াছেন—

১৯১৮। হাদীছ :—আবদুল্লাহ ইবনে মসউদ (রাঃ) হযরত রসুলুল্লাল (দঃ) হইতে বর্ণনা করিয়াছেন, শালীনতা বিবর্জিত নিলজ্জ ফাহেসা কার্যকলাপকে আল্লাহ তায়ালা সকলের চেয়ে অধিক ঘৃণা করিয়া থাকেন। সে জগুই আল্লাহ তায়ালা প্রকাশ্য অপ্রকাশ্য সকল প্রকার ফাহেসাকে হারাম করিয়াছেন।

পক্ষান্তরে আল্লাহ তায়ালা প্রশংসাকে সর্বোচ্চ ভাল বাসিয়া থাকেন। তাই আল্লাহ তায়ালা স্বয়ং নিজের প্রশংসা করিয়াছেন।

ব্যখ্যা :—বর্তমান জগতে শালীনতাহীন নিলজ্জ ফাহেসা কার্যকলাপই হইল শিক্ষা ও সভ্যতার নিদর্শন এবং উহাই হইল বিভিন্ন মহল ও জলসা-জুলুসের উৎকর্ষ মৌন্দর্য্য ও উজ্জলতা বন্ধনকারী। এমনকি আর্ট ও শিল্প ইত্যাদি নামের অঙ্গভঙ্গী, নৃত্য-গীত ও ফাহেসাবাজীকে জাতীয় উন্নতির উৎস বলা হইয়া থাকে। সরকারী বাজেটে মোটা মোটা অঙ্ক উহার জগু বরাদ্দ করা হইয়া থাকে।

আল্লাহ সন্তুষ্টি-অসন্তুষ্টির পরওয়া যাহারা করে না—যাহারা আল্লাহতে অবিশ্বাসী অমোসলেম তাহাদের পক্ষে উহা সম্ভব বটে, এবং সাধারণতঃ আল্লাহ তায়ালাও তাহাদের পক্ষে ইহজগতে উহা বরদাশত করিয়া থাকেন। কিন্তু যাহারা মোসলমান তথা আল্লাহ সন্তুষ্টি-অসন্তুষ্টির পরওয়া করার বন্দনে আবদ্ধ তাহাদের পক্ষে আল্লাহ তায়ালা ঐরূপ ঘৃণিত ফাহেসা কার্যাবলী অবশুই কলঙ্কময়। তিনি তাহাদের পক্ষে অনেক সময় উহা বরদাশত করেন না। ফলে তাহারা আল্লাহ গজবে নিপতিত হয়।

এক শ্রেণীর লোক আছে যাহারা ব্যক্তিগত ভাবে নিজেরা খোদা-ভক্ত মোত্তাকী পরহেজগার। কিন্তু তাহাদের ছেলে-মেয়েরা তাহাদেরই খরচায় ও পৃষ্ঠপোষকতায় সেই শিক্ষা ও পরিবেশে প্রতিপালিত হইতেছে যাহা ঐ নিল'জ্জ ফাহেসা আদৎ-অভ্যাসের মূল উৎস ও সূত্র। নিজ পৃষ্ঠপোষকতায় ছেলে-মেয়েদিগকে আল্লাহ তায়ালার ঘৃণিত কার্যাবলী—নিল'জ্জ ফাহেসা আদৎ-অভ্যাসের আনয়ে প্রতি পালন করিয়া আল্লাহ-ভক্ত কিরুপে হওয়া যায় তাহা বাস্তবিকই বিবেচ্য বিষয়।

● আল্লাহ তায়ালা বলিয়াছেন—

خُذِ الزُّفْرَ وَأَمْرًا بِالْعُرْفِ وَأَعْرِضْ عَنِ الْجَاهِلِينَ

“ক্ষমাগুণ ধারণ কর, সং কাজের আদেশ কর এবং অজ্ঞ লোকদের (বিরক্তিজনক ব্যবহার) হইতে দৃষ্টি এড়াইয়া চল।”

১৯১৯। হাদীছ :—আবুল্লাহ ইবনে যোবায়ের (রাঃ) বলিয়াছেন, আল্লাহ তায়ালা তাঁহার নবীকে আদেশ করিয়াছেন—লোকদের অসদাচরণ ক্ষমা করার জ্ঞ। মানবকে এই চারিত্রিক গুণ অর্জনে উদ্বুদ্ধ করার জ্ঞাই আল্লাহ তায়ালা উক্ত আয়াত নাযেল করিয়াছেন।

১৯২০। হাদীছ :—আবু সায়ীদ (রাঃ) বর্ণনা করিয়াছেন, একদা আমি মসজিদে নামায পড়িতেছিলাম, এমতাবস্থায় হযরত রসূলুল্লাহ ছাল্লাল্লাহু আলাইহে অসাল্লাম আমার নিকট দিয়া যাইবার কালে আমাকে ডাকিলেন। (আমি যেহেতু নামাযে ছিলাম, তাই) আমি তাঁহার ডাকের সঙ্গে সঙ্গে উপস্থিত হইলাম না। নামায শেষ করিয়া তাঁহার খেদমতে উপস্থিত হইলাম। হযরত (দঃ) জিজ্ঞাসা করিলেন, ডাকার সঙ্গে সঙ্গে কেন আস নাই? আমি আরজ করিলাম ইয়া রসূলুল্লাহ! আমি নামায পড়িতে ছিলাম। হযরত (দঃ) বলিলেন, তোমার লক্ষ্য নাই যে, আল্লাহ তায়ালা বলিয়াছেন—

يَا أَيُّهَا الَّذِينَ آمَنُوا اسْتَجِيبُوا لِلَّهِ وَلِلرَّسُولِ إِذَا دَعَاكُمْ

“হে মোমেনগণ। আল্লাহ এবং রসূল তোমাদিগকে ডাকিলে সঙ্গে সঙ্গে সাড়া দিও” (আবু সায়ীদ বলেন, আমি আরজ করিলাম, ইন্শা আল্লাহ্ এই ক্রটি পুনরায় কখনও করিব না।)

তারপর হযরত (দঃ) বলিলেন, মসজিদ হইতে বাহির হইবার পূর্বেই তোমাকে কোরআন শরীফের সর্ব্ব শ্রেষ্ঠ ছুরা কোনটি তাহা বাতলাইয়া দিব। অতঃপর নবী (দঃ) আমার হাত ধরিয়া চলিতে লাগিলেন। মসজিদ হইতে বাহির হইবার নিকটবর্তী

হইলে আমি তাঁহার ঐ কথা স্মরণ করাইয়া দিলাম। হযরত (দঃ) বলিলেন, সেই ছুরাটি হইল “আল্‌হাম্‌তু লিল্লাহে রাঔবিল-আলামীন”। যাহা বিশেষরূপে আমাকেই দান করা হইয়াছে, (অন্ত কোন আসমানী কেতাবে এই ছুরা ছিল না।) এই ছুরাকেই কোরআনে-আজীম (কোরআনের সর্ব্ব শ্রেষ্ঠ অংশ) এবং সাব্যেঃ মাছানী (সপ্ত অময়াতবিশিষ্ট পুনঃ পুনঃ পঠিত) নামে (১৪ পারা—ছুরা হেজর ৬ রুকুতে) আখ্যায়িত করা হইয়াছে।

ব্যাখ্যা :—আল্লাহ তায়ালা বলিয়াছেন :—

يَا أَيُّهَا الَّذِينَ آمَنُوا اسْتَجِيبُوا لِلَّهِ وَلِلرَّسُولِ إِذَا دَعَاكُمْ لِمَا يُحْيِيكُمْ

অর্থাৎ :—হে মোমেনগণ! আল্লাহ এবং আল্লার রসূল যে সব বিধানাবলী ও কার্যাবলীর প্রতি আহ্বান করেন, বস্তুতঃ উহা তোমাদের ভবিষ্যৎ চিরস্থায়ী জিন্দেগীতে শান্তি ও সাফল্য আনয়নকারী। অতএব আল্লাহ এবং রসূল যখন তোমাদিগকে চিরস্থায়ী শান্তির জিন্দেগী দানকারী কার্যের প্রতি আহ্বান করেন তোমরা সেই ডাকে সাড়া দাও। (ছুরা আনফাল—৯ পারা ১৭ রুকু)

পূর্ব্বাপর বিষয়-বস্তু দৃষ্টে এই আয়াতের মূল উদ্দেশ্য হইল আল্লাহ এবং আল্লার রসূলের আদেশ-নিষেধকে মনে-প্রাণে গ্রহণ করা। সে অনুযায়ী জীবন পরিচালনা করা এবং কোন কাজ কঠিন বোধ হইলেও বিনা দ্বিধায় উহাতে আজনিয়োগ করা।

আলোচ্য হাদীছে দেখানো হইয়াছে, উক্ত আয়াতের আদেশটি কত কঠোর এবং ব্যাপক! রসূলুল্লাহ ছাল্লাল্লাহু আলাইহে অসাল্লামের জীবদ্দশায় তিনি কোন ব্যক্তিকে সাধারণ ভাবে ডাকিলেও সেই ডাকে তৎক্ষণাৎ সাড়া দেওয়া অবশ্য কর্তব্য ছিল এবং উহাও এই আয়াতের বিধানভুক্ত ছিল। এমনকি নামাযরত থাকিলেও নামায ছাড়িয়া রসূলের ডাকে অবিলম্বে সাড়া দেওয়া অত্যাবশ্যক ছিল।

১৯ ১। হাদীছ :—(৯ পাঃ ১৮ রুকুঃ ছুরা আনফাল ৩২নং আয়াত যাহার অর্থ) “একটি স্মরণীয় কথা—কাফেররা বলিল, আয় আল্লাহ! এই ইমলাম ধর্ম যদি সত্য হয়, তোমার পক্ষ হইতে হয় তবে (ইহার বিরোধিতার শান্তি দানে) আমাদের উপর আকাশ হইতে পাথর বর্ষণ কর বা অন্ত কোন প্রকার ভীষণ আজাব পতিত কর।”

আনাছ (রাঃ) বর্ণনা করিয়াছেন, এই উক্তিকারক মূলতঃ আবুজহল ছিল (অত্যাচারী উহাতে সায় দানকারী ছিল।)

উহার উত্তরে আল্লাহ তায়ালা পরবর্তী ৩৩নং আয়াত নাযেল করিয়াছেন। যাহার অর্থ—“(হে হাবীব!) আপনি তাহাদের মধ্যে থাকাবস্থায় আল্লাহ তাহাদেরে এই শ্রেণীর আজাব দিবেন না। এবং তাহাদের মধ্যকার কিছু সংখ্যক লোক

(যথা—মোমেনগণ) কমা প্রার্থনা করিতে থাকিবহায়ও তাহাদের উপর এই শ্রেণীর আজাব আসিবে না।

পরবর্তী ৩৪নং আয়াতে বলা হইয়াছে যে, তাহাদের অপরাধ দৃষ্টে বস্তুতঃ তাহারা ঐরূপ আজাবেরই যোগ্য ছিল। উক্ত আয়াতের অর্থ এই “তাহাদেরে আল্লাহ আজাব কেন দিবেন না? তাহারা ত হরম শরীফের মসজিদ হইতে (মুসলমানদিগকে) বাধা দিয়া থাকে, (যে রূপ ষষ্ঠ হিঃ সনে হোদায়বিয়ার ঘটনার করিয়াছে; তৃতীয় খণ্ড দ্রষ্টব্য।) অথচ তাহারা ঐ মসজিদের বন্ধু নহে। ঐ মসজিদের বন্ধু ত একমাত্র মোত্তাকী—মোমেনগণ। কিন্তু তাহাদের অধিকাংশই বোকা।

১৯২। হাদীছ :—ছায়ীদ ইবনে জোবায়ের (রাঃ) বর্ণনা করিয়াছেন, একদা ছাহাবী আবুল্লাহ ইবনে ওমর (রাঃ) আমাদের নিকট তশরীফ আনিলেন। এক ব্যক্তি তাঁহাকে জিজ্ঞাসা করিল, ফেৎনা-ফাছাদ দূরীভূত করার জন্ত আবশ্যক হইলে যুদ্ধে লিপ্ত হওয়াকে আপনি কিরূপ মনে করেন—সঙ্গত কি না?

আবুল্লাহ ইবনে ওমর (রাঃ) ঐ ব্যক্তিকে প্রশ্ন করিলেন, তুমি ফেৎনার অর্থ বুঝ কি? অতঃপর তিনি নিজেই উহার বর্ণনা দিলেন—ইসলামের প্রাথমিক যুগে কোন ব্যক্তি ইসলাম গ্রহণ করিলে বা করিতে চাহিলে কাফেররা তাহাকে মারপিট করিত, আবদ্ধ করিয়া রাখিত, এইরূপে ইসলাম গ্রহণে প্রতিবন্ধকতা সৃষ্টি করা হইত। পবিত্র কোরআনে ঐ অবস্থাকে “ফেৎনা” বলা হইয়াছে। উহা বন্ধ করার জন্ত রসুলুল্লাহ (দঃ) কাফেরদের সঙ্গে জেহাদ করিতেন। তোমরা বর্তমানে ক্ষমতা লাভের জন্ত যুদ্ধে লিপ্ত হও এবং উহাতে ফাছাদ ও বিশৃঙ্খলার সৃষ্টি হয়। (পবিত্র কোরআনে উল্লেখিত) “ফেৎনা” শব্দ দ্বারা উহা মোটেই উদ্দেশ্য নহে।

ব্যাখ্যা :—মোসলমানদের মধ্যে যখন রাষ্ট্রীয় বিষয় নিয়া মতবিরোধ সৃষ্টি হইল এমনকি যুদ্ধ-বিগ্রহ পর্য্যন্ত ঘটতে লাগিল তখন ছাহাবীদের মধ্যে অনেকেই নিরপেক্ষতা অবলম্বন করিলেন; তন্মধ্যে আবুল্লাহ ইবনে ওমর (রাঃ)ও ছিলেন। আর এক দল লোক ঐ অবস্থায় নিরপেক্ষতাবাদের বিরোধী ছিলেন। তাঁহাদের মতে কোন একটি দলকে সমর্থন করিয়া উহার বিপক্ষ দলের বিরুদ্ধে সংগ্রাম করতঃ শান্তি ও শৃঙ্খলা প্রতিষ্ঠা করা আবশ্যক ছিল। তাহারা তাঁহাদের মতের সমর্থনে এই

আয়াত পেশ করিতেন—**وَقَاتِلُواْ هُمْ حَتَّىٰ لَا تَكُونَ فِتْنَةٌ**—

সংগ্রাম চালাইয়া যাও যাবৎ না ফেৎনা-ফাছাদ দূরীভূত হইয়া যায়।

উক্ত দলেরই এক ব্যক্তি ছাহাবী আবুল্লাহ ইবনে ওমর (রাঃ)কে এই আয়াতের প্রতি ইঙ্গিত করিয়া প্রশ্ন করিয়াছিলেন, তাই তিনি এই আয়াতের “ফেৎনা” শব্দের ব্যাখ্যা দান করিয়া বুঝাইয়া দিলেন, রাষ্ট্রীয় দ্বন্দ্বে যুদ্ধ-বিগ্রহ করা এই আয়াতের

উদ্দেশ্য মোটেই নহে। এই আয়াতের তাৎপর্য হইল কাফেরদের বিরুদ্ধে সংগ্রাম চালাইয়া যাওয়া যাবৎ না ইসলামে বাধা দানের ক্ষমতা লোপ পাইয়া আল্লাহ দ্বীনের প্রাধান্য প্রতিষ্ঠিত হয়।

১৯২৩। হাদীছ ৫—নাফে' (রঃ) বর্ণনা করিয়াছেন, এক ব্যক্তি আবুত্বল্লাহ ইবনে ওমর (রাঃ)কে (মোসলমানদের পরস্পর যুদ্ধ-বিগ্রহে নিরপেক্ষতা অবলম্বনের নীতি ভঙ্গ করার উদ্দেশ্যে) বলিল, আপনি এই আয়াতের প্রতি লক্ষ্য করেন না?

আবুত্বল্লাহ বলিতেছেন..... **وَإِنْ طَائِفَتَانِ مِنَ الْمُؤْمِنِينَ اقْتَتَلُوا**

“মোসলমানদেরই দুইটি দল পরস্পর সংগ্রামে লিপ্ত হইলে তাহাদের মধ্যে মীমাংসা করিয়া দাও। (মীমাংসার বা মীমাংসা-প্রচেষ্টার পরও) যদি এক দল আর এক দলের উপর অত্যাচার চালাইতে চায় তবে উক্ত দলের বিরুদ্ধে সংগ্রাম কর।” (ছুরা হুজুরাত—২৪ পারা ১৪ রুকু)। অর্থাৎ মীমাংসা করিতে না পারিলে এক দলে যোগদান করিয়া অপর দলের বিরুদ্ধে সংগ্রামে शामिल হউন।

আবুত্বল্লাহ ইবনে ওমর (রাঃ) বলিলেন, দেখ ভাই! কোরআন শরীফে আরও

একটি আয়াত আছে—..... **وَمَنْ يُقَاتِلْ مُؤْمِنًا مِّنْهُ دَابَّةً يَأْكُلُهُ فَإِنَّهُ كَاتِبٌ سَيِّئٌ**

“যে ব্যক্তি কোন মোমেনকে ইচ্ছাকৃত হত্যা করিবে তাহার শাস্তি হইবে জাহান্নাম, তথায় সে অনিদিষ্টকাল থাকিবে এবং আল্লাহ গজব ও লা'নৎ তাহার উপর পতিত হইবে এবং আবুত্বল্লাহ তাহার জন্ত ভীষণ আজাব প্রস্তুত রাখিয়াছেন।” (৫ পা ১০ রঃ)

আবুত্বল্লাহ (রাঃ) ইহাও বলিলেন, প্রথম আয়াতটি বুঝিতে কোন রকম ভুল করিয়া দ্বিতীয় আয়াতটির দরুন মোসলমানের বিরুদ্ধে মারামারি কাটাকাটি হইতে বিরত থাকা আমার মতে দ্বিতীয় আয়াতটিতে ভুল করিয়া প্রথম আয়াতের দরুন ঐরূপ কাটাকাটিতে লিপ্ত হওয়া অপেক্ষা উত্তম।

অতঃপর ঐ ব্যক্তি আর একটি আয়াত তাহার সামনে পেশ করিল—

وَقَاتِلُوا فِي سَبِيلِ اللَّهِ فَاعْتَبِرُوا يَوْمَ الَّذِي أَتَاكُمْ لِكُلِّ فِرْقَةٍ مِّنْهُمْ جَزَاءٌ فَمَا كَانُوا يَافِقُونَ

“সংগ্রাম চালাইয়া যাও যাবৎ না ফেৎনা-ফাছাদ দূরীভূত হয়।” আবুত্বল্লাহ ইবনে ওমর (রাঃ) বলিলেন, এই আয়াতের আদেশ মোতাবেক ত আমরা রসুলুল্লাহ ছালাল্লাহু আলাইহে অসাল্লামের যুগে কাজ করিয়াছি—যখন ইসলামের শক্তি কম ছিল। লোকদিগকে দীন-ইসলামের কারণে নিপীড়িত হইতে হইত। কেহ ইসলাম গ্রহণ করিলে কাফেররা তাহাকে প্রাণে বধ করিত বা শৃঙ্খলাবদ্ধ করিয়া নানা প্রকার নির্যাতন চালাইত। ইসলাম গ্রহণে এইরূপ প্রতিবন্ধকতা সৃষ্টিকেই উক্ত আয়াতে “ফেৎনা” বলা হইয়াছে। আমরা

উক্ত আয়াতের নির্দেশে কাফেরদের বিরুদ্ধে সংগ্রাম করিয়াছি, যাহাতে ইসলামের শক্তি বৃদ্ধি পাইয়াছে—ফলে ইসলামে প্রতিবন্ধকতা স্থিতির প্রয়াস দূরীভূত হইয়া গিয়াছে। আর তোমরা যেই পথ অবমম্বন করিয়াছ উহাতে ত পুনরায় ফেৎনার উৎপত্তি হইবে। (কারণ, পরম্পর যুদ্ধ-বিগ্রহে মোসলমানদের শক্তি খর্ব হইয়া তাহারা দুর্বল হইয়া পড়িবে। ফলে কাফেরেরা পুনরায় ইসলামে প্রতিবন্ধক স্থিতিতে প্রবল হইয়া পড়িবে।

ঐ ব্যক্তি উক্ত বিতর্কে ব্যর্থ হইয়া অতঃপর একটি প্রশ্ন উত্থাপন করিল যে, আপনি ওসমান (রাঃ) এবং আলী (রাঃ) সম্পর্কে কি বলেন? তহত্বরে আবুল্লাহ ইবনে ওমর (রাঃ) তাঁহারা উভয়েই যে, ব্যক্তিত্ব সম্পন্ন ও মর্যাদাশীল তাহা ব্যক্ত করিলেন।

১৯২৪। হাদীছঃ—আবুল্লাহ ইবনে আব্বাস (রাঃ) বর্ণনা করিয়াছেন, যখন এই আয়াত নাযেল হইলঃ—

إِنْ يَكُنْ مِنْكُمْ عَشْرُونَ مَبْرُورًا يَغْلِبُوا مَا تَكْتَبِينَ

“(হে মোসলমানগণ! ক ফেরদের মোকাবিলায়) তোমাদের বিশজন ধৈর্য্যশীল থাকিলে, দুই শত কাফেরের উপর জয়ী হইতে পারিবে, (১০ পারা ৫ রুকু)। এই আয়াতের ইঙ্গিত ছিল, মোসলমান তাহাদের দশ গুণ বেশী কাফের তথা দশজনের মোকাবিলায় একজন হইলেও স্থিরপদ থাকা ফরজ হইবে পলায়ন করিতে পারিবে না। মোসলমানগণ এই বিধানটি গ্রহণ করিলেন বটে, কিন্তু কঠিন বোধ করিলেন। সুতরাং আল্লাহ তায়ালা উহার পরবর্তী আয়াত নাযেল করিলেন—

إِنَّا خَفَّفْنَا اللَّهُ لَكُمْ وَعَلِمَ أَنَّ فِيكُمْ ضَعْفًا - فَإِنْ يَكُنْ مِنْكُمْ مِائَةٌ مَبْرُورًا يَغْلِبُوا مِائَةَ مَا تَكْتَبِينَ -

“এখন হইতে আল্লাহ তায়ালা (পূর্বেবর বিধান) তোমাদের পক্ষে সহজ করিয়া দিয়াছেন। আল্লাহ তায়ালা তোমাদের মধ্যে সাহসের দুর্বলতা লক্ষ্য করিয়াছেন। এখন তোমাদের এক শত জন ধৈর্য্যশীল থাকিলে দুই শতের উপর জয়ী হইবে।” অর্থাৎ দ্বিগুণের মোকাবিলা হইতে পশ্চাদপসারণ জায়েয হইবে না। তার অধিক হইলে প্রাণ বাঁচাইবার চেষ্টা করা জায়েয হইবে।

আবুল্লাহ ইবনে আব্বাস (রাঃ) এই প্রসঙ্গে বলেন, দশগুণ হইতে কম করিয়া দ্বিগুণ করতঃ সহজ করায় সেই পরিমাণে ধৈর্য্যশক্তিও হ্রাস পাইয়াছে। পূর্বে মোসলমানদের যে ধৈর্য্যশক্তি ছিল এখন উহার দশ ভাগের আট ভাগ কমিয়া গিয়াছে।

১৯২৫। হাদীছ :- খালেদ ইবনে আসলাম বর্ণনা করিয়াছেন, একদা আমরা আবুল্লাহ ইবনে ওমর রাজিয়াল্লাহু আনহুর সঙ্গে পথ চলিতে ছিলাম, এক গ্রাম্য ব্যক্তি তাঁহাকে বলিল, আমাকে এই আয়াতটির তাৎপর্য বলিয়া দিবেন কি ?

وَالَّذِينَ يَكْنِزُونَ الذَّهَبَ وَالنِّصَّةَ وَلَا يَتَّبِعُونَ فِي سَبِيلِ اللَّهِ فَبَشِّرْهُمْ
بِعَذَابِ الْإِيمِ - يَوْمَ يُحْمَىٰ عَلَيْهَا فِي نَارِ جَهَنَّمَ فَتُكْوَىٰ بِهَا جِبَاهُهُمْ وَجُنُوبُهُمْ
وَظُهُورُهُمْ هَذَا مَا كَنْزْتُمْ لَا فَنَفْسِكُمْ فَذُوقُوا مَا كُنْتُمْ تَكْنِزُونَ -

“যে সমস্ত লোক সোনা-চান্দি (তথা ধন-সম্পদ) জমা করিয়া রাখে, উহা আল্লার রাস্তায় খরচ করেনা তাহাদিগকে ভীষণ আজাবের সংবাদ জ্ঞাত করিয়া রাখুন। তাহাদের সোনা-চান্দি (বা ধন-সম্পদের মূল্য পরিমাণ সোনা-চান্দিকে পাতরূপে রূপান্তরিত করিয়া ঐগুলিকে) জাহান্নামের আগুনে গরম করা হইবে। অতঃপর উহা দ্বারা ঐ ধন-সম্পদের মালিকদিগকে দাগ লাগান হইবে—তাহাদের কপালে, পাঁজরে ও পিঠে এবং তাহাদিগকে বলা হইবে, এই সব ধন-সম্পদ যাহা তোমরা (আল্লার রাস্তায় খরচ না করিয়া) নিজের জন্ত জমা করিয়া রাখিয়া ছিলে। সুতরাং যাহা নিজের জন্ত জমা করিয়াছিলে উহার মজা ভোগ কর।”

(ছুরা তওবাহ—১০ পারা ১১ ককু)

এই আয়াত-মর্মে বুঝা যায় নিজ ব্যয়ের অবশিষ্ট ধন-সম্পদ সবটুকুই আল্লার রাস্তায় ব্যয় করিতে হইবে, নতুবা আজাব হইবে। আবুল্লাহ ইবনে ওমর (রাঃ) বলিলেন, আয়াতের উদ্দেশ্য ঐ ব্যক্তি যে অবশিষ্ট সম্পূর্ণ ধন-সম্পদ জমা করিয়া রাখে—উহার যাকাতও দেয় না, আজাব তাহারই হইবে।

আলোচ্য আয়াত নাযেল হওয়ার পরে যাকাতের (তথা চল্লিশ ভাগের এক ভাগ বাধ্যতামূলক আল্লার রাস্তায় খরচ করার) বিধান প্রবর্তন করিয়া ঐ যাকাতকে আল্লাহ তায়ালা অবশিষ্ট মালের পবিত্রকারী করিয়া দিয়াছেন।

১৯২৬। হাদীছ :- আবুল্লাহ ইবনে ওমর (রাঃ) বর্ণনা করিয়াছেন, কেয়ামতের দিন মোমেনদের সঙ্গে আল্লাহ তায়ালা একটা বিশেষ গোপন আলাপ-অনুষ্ঠান হইবে। উহার বিবরণ আমি হযরত নবী ছাল্লাল্লাহু আলাইহে অসাল্লামের নিকট শুনিয়াছি—তিনি বলিয়াছেন, মোমেন ব্যক্তি আল্লাহ তায়ালা (আহ্বানে তাঁহার) দরবারে উপস্থিত হইবে। আল্লাহ তায়ালা তাহাকে তাঁহার বিশেষ রহমতের বেষ্ঠানীর আড়ালে রাখিয়া তাহার গোনাহ সমূহের স্বীকারোক্তির পরীক্ষা লইবেন—আল্লাহ তায়ালা তাহাকে জিজ্ঞাসা করিবেন, অমুক গোনাহ

তোমার স্মরণ আছে কি? অমুক গোনাহ তোমার স্মরণ আছে কি? ঐ ব্যক্তি উত্তরে বলিতে থাকিবে, হাঁ—প্রভু! আমার এই অপরাধ হইয়াছে। আমার এই অপরাধ হইয়াছে। এইভাবে আল্লাহ তায়ালা তাহার গোনাহসমূহের স্বীকারোক্তি গ্রহণ করিবেন। ঐ ব্যক্তি মনে মনে তাহার বিপদ গণিবে, কিন্তু আল্লাহ তায়ালা তাহাকে বলিবেন, ছনিয়াতে আমি তোমার অপরাধ গোপন রাখিয়াছিলাম। আজিকার দিনেও আমি তোমার সব গোনাহ মাফ করিয়া দিলাম। অতঃপর (থাকিবে শুধু তাহার নেকের আমল-নামা,) তাহার নেকের আমল নামা ভাঁজ করিয়া তাহার হাতে দেওয়া হইবে। (এইভাবে আল্লাহ তায়ালা কেয়ামতে হিনাবের দিন মোমেনদের সম্পর্কে গোপনতা অবলম্বন করিয়া তাহাদিগকে অপমান হইতে রক্ষা করিবেন)। পক্ষান্তরে অপর দল তথা আল্লাজ্বোহীদের সকলের সম্মুখে দেখাইয়া দিয়া (নেক-বদের) সাক্ষ্যদাতা ফেরেশতাগণ উচ্চৈঃস্বরে বলিয়া বেড়াইবেন—

أُولَئِكَ الَّذِينَ كَذَبُوا عَلَىٰ رَبِّهِمْ - أَلَا لَعْنَةُ اللَّهِ عَلَى الظَّالِمِينَ

“এই লোকগুলি তাহাদের প্রভু-পরওয়ারদেগার সম্পর্কে মিথ্যা ও ভুল পথের পথিক ছিল। সকলে শুনিয়া রাখ, এই অনাচারী ও স্বেচ্ছাচারীদের উপর আল্লার লা'নত পতিত হইবে।” (ছুরা হুদ—১২ পারা ২ রুকু)

১২২। হাদীছ :—আবু মুছা আশ্শারী (রাঃ) বর্ণনা করিয়াছেন, হযরত রসূলুল্লাহ ছাল্লাল্লাহু আলাইহে অসাল্লাম বলিয়াছেন, আল্লাহ তায়ালা জালেম—অত্যাচারীকে (পরীক্ষার স্থল ছনিয়াতে) অবকাশ দিয়া থাকেন। কিন্তু যখন ধরেন এবং পাকড়াও করেন তখন আর ছাড়েন না। রসূলুল্লাহ (সঃ) তাহার এই উক্তির সমর্থনে কোরআন শরীফের এই আয়াত তেলাওয়াত করিলেন—

وَكَذَلِكَ أَخْذُ رَبِّكَ إِذَا أَخَذَ الْقُرْيُ وَهِيَ ظَالِمَةٌ إِنَّ أَخْذَهُ أَلِيمٌ شَدِيدٌ...

“(হযরত নূহের জাতি, হযরত হুদের জাতি, হযরত ছালেহের জাতি, হযরত লুতের জাতি, হযরত শোয়ায়েবের জাতি, হযরত মুছার জাতি—এই সব জাতির ধ্বংসের বিস্তারিত ইতিহাস বর্ণনা করিয়া আল্লাহ তায়ালা বলেন,) এইভাবেই তোমার প্রভু পাকড়াও করিয়া থাকেন যখন তিনি কোন স্বেচ্ছাচারী অনাচারী অঞ্চলবাসীকে পাকড়াও করেন। নিশ্চয় তাঁহার পাকড়াও অতিশয় ভয়ঙ্কর ও কঠোর। ইহাতে নছিত ও শিক্ষা রহিয়াছে। ঐ লোকদের জঘ যাহার আখেরাতের আজাবকে ভুয় করে।” (ছুরা হুদ—১০ পারা ৯ রুকু)

১৯২৮। হাদীছ :— আবুল্লাহ ইবনে আব্বাস (রাঃ) বর্ণনা করিয়াছেন, হযরত রসুলুল্লাহ ছালাল্লাহু আলাইহে অসাল্লাম যখন মক্কায় লুকাইয়া জেন্দেগী কাটিতে ছিলেন তখন তিনি ছাহাবীগণকে লইয়া জামাতে নামায পড়া কালে সজোরে কেবরাত পড়িয়া থাকিতেন। মোশরেকগণ উহা শুনিয়া কোরআনকে কোরআনের অবতরণকারীকে এবং কোরআনের বাহককে গালি দিত, তাই আল্লাহ তায়াল। এই আয়াত নাযেল করিলেন—

وَلَا تُجَاهِرُ بِمَلَانِكَ وَلَا تُخَافُتُ بِهَا وَابْتَغِ بَيْنَ ذَلِكَ سَبِيلًا -

“নামাযের কেবরাত অতি জোরেও পড়িবেন না, (যাহাতে কাফেরগণ উহা শুনিয়া কোরআনকে গালি দেয়।) একেবারে আস্তেও পড়িবেন না, (যাহাতে ছাহাবীগণ শুনিতে না পারে।) উভয়ের মধ্যবর্তী পন্থায় পড়িবেন।

১৯২৯। হাদীছ :—আয়েশা (রাঃ) বর্ণনা করিয়াছেন, وَلَا تُجَاهِرُ بِمَلَانِكَ وَلَا تُخَافُتُ بِهَا—দোয়া করার নিয়ম এই আয়াতের অন্তর্ভুক্ত।

১৯৩০। হাদীছ :—আবু হোরায়া(রাঃ) হইতে বর্ণিত আছে, হযরত রসুলুল্লাহ ছালাল্লাহু আলাইহে অসাল্লাম বলিয়াছেন, কেয়ামতের দিন এই শ্রেণীর অনেক লোক উপস্থিত হইবে যাহারা পার্থিব জীবনে মোটা মোটা দেহবিশিষ্ট বড় বড় পদবীধারী ছিল। কিন্তু আল্লাহ তায়ালার নিকট তাহাদের ওজন (ও মর্যাদা) মাছির ডানা সমতুল্যও হইবে না।

হযরত রসুলুল্লাহ (দঃ) তাঁহার এই উক্তি সমর্থনে পবিত্র কোরআনের এই আয়াতটি তেলাওয়াত করিলেন—
ذَلَا نَقْتُمُ لَهُمْ يَوْمَ الْقِيَامَةِ وَزَنَا -

ব্যাখ্যা :—আলোচ্য হাদীছের আয়াতটি ছুরা কাহাফের শেষ দিকের আয়াত। আয়াতের বর্ণনা হইল, পারলৌকিক জীবনে সর্ববাধিক ক্ষতিগ্রস্ত লোক তাহারা যাহাদের ইহকালীন উদম ও ভাল কাজসমূহ যদ্বারা তাহারা আত্মতুষ্টি ও লাভ করিয়া থাকিত—আখেরাতের সঙ্কটময় জীবনে তাহাদের ঐ সব কাজ ও আমল নিফল প্রতাপন হইবে। সেই লোকদের পরিচয় ও পরিণতি বর্ণনায় আল্লাহ তায়াল। বলেন—

أُولَٰئِكَ الَّذِينَ كَفَرُوا بِآيَاتِ رَبِّهِمْ وَلِقَائِهِ فَحَبِطَتْ أَعْمَالُهُمْ ذَلَا نَقْتُمُ لَهُمْ يَوْمَ الْقِيَامَةِ وَزَنَا - ذَلِكَ جَزَاءُ وَهُمْ جَهَنَّمَ بِمَا كَفَرُوا
وَأَتَّخَذُوا آيَاتِي وَرُسُلِي هُزُوًا -

“ঐ লোকগণ তাহারা—যাহারা স্বীয় পরওয়ারদেগারের নিদর্শন সমূহ তথা রসূল ও কোরআনকে অস্বীকার করে এবং পরওয়ারদেগারের নিকট হাজেরী তথা হিসাব-নিকাশের জন্ত তাঁহার সম্মুখে উপস্থিতিকে অস্বীকার করে, ফলে তাহাদের সমুদয় আমল নিষ্ফল সাব্যস্ত হইয়া রহিয়াছে। সুতরাং কেয়ামতের দিন তাহাদের এবং তাহাদের আমলের কোন ওজনই আমি দিব না। তাহাদের পরিণতি হইবে জাহান্নাম। এই কারণে যে, তাহারা আমার (কালামের) আয়াত সমূহকে এবং আমার রসূলগণকে উপেক্ষা ও উপহাস করিত।”

১৯৩১। হাদীছ :- আবু সায়ীদ খুদরী (রাঃ) বর্ণনা করিয়াছেন, হযরত নবী ছালাল্লাহু আলাইহে অসাল্লাম বলিয়াছেন, (চিরস্থায়ীরূপে) বেহেশতীগণ বেহেশতে এবং দোযখীগণ দোযখে যাওয়ার পর মৃত্যুকে একটি সাদা-কালো চিত্রাঙ্গ ভেড়ার আকৃতিতে (বেহেশত-দোযখের মধ্যস্থলে) উপস্থিত করা হইবে এবং একজন ফেরেশতা ডাকিবেন—হে বেহেশতবাসীগণ! তখন সকল বেহেশতবাসী সেই দিকে তাকাইবেন। তাহাদিগকে জিজ্ঞাসা করা হইবে, ইহাকে চিনিতে পারিয়াছেন কি? তাহারা সকলেই বলিবেন, হাঁ—ইহা মৃত্যু। এইরূপে দোযখীদেরকেও ডাকিয়া জিজ্ঞাসা করা হইবে। তাহারাও ঐ উত্তরই দিবে। অতঃপর সকলের চোখের সামনে উহাকে জবাহু করা হইবে এবং ঘোষণা করা হইবে—হে বেহেশতবাসীগণ! তোমরা অনন্তকাল বেহেশতের সুখ ভোগ করিতে থাকিবে, মৃত্যু আসিবে না। হে দোযখবাসী! তোমরা চিরকাল দোযখে আজাব ভোগ করিতে থাকিবে আর মৃত্যু আসিবে না। এই ঘোষণায় বেহেশতীদের আনন্দ উল্লাস বাড়িয়া যাইবে। পক্ষান্তরে দোযখীদের দুঃখ-ভাবনা ও আক্ষেপ-অনুতাপ অধিক বাড়িয়া যাইবে। এই বিবরণ দান উপলক্ষে হযরত (দঃ) এই আয়াতটি তেলাওয়াত করিলেন—

وَأَذِّنْ لَهُمْ يَوْمَ الْحَسْرَةِ إِذْ قُضِيَ الْأَمْرُ وَهُمْ فِي غَفْلَةٍ وَهُمْ لَا يُؤْمِنُونَ

“আপনি লোকদিগকে সতর্ক করুন—আক্ষেপ ও অনুতাপের দিন সম্পর্কে যে দিন চিরস্থায়ী শেষ ফয়ছালা করিয়া দেওয়া হইবে। তাহারা (আজ এই কার্য ক্ষেত্রে) অবহেলায় বিভোর রহিয়াছে এবং ঈমান গ্রহণ করিতেছে না। (সেই দিন ইহার পরিণাম ভোগ করিবে।)” (ছুরা মরযাম—১৬ পারা)

আলোচ্য হাদীছে বর্ণিত দোযখীদের অসীম আক্ষেপ-অনুতাপের ঘটনা সম্বলিত কেয়ামতের দিনকেই উক্ত আয়াতে উদ্দেশ্য করা হইয়াছে।

১৯-২। হাদীছ :- আবুল্লাহ ইবনে আব্বাস (রাঃ) বর্ণনা করিয়াছেন, কোন কোন মানুষ এরূপ ছিল যে, (ইসলাম গ্রহণ করিয়া হযরত রসূলুল্লাহ (দঃ)

নিকট) মদীনায় আশিয়া পড়িত। অতঃপর যদি দেখিত, তাহার স্ত্রী ছেলে সন্তান জন্ম দিয়াছে, ঘোড়া (ইত্যাদি পশু) বাচ্চা দিয়াছে (অর্থাৎ যদি জাগতিক উন্নতি দেখিত) তবে বলিত, ইসলাম ধর্ম খুব ভাল ধর্ম। আর যদি ঐ সব না দেখিত তবে বলিত ইসলাম ধর্ম ভাল ধর্ম নয়। তাহাদের ভয়াবহ পরিণতির ইঙ্গিত দান করিয়াই এই আয়াত নাযেল হয়—

وَمِنَ النَّاسِ مَن يَّعْبُدُ اللَّهَ عَلَىٰ حَرْفٍ - نَّانِ أَسَابِقَهُ خَيْرٌ نَّاطِمَانَ
بِهِ - وَإِنِ أَسَابِقُهُ فَتَذَكَّةٌ نَّانِ أَتَقَلَّبَ عَلَىٰ وَجْهِهِ - خَسِرَ الدُّنْيَا
وَالْآخِرَةَ - ذَلِكَ هُوَ الْخُسْرَانِ الْمُبِينِ -

“এক শ্রেণীর লোক এরূপ যে, তাহারা আল্লার বন্দেগী (যথা ইসলাম অবলম্বন) করে এইরূপে যেন সে (নৌকা ইত্যাদিতে আরোহণ করিয়াছে, কিন্তু দীর্ঘ সময় উহাতে অবস্থানের নিয়তে আসে নাই বলিয়া ভিতরে বসে না,) কিনারায় দাঁড়াইয়া আছে (—যে কোন মুহূর্তে উহা ত্যাগ করার জন্ম প্রস্তুত থাকে)। যদি উহাতে স্মযোগ-সুবিধা ও লাভ দেখিতে পায় তবে (সেই স্বার্থের জন্ম) উহাতে অবিচল থাকিবে। আর কোন পরীক্ষার সম্মুখীন হইলে (তথা কোন ক্ষয়-ক্ষতি বা দুঃখ-দুর্দশা দেখিলেই) উহা হইতে মুখ ফিরাইয়া লইবে। এই শ্রেণীর লোকগণ ছনিয়া-আখেরাত উভয়ই হারায় এবং ইহা হইতেছে পূর্ণ ক্ষতি।” (১৭ পারা ৯ রুকু)

১৯৩৩। হাদীছ :— ছফিয়া-বিন্তে-শায়বাহ (রাঃ) বর্ণনা করিয়াছেন, আয়েশা (রাঃ) বলিয়া থাকিতেন, পবিত্র কোরআনে আছে—

وَلِيْفِرِّبْنَ بِبِخْرِهِنَّ عَلَىٰ جِبُوْبِهِنَّ

“স্ত্রী লোকদের অবশ্য কর্তব্য, (গায়ের জামা দ্বারা বুক ঢাকা থাকা সত্ত্বেও ঐ অংশের বিশেষ পর্দার জন্ম) মাথার ওড়না দ্বারা বুক দোহুরারূপে ঢাকিয়া রাখিবে, (যেন উহার আকার আকৃতিও ভাদিয়া না থাকে।) (১৮ পারা ১০ রুকু)

এই আয়াতটি নাযেল হওয়ার সঙ্গে সঙ্গে মোসলমান রমণীগণের মধ্যে—যাহাদের ওড়নার ব্যবহার ছিল না তাহারা তাহাদের চাদরের এক পার্শ্ব ছিড়িয়া-ফাড়িয়া ওড়না তৈরী করতঃ উহা দ্বারা মাথা ঢাকিল এবং বুকের উপর দোহুরা পর্দাও করিল।

১৯৩৪। হাদীছ :—ছাহাবী আনাছ (রাঃ) বর্ণনা করিয়াছেন, পবিত্র কোরআনের আয়াত—

الَّذِينَ يُحْشَرُونَ عَلَىٰ وُجُوْهِهِمْ إِلَىٰ جَهَنَّمَ -

“(কেয়ামতের দিন ঈমানহীন লোকদের অবস্থা এই হইবে যে,) তাহাদিগকে জাহান্নামের দিকে পরিচালিত করা হইবে তাহাদের মুখের উপর।” (১৯ পারা ১ কঃ)

এক ব্যক্তি উক্ত আয়াতের মর্ম সম্পর্কে জিজ্ঞাসা করিল—হে আল্লাহ নবী ! কাফেরকে কেয়ামতের দিন মুখের উপর তাড়াইয়া নেওয়া হইবে কিরূপে ? হযরত নবী (দঃ) উত্তরে বলিলেন, আল্লাহ ছনিয়াতে মানুষকে ছুই পায়ের উপর চালাইতেছেন। তিনি কি কেয়ামতের দিন মুখের উপর চালাইতে সক্ষম হইবেন না ? এই ব্যক্তি বলিল, নিশ্চয়, নিশ্চয়—আমাদের প্রভুর শক্তিমত্তার শপথ করিয়া স্বীকার করিতেছি, নিশ্চয় পারিবেন।

১৯৩৫। **হাদীছ :**—আবদুল্লাহ ইবনে ওমর (রাঃ) বর্ণনা করিয়াছেন, হযরত রসূলুল্লাহ ছাল্লাল্লাহু আলাইহে অসাল্লামের পালক পুত্র যায়েদ-ইবনে-হারেসা (রাঃ)কে আমরা সকলেই যায়েদ-ইবনে-মোহাম্মদ—মোহাম্মদের পুত্র বলিয়া থাকিতাম, যাবৎ না এই আয়াত নাযেল হইল..... **وَأَبْوَؤُا لِلْبَنَاتِ**।

ব্যাখ্যা :—আরব দেশে পালক পুত্রকে পালনকারী পিতার পুত্র নামে আখ্যায়িত করা হইত। এই আখ্যায় উপর নির্ভর করিয়া কতকগুলি কুপ্রথাও তাহাদের মধ্যে প্রতিপালিত হইত—পালনকারীর স্ত্রী ও ছেলে-মেয়ের সঙ্গে এই পালক পুত্রের সমুদয় আচার ব্যবহার পুরাপুরিভাবে প্রকৃত মা ও ভাই-বোনদের গায় হইয়া থাকিত। তাহাকে কোন স্তরেই বেগানা পুরুষ গণ্য করা হইত না। উত্তরাধীকার সম্পর্কেও তাহারা প্রকৃত পিতা-পুত্ররূপে গণ্য করিত। পালক পুত্র-বধূকে পালনকারী পিতার পক্ষে সম্পূর্ণরূপে পুত্র-বধূ গণ্য করা হইত। ফলে এক দিকে পুত্র-বধুর জন্ম এই পিতাকে বেগানা পুরুষ গণ্য করা হইত না। অপর দিকে এই পুত্র-বধূকে পালনকারী পিতার জন্ম প্রকৃত পুত্র-বধূর গায় চির-হারাম গণ্য করা হইত—পুত্রের বিবাহ মুক্ত হওয়ার পরও এই পিতার সঙ্গে বিবাহ অবৈধ মনে করা হইত। উল্লেখিত কুপ্রথাসমূহ ইসলামে রহিত করার ব্যবস্থা অবশ্যই করিতে হইবে এবং এইরূপ কঠোর ভাবে প্রতিপালিত ও প্রচলিত প্রথা কার্যতঃ ভঙ্গ করিয়া না দেখাইলে শুধু কথায় ভঙ্গ হইবে না।

স্বয়ং হযরত রসূলুল্লাহ ছাল্লাল্লাহু আলাইহে অসাল্লামের সম্মুখে একটা স্মরণ আসিল—তাঁহার পালক পুত্র যায়েদ রাজিয়াল্লাহু তায়ালা আনহুর স্ত্রী ছিলেন জয়নব (রাঃ)। তাঁহাদের মধ্যে বিবাহ-বিচ্ছেদ ঘটিল। এই উপলক্ষে স্বয়ং হযরত (দঃ) পালক পুত্র-বধূ জয়নবকে বিবাহ করিয়া এই সব কুপ্রথার মূল উচ্ছেদের একটা স্মরণ দেখিলেন এবং সেই বিবাহ করা মনে মনে স্থির করিলেন, কিন্তু তিনি লোক-মুখে কুৎসারটনার ভয় করিতে ছিলেন। এমতাবস্থায় আল্লাহ তায়ালায় তরফ হইতে উক্ত বিবাহ

কার্য সমাধা করিয়া ফেলার ইঙ্গিত আদিল। এমনকি, কাহারও মতে অহি মারকৎ আল্লাহ তায়ালাই বিবাহ সম্পন্ন করিয়া দিলেন। পরিণামে তাহাই ঘটিল যাহার আশঙ্কা হযরত (দঃ) করিতে ছিলেন। পুত্র-বধু বিবাহ করার বদনামীর ঝড় বহিতে লাগিল। শুধু তাহাই নহে, বরং নানারকম অমূলক নোংরা আকথা কুকথাও মন-গড়ারূপে জড়িত হইয়া গেল। যাহা আজও শত্রুদের লেখায় দেখিতে পাওয়া যায়।

এই সব ঝড়-তুফান প্রতিরোধ করলে পবিত্র কোরআনের আয়াত নাযেল

হইল। প্রথমতঃ যুক্তি দেখান হইল—
 مَا جَعَلَ آدَاءَ آبَاءِكُمْ أَبْنَاءِكُمْ

“তোমাদের মুখ-বলা পুত্রগণকে ত সৃষ্টিকর্তা আল্লাহ তায়ালা পুত্র বানান নাই। সূত্রাং বিধি-বিধানে সে পুত্র বলিয়া কেন গণ্য হইবে? অতঃপর ঐ সব কুপ্রথার মূলোচ্ছেদ করলে ঘোষণা দিলেন—

أَدْعُوهُمْ لَا بَأْسَ لَهُمْ وَهُوَ أَقْسَطُ عِنْدَ اللَّهِ فَإِنْ لَمْ تَعْلَمُوا آبَاءَهُمْ
 فَاِذَا خَوَّانُكُمْ فِي الدِّينِ وَمَوَالِيكُمْ

“মুখ-বলা পালক পুত্রগণকে তাহাদের প্রকৃত পিতার সম্বন্ধ উল্লেখ করিয়া ডাক, বস্তুতঃ ইহাই সত্য কথা। যদি প্রকৃত পিতার সম্বন্ধ না করিতে পার (তবুও পালনকারী পিতার সম্বন্ধ জড়াইয়া ডাকিও না, কারণ) ঐ পুত্র ত পালনকারীর জন্ত বস্তুতঃ একজন মোসলমান ভাই বা ক্রীতদাস (ইত্যাদি)।”

মছআলাহ : - শুধু মুখে মুখে কাহাকেও ছেলে বলা হইলে তাহা গোনার কাজ হইবে না বটে, কিন্তু লক্ষ্য রাখিতে হইবে, ঐ ডাকের অছিলায় বেপর্দা ও বেগানার সঙ্গে মেলামেশার গোড়া-পত্তন যেন না হইয়া বসে। যদি এইরূপ আশঙ্কা বা প্রচলন থাকে তবে ঐরূপ ডাকই নিষিদ্ধ হইবে।

১৯৩৬। হাদীছ :—আনাছ (রাঃ) বর্ণনা করিয়াছেন, যাদেদ ইবনে হারেছার পরিত্যক্ত স্ত্রী জয়নব রাজিয়াল্লাহ তায়ালা আনহার সম্পর্কেই হযরত রসূলুল্লাহ (দঃ)কে সম্বোধন করিয়া এই আয়াত নাযেল হইয়াছে—
 تُخْفِي فِي نَفْسِكَ مَا اللَّهُ مُبْدِيهِ

“(অনৈসলামিক কুপ্রথার মূলোচ্ছেদ উদ্দেশ্যে জয়নবকে বিবাহ করার) সেই পরিকল্পনা আপনি গোপন ভাবে মনে মনে পোষন করিতে ছিলেন, যাহার বিকাশ আরাহ তায়ালাই স্থির করিয়া রাখিয়া ছিলেন।” (ছুরা আহজাব—২২ পারা ২ রুকু)

ব্যাখ্যা :—জয়নব (রাঃ) যিনি হযরত রসূলুল্লাহ (দঃ) ফুফুজাদ ভগ্নী ছিলেন। তাঁহার বিবাহ হইয়াছিল যাদেদ ইবনে হারেছা (রাঃ)-এর সঙ্গে। তিনি হযরতেরই

পালক পুত্র ছিলেন। এই বিবাহে হযরত (দঃ) মস্ত বড় একটা দায়িত্বের বোঝা কাঁধে লইয়াছিলেন। জয়নব (রাঃ) ছিলেন কোরায়েশ বংশীয়া এবং য়ায়েদ (রাঃ) তৎকালীন প্রথা অনুযায়ী ক্রীতদাস ছিলেন। তাই বংশের সকল লোকই এই বিবাহে অসম্মত ছিল। একা হযরত (দঃ) এই বিবাহে উত্তোগী ছিলেন। আর সকলেই এই ব্যাপারে তাঁহার বিরোধী ছিল। কিন্তু মোসলমানদের উপর রসুলের যে মর্যাদা ও হক সুরক্ষিত আছে উহার দ্বারা এই বিরোধও কোরআনের স্পষ্ট ঘোষণায় অবৈধ বলিয়া বিঘোষিত হইল—

مَا كَانَ لِمُؤْمِنٍ وَلَا لِمُؤْمِنَةٍ إِذَا قَضَى اللَّهُ وَرَسُولُهُ أَمْرًا أَنْ يَكُونَ لَهُمُ الْخِيَرَةُ مِنْ أَمْرِهِمْ - وَمَنْ يَعْصِ اللَّهَ وَرَسُولَهُ فَقَدْ ضَلَّ ضَلَالًا مُبِينًا

“আল্লাহ এবং আল্লাহর রসুল কোন বিষয়ে আদেশ প্রয়োগ করিলে অতঃপর কোন ঈমানদার পুরুষ বা নারীর পক্ষে ঐ বিষয় সম্পর্কে মতবিরোধ করিবার কোন অবকাশই থাকে না। যে কেহ আল্লাহ এবং আল্লাহর রসুলের নাকরমানী করিবে অবশ্যই সে সম্পূর্ণরূপে ভ্রষ্টতায় পতিত বলিয়া সাব্যস্ত হইবে।” (২২ পারা ২ রুকু)

এই ঘোষণার পরিপ্রেক্ষিত সকলেই বিরোধিতা ত্যাগ করিলেন এবং হযরত (দঃ) বিবাহ কার্য সম্পন্ন করিয়া দিলেন। ভাগ্যের পরিহাস—য়ায়েদ (রাঃ) এবং জয়নব (রাঃ) তাঁহাদের মধ্যে মিল-মহবৎ মোটেই হইল না। বাধ্য হইয়া য়ায়েদ (রাঃ) অচিরেই জয়নব (রাঃ)কে ত্যাগ করার ইচ্ছা করিলেন। কিন্তু হযরত (দঃ) তাহাকে বুঝ-প্রবোধ দিয়া স্ত্রীকে বহাল রাখার পরামর্শ দিতে ছিলেন। উপস্থিত অবস্থা দৃষ্টে হযরত (দঃ) তাহাদের বিবাহ বিচ্ছেদ অবশ্যজ্ঞাবী দেখিলেন। তিনি এই বিবাহের গোড়ার ঘটনা স্মরণ করিলেন স্বাভাবিক ভাবেই এক্ষেত্রে নিজ দায়িত্বের দরুণ জয়নব (রাঃ) এবং তাঁহার সহোদরগণের মনঃহুঃখের প্রতিকার করার ভাবনা তাঁহার (হযরত) সম্মুখে দাঁড়াইল। সেই মুহূর্তে হযরত (দঃ) মনে মনে একটা খেয়াল করিলেন—বিবাহ বিচ্ছেদ যখন হইয়াই যাইবে তখন জয়নবকে স্বয়ং হযরত (দঃ) নিজ বিবাহ বন্ধনে আনিয়া তাঁহাকে উম্মুল-মোমেনীন পদে ভূষিত করিবেন। এই অসাধারণ সম্মান লাভে জয়নব (রাঃ) এবং তাঁহার আত্মীয়বর্গের যাবতীয় মনঃহুঃখ বিদূরিত হইয়া যাইবে। কিন্তু য়ায়েদ (রাঃ) যেহেতু হযরতের পালক পুত্র ছিলেন। তাই এই ব্যবস্থা গ্রহণে হযরত (দঃ) লোকদের কুৎসার ভয় করিতে ছিলেন যে, তাহারা বলিবে, মোহাম্মদ (দঃ) পুত্র-বধুকে বিবাহ করিয়াছে।

এদিকে উক্ত ব্যবস্থা গ্রহণ করা অল্প আর একটি দিক দিয়া হযরতেরও অভিপ্রেত ছিল, আল্লাহ তায়ালার নিকটও বিশেষ পছন্দনীয় ছিল। আরবের কুসংস্কার—

পালক পুত্রের বধুকে আপন পুত্রের বধু গণ্য করা ; ইসলামে ঐরূপ গহিত নীতির স্থান নাই। তাই উহাকে কঠোর হস্তে চুরমার করিতে হইবে। ইহার জন্ত স্বয়ং রসূল মারফৎ কার্য্যতঃ ঐ কুসংস্কার ধ্বংসের আরম্ভ অত্যন্ত সমীচীন ও বিশেষ পছন্দনীয় ছিল, তাই আল্লাহর তরফ হইতে হযরতের প্রতি আদেশ হইল জয়নবকে বিবাহ করিয়া স্বীয় গোপন মনোভাবকে কার্য্যে পরিণত করার। এমনকি, যায়েদের সঙ্গে-জয়নবের বিবাহ বিচ্ছেদ ঘটবার পর স্বয়ং আল্লাহ তায়ালা নিজ ব্যবস্থাপনায় হযরতের সঙ্গে জয়নবের বিবাহ কার্য্য সম্পন্ন করিয়া অহী মারফৎ বিবাহের খবর দিয়া দিলেন। হাদীছে বর্ণিত আছে—জয়নব (রাঃ) হযরতের অগ্ণাণ বিবিগণের উপর এই বলিয়া গর্ব করিতেন, তোমাদের বিবাহ-কার্য্য তোমাদের অলী-ওয়ারিস মুরবিগণ সম্পন্ন করিয়াছেন, আর আমার বিবাহ আল্লাহ তায়ালা আসমানের উপরে (ফেরেশতাদের মহফিলে) সম্পন্ন করিয়াছেন।

উল্লেখিত ঘটনা সমূহের সংক্ষিপ্ত বিবরণে পবিত্র কোরআনের আয়াতও বিজ্ঞমান রহিয়াছে, বক্ষ্যমান হাদীছের আয়াতটি উহারই অন্তর্গত—

وَإِذْ تَقُولُ لِلَّذِي أَنْعَمَ اللَّهُ عَلَيْهِ... وَكَانَ أَمْرُ اللَّهِ مَفْعُولًا

অর্থাৎ—“আপনি আপনার উপকারে ও সাহায্য-সহায়তায় প্রতি পালিত যায়েদকে পরামর্শ দিতে ছিলেন, তুমি তোমার স্ত্রীকে বহাল রাখ, আল্লাহকে ভয় কর। ঐ অবস্থায় আপনি মনের ভিতরে একটা বিষয় গোপন রাখিতে ছিলেন যাহা আল্লাহ পাক প্রকাশ করিয়া দিবেন। আপনি লোকদের ভয় করিতেছিলেন, অথচ একমাত্র আল্লাহ তায়ালাকে ভয় করাই শ্রেয়ঃ। তারপর জয়নব হইতে যায়েদের সম্পর্ক সমাপ্তি হইয়া গেলে আমি জয়নবকে আপনার বিবাহ বন্ধনে আবদ্ধ করিয়া দিলাম—এই উদ্দেশ্য যে, মুখ-বলা ছেলেদের স্ত্রীদিগকে তাহাদের বিবাহ বিচ্ছেদের পর ঐ ছেলেদের পালনকারী কর্তৃক বিবাহ করার ব্যাপারে অন্ধকার যুগের প্রথার যে, প্রতিবন্ধক রহিয়াছে মোমেনদের পক্ষে যেন সেই প্রতিবন্ধক আর না থাকে। এবং ঐ বধুকে মাহরাম গণ্য করার যে সব হারাম ও নাজায়েয ফল ফলিয়া থাকে ঐ সবার মূলোচ্ছেদ হইয়া যায়। আল্লাহ কর্তৃক এই বিধান জারী হওয়া পূর্ব হইতেই নির্ধারিত ছিল।”

বিশেষ দ্রষ্টব্য :—আলোচ্য হাদীছে উল্লেখিত আয়াতে যে বলা হইয়াছে— “আপনি দিলের মধ্যে একটা বিষয় গোপন রাখিতে ছিলেন, ইহার প্রকৃত তফছীর পাঠকবর্গের সমক্ষে বর্ণনা করিয়া দেওয়া হইল। বিশিষ্ট তফছীরকারকগণও এই তফছীরই লিখিয়াছেন। এই আয়াতের ব্যাখ্যায় কোন কোন তথাকথিত তফছীরকারের লেখায় কতকগুলি অবাঞ্ছিত কথারও সমাবেশ দৃষ্টি গোচর হয় ;

বস্তুতঃ উহা ইসলামের শত্রুদের গড়ান কাহিনী মাত্র, যাহা কোন কোন মোসলমানও নকল করিয়াছে। ঐ গুলি মিথ্যা ও ভিত্তিহীন আপবাদ মাত্র।

১৯৩৭। হাদীছ :- * সায়ীদ ইবনে জোবায়ের (রঃ) বর্ণনা করিয়াছেন, আবছুর রহমান ইবনে আব্বা (রঃ) আমাকে বলিলেন, তুমি আবছুল্লাহ ইবনে আব্বাস (রাঃ)কে এই আয়াত দুইটি সম্পর্কে জিজ্ঞাসা কর—

وَلَا يَقْتُلُونَ النَّفْسَ الَّتِي حَرَّمَ اللَّهُ إِلَّا بِالْحَقِّ وَلَا يَزْنُونَ... (১)

إِلَّا مِنْ تَابٍ وَآمِنٍ وَعَمِلَ مَالِحًا فَأُولَٰئِكَ.....

“আখেরাতে নাজাত পাইবার শর্ত স্বরূপ কতিপয় গুণের উল্লেখ করতঃ বলা হইয়াছে—) এবং যাহারা এমন কোন নরহত্যা করে না যাহা না-হক এবং আল্লাহ কর্তৃক হারাম করা হইয়াছে। (অতঃপর বলা হইয়াছে—) অবশ্য যাহারা তওবাকরিবে, ঈমান আনিবে এবং নেক আমল করিবে, তাহাদের জন্য আল্লাহ তায়ালা তাহাদের পূর্ব কৃত গোনাহগুলি মাফ করিয়া দিয়া উহার স্থলে (নামায়ে-আমলের মধ্যে) নেক আমল সমূহ লিখিয়া দিবেন; আল্লাহ অতিশয় দয়ালু ক্ষমাশীল।, (১৯ পারা ৪ রুকু) এই আয়াতের মর্মে বুঝা যায়, অবৈধ খুন বা নরহত্যাকারীর জন্তুও তওবা করার এবং তওবা দ্বারা ঐ গোনাহ মাফ হওয়ার সুযোগ আছে।

وَمَنْ يَتَّقِ اللَّهَ مَجْرِمًا فَجَزَاءُ مَا كَفَرْنَا بِهِ... [২]

“যে ব্যক্তি কোন ঈমানদার মোসলমান মানুষকে ইচ্ছাকৃত হত্যা করিবে তাহার প্রতিফল ইহাই হইবে—সে চিরকালের জন্তু জাহান্নামের আজাব ভোগ করিবে এবং তাহার উপর আল্লার গজব ও অভিশাপ পতিত হইবে। আল্লাহ তায়ালা তাহার জন্তু ভীষণ আজাব প্রস্তুত রাখিয়াছেন!” (ছুরা নেছা—৫ পারা ১০ রুকু)

এই আয়াতের মর্মে বুঝা যায়, মোমেন মোসলমানকে হত্যাকারীর জন্তু তওবা করিয়া গোনাহ মাফ করাইবার সুযোগ নাই। নতুবা চিরকাল দোষখ বাসের শাস্তি নির্ধারিত হইবে কেন?

সায়ীদ (রঃ) বলেন, আমি উক্ত আয়াতদ্বয় সম্পর্কে আবছুল্লাহ ইবনে আব্বাস (রাঃ)কে জিজ্ঞাসা করিলে তিনি বলিলেন, আয়াত দুইটি ভিন্ন ভিন্ন ক্ষেত্রের উদ্দেশ্যে। ছুরা ফোরকানের মধ্যে আল্লাহ তায়ালা আখেরাতের নাজাতের জন্তু

* এই হাদীছটি ৫৪৪ পৃষ্ঠায় এবং ৭১০ পৃষ্ঠায় উল্লেখ হইয়াছে, উভয় স্থানের রেওয়াজেই দৃষ্টে ত্বরজমা করা হইল।

আল্লাহ ভিন্ন অণু কাহারও পূজা না করা, ব্যভিচারে লিপ্ত না হওয়া, নরহত্যা না করা ইত্যাদির শর্ত আরোপ করিলে মক্কাবাসী কতিপয় মোশরেক কাফের রসুলুল্লাহ ছালাল্লাহু আলাইহে অসাল্লামের নিকট উপস্থিত হইয়া বলিল, আপনি যেই দ্বীন ও ধর্মের প্রতি আহ্বান করেন তাহা খুবই ভাল। কিন্তু উহা দ্বারা আমরা ত নাজাত পাইতে পারিব না যেহেতু আমরা আল্লাহ ভিন্ন অণুর পূজা করিয়াছি, ব্যভিচার করিয়াছি, নরহত্যা করিয়াছি। এই শ্রেণীর লোকদের কথার উত্তরে আল্লাহ তায়ালা উক্ত ছুরা ফোরকানের মূল বিষয়-বস্তুটির সহিত এই কথাটি সংযোগ করিয়া দিলেন যে—“অবশ্য যাহারা তওবা করিবে……”। সুতরাং এই ছুরা ফোরকানের আয়াত ঐ লোকদের পক্ষে যাহারা অমোসলেম থাকাবস্থায় নরহত্যা ইত্যাদি করিয়াছিল পরে তাহারা তওবা করতঃ ঈমান ও ইসলাম গ্রহণ করিয়াছে। এই শ্রেণীর লোকদের পূর্বকৃত নরহত্যা ইত্যাদি গোনাহ মাফ হইয়া যাইবে। এই শ্রেণীর লোকদের ইসলামের প্রতি আকৃষ্ট করণার্থে তাহাদের জন্ত উদারতা ঘোষণা পূর্বক আল্লাহ তায়ালা আরও বলিয়াছেন—

قُلْ يٰٓعِبَادِىَ الَّذِيْنَ اَسْرَفُوْا عَلٰى اٰذْنٰهُمْ لَا تَقْنَطُوْا مِنْ رَّحْمَةِ اللّٰهِ...

“হে মোহাম্মদ (ঃ)। আপনি লোকদিগকে জানাইয়া দিন, আমি ঘোষণা দিতেছি—হে আমার ঐ সকল বান্দাগণ! যাহারা গোনাহ করিয়া নিজেদের উপর অত্যাচার করিয়াছে—তোমরা আল্লার রহমত হইতে নিরাশ হইও না; (তোমরা ইসলাম গ্রহণ করিলে) নিশ্চয় আল্লাহ তায়ালা তোমাদের (পূর্বকৃত) সমুদয় গোনাহ মাফ করিয়া দিবেন। (ছুরা যুম্মার—২৪ পারা ৩ রুকু)

পক্ষান্তরে ছুরা নেছার আয়াত তথা নরহত্যার দায়ে চিরকাল দোষথ বাসের শাস্তি ঐ লোকদের পক্ষে যাহারা মোসলমান এবং ইসলামের বিধান অবগত হওয়া সত্ত্বেও নরহত্যা করিয়াছে। তাহাদের সম্পর্কে ছুরা নেছার আয়াতের ঘোষণা যে—“তাহারা চিরকাল দোষথের শাস্তি ভোগ করিবে।”

বিশিষ্ট তাবেয়ী মোজাহেদ (ঃ) বলিয়াছেন ছুরা নেছায় বর্ণিত শাস্তি মোসলমান-হত্যা অপরাধের সমূচিত শাস্তির মূল ধারারূপে উল্লেখ হইয়াছে—শুধুমাত্র অপরাধটির কঠোরতা প্রকাশ করার জন্ত। নতুবা এ স্থলে আর একটি উপধারাও আছে যাহার ফলে শরিয়ত নির্দ্ধারিত বিশেষ নিয়মে খাঁচী তওবা করিলে এই ক্ষেত্রেও দোষথের চিরস্থায়ী আজাব হইতে মুক্তির পথ রহিয়াছে।

১৯৩৮। হাদীছ :—আবুল্লাহ ইবনে মসউদ (রাঃ) বর্ণনা করিয়াছেন, একদা ইহুদীদের এক বড় পণ্ডিত হযরত রসুলুল্লাহ ছালাল্লাহু আলাইহে অসাল্লাম সমীপে

আসিয়া বলিল, আমরা তৌরাত কেতাবে দেখিতে পাই, কেয়ামতের দিন আল্লাহ তায়ালা সমুদয় আসমানগুলিকে এক আঙ্গুলের উপর, ভূমণ্ডলের স্থল ভাগকে এক আঙ্গুলের উপর, পাহাড়-পর্বত ও বৃক্ষরাজি এক আঙ্গুলের উপর, পানি ও কাঁদা তথা ভূমণ্ডলের জল ভাগকে এক আঙ্গুলের উপর এবং অশ্ব সব সৃষ্টকে এক আঙ্গুলের উপর রাখিবেন; অতঃপর (এই সবগুলির সমষ্টিও যে আল্লাহ তায়ালা শক্তি ও ক্ষমতার সম্মুখে অতি নগণ্য তাহা প্রকাশকরণার্থে ঐ বহনকারী) আঙ্গুল সমূহকে নাড়াচাড়া ও আন্দোলিত করতঃ বসিতে থাকিবেন, আমিই সর্ব্বাধিপতি আমিই সর্ব্বাধিপতি। *

ইহুদী পণ্ডিতের উক্তি সমর্থন করার ভঙ্গিতে হযরত (দঃ) হাদিয়া উঠিলেন এবং (ইহুদীগণ আল্লাহ তায়ালা মহত্ত্ব জানিয়া শুনিয়াও আল্লাহ সম্পর্কে অবাস্তিত উক্তি করিয়া থাকে—তাহারা ওষায়ের নবীকে আল্লাহর পুত্র বলিয়া থাকে। আল্লাহর রসূলকে অমান্য করিয়া চলে ইত্যাদি ইত্যাদি। রসূলুল্লাহ (দঃ) এই সবে উপর তাহাদের প্রতি তিরস্কার স্বরূপ) এই আয়াত তেলাওয়াত করিলেন—

وَمَا قَدَرُوا اللَّهَ حَقَّ قَدْرِهِ

“আল্লাহ তায়ালা মহত্ত্বের যেকোন মূল্য দান করা আবশ্যিক কাফেরগণ ও মোশরেকগণ সেইরূপ মূল্য দিয়া চলে না।”

ব্যাখ্যা : ছনিয়ার জিন্দেগীতে অসংখ্য মানুষ বিভিন্ন বস্তুর বিশেষ শক্তি বা বিরাত্ব ইত্যাদির প্রভাবে প্রভাবান্বিত হইয়া আল্লাহকে ছাড়িয়া সেই সব বস্তুর পূজায় লিপ্ত হয়। কেয়ামতের দিন—যে দিন ছনিয়ার প্রথম হইতে শেষ পর্যন্ত সমস্ত মানুষ এক ময়দানে একত্রিত থাকিবে সেই দিন আল্লাহ তায়ালা ঐ সব বস্তু-পূজারীদের অন্তায়টা প্রত্যক্ষভাবে দেখাইবার ও ধরাইয়া দিবার জন্ত এই ব্যবস্থা করিবেন যে, ছোট, বড়, ও বৃহত্তম—যাবতীয় সৃষ্ট বস্তু তাঁহার অধীনে ও সর্ব্বাধিপত্বে হওয়ার দৃশ্য সর্ব্ব সমক্ষে স্পষ্টরূপে প্রকটিত ও রূপায়িত করিবেন এবং ঐ শ্রেণীর লোকদের প্রতি কটাক্ষ করিয়া বলিবেন, আজ চাক্ষুসরূপে দেখিয়া নেও সর্ব্বাধিপতি, সর্ব্বশক্তির অধিকারী, সর্ব্ব শ্রেষ্ঠ ও সর্ব্বমহান একমাত্র আমি। কিন্তু তোমরা আমাকে ছাড়িয়া আমার নিম্নস্থ, আমার অধীকারস্থ, আমার আধিপত্যের বস্তুকে পূজা করিয়াছিলে; তাহার শাস্তি আজ তোমাদিগকে ভোগ করিতে হইবে।

* হাদীছটি বোখারী শরীফে তিন স্থানে উল্লেখ হইয়াছে, এতদ্বিন ফংহলবারী ১৩—৩৩৮ × ৩৩৯ পৃষ্ঠায় বর্ণিত তথ্যাদি দৃষ্টে তরজমা করা হইল।

কেয়ামতের দিন আল্লাহ তায়ালা প্রত্যেককেই তাহার অগ্নায় অপরাধ ধরাইয়া দিয়া শাস্তি দান করিবেন।

বিশেষ দ্রষ্টব্য :—আল্লাহ তায়ালা নিরাকার নিরাধার ইহার প্রতি অটল অনড় বিশ্বাস ও আক্দিদা সর্বদার জগ্ন অন্তরে নিবন্ধ রাখিয়া বিভিন্ন হাদীছে উল্লেখিত হাত, পা, আঙ্গুল ইত্যাদি সম্পর্কে এই ধারণা রাখিবে যে, আমাদের স্থূল ও সাকারে সীমাবদ্ধ জ্ঞান ও অনুভূতির খাতিরে এই সব শব্দ ব্যবহার করা হইয়াছে। এই সবেব উদ্দেশ্য আমাদের দৃষ্ট ও অনুভূত অঙ্গ সমূহ কখনও নহে। এই সব অঙ্গ ত সাকার ও স্থূল দেহের বৈশিষ্ট্য; আল্লাহ তায়ালা ত নিরাকার। সুতরাং সেই অনুপাতেই এই সব শব্দের উদ্দেশ্য নির্দ্ধারিত আছে। অবশ্য উহা আমাদের জ্ঞানের ও অনুভূতির এবং ধারণার ও অনুমানের উর্দে, কিন্তু আমরা সেই উদ্দেশ্যের প্রতি পূর্ণ ঈমান রাখি।

১৯৩৯। হাদীছ :—আবু হোরায়ারা (রাঃ) বর্ণনা করিয়াছেন, আমি হযরত রসুলুল্লাহ ছাল্লাল্লাহু আলাইহে অসাল্লামকে এই বর্ণনা দিতে শুনিয়াছি যে, কেয়ামতের দিন আল্লাহ তায়ালা সমগ্র ভূমণ্ডলকে স্বীয় মুষ্ঠীতে লইবেন। আসমান সমূহকে স্বীয় ডান হাতে জড়াইবেন (—এইভাবে সমুদয় সৃষ্টির উপর স্বীয় সর্বাধিপত্য রূপায়িত করিয়া) অতঃপর আল্লাহ তায়ালা বলিবেন, আমার সর্বাধিপত্য বাস্তবায়িত রূপে চাকুস দেখিয়া নেও। ছনিয়াতে যাহারা ক্ষমতা ও আধিপত্যের দাবী করিত বা যাহাদিগকে ঐরূপ স্বীকার করা হইত তাহারা কোথায় ?

ব্যাখ্যা :—ছনিয়ার জিন্দেগীতে ক্ষমতা-মদে মত্ত এবং তাহাদের চেলাদিগকে কটাক্ষ করিয়া তাহাদের অগ্নায় অপরাধ ধরাইয়া দেওয়ার জগ্ন আল্লাহ তায়ালা এই ব্যবস্থা করিবেন।

আলোচ্য হাদীছে বর্ণিত তথ্যটি পবিত্র কোরআনেও উল্লেখ রহিয়াছে—

وَالْأَرْضُ جَمِيعًا قَبْضَتُهُ يَوْمَ الْقِيَامَةِ وَالسَّمَوَاتُ مَطْوِيَّاتٌ بِيَمِينِهِ
سُبْحَانَكَ وَنَعَالَىٰ عَمَّا يُشْرِكُونَ

“কেয়ামতের দিন সমগ্র ভূমণ্ডল আল্লাহ তায়ালায় মুঠে হইবে এবং আসমান সমূহ তাঁহার হাতে জড়ান থাকিবে (ইহা দ্বারা বাস্তবে রূপায়িত করিয়া দেখাইবেন—তাঁহার সমকক্ষ কেহ নাই, কেহ হইতে পারে না,) তিনি অদ্বিতীয়, পাক-পবিত্র এবং কাকের মোশরেকরা যত কিছুকেই তাঁহার শরীক ঠাওরাইতেছে তিনি সে সব হইতে অতি মহান, অতি উর্দে।” (ছুরা যুমার—২৪ পারা ৪ রুকু)

১৯৪০। হাদীছ :—আবু হোরায়রা (রাঃ) হইতে বর্ণিত আছে, হযরত নবী ছাল্লাল্লাহু আলাইহে অসাল্লাম বলিয়াছেন, ইশ্রাফিল ফেরেশতার দ্বিতীয় শিক্ষা-ফু'কের পর সর্ব প্রথম আমি সচেতন হইয়া মাথা উঠাইব এবং দেখিতে পাইব, মুছা (আঃ) সচেতন অবস্থায় আরশের পায়া ধরিয়া আছেন। ইহা আমি বলিতে পারি না, তিনি সচেতন অবস্থায় বহাল ছিলেন বা অচেতন হওয়ার পর (আমার পূর্বেই) সচেতন হইয়াছেন।

ব্যাখ্যা :—ইশ্রাফিল (আঃ) ফেরেশতার দুইবার শিক্ষা-ফু'কের উল্লেখ পবিত্র কোরআনেও রহিয়াছে—

وَنُفِخَ فِي الصُّورِ فَصَعِقَ مَنْ فِي السَّمَوَاتِ وَمَنْ فِي الْأَرْضِ إِلَّا مَنْ شَاءَ
اللَّهُ - ثُمَّ نُفِخَ فِيهِ أُخْرَىٰ فَإِذَا هُمْ فِيهَا مُبْطَرُونَ

“শিক্ষায় ফু'ক দেওয়া হইবে, ফলে আসমান-জমিনের সকলেই অচেতন হইয়া পড়িবে (—জীবিতগণ মরিয়া যাইবে এবং মৃতগণের রূহ চৈতন্যহীন থাকিবে ;) অবশ্য যাঁহাদের হুশ থাকিবে আলাহই ইচ্ছা করিবেন (তাঁহাদের হুশ বহাল থাকিবে।) তৎপর দ্বিতীয়বার সেই শিক্ষায় ফু'ক দেওয়া হইবে। তৎক্ষণাৎ সকলেই (জীবিত হইয়া) চৈতন্য অবস্থায় দাঁড়াইয়া যাইবে।” (২৪ পারা ৪ রুকু)

ঐ সময় যাঁহাদের হুশ থাকিবে তাঁহারা হইলেন মহান আরশের বাহক ফেরেশতাগণ। এতদ্বিন্ন মুছা (আঃ)ও ঐ শ্রেণীভুক্ত হইবেন কিনা—তাহাই আলোচ্য হাদীছে উল্লেখ হইয়াছে।

১৯৪১। হাদীছ :—আবু হোরায়রা (রাঃ) হযরত নবী ছাল্লাল্লাহু আলাইহে অসাল্লাম হইতে বর্ণনা করিয়াছেন, শিক্ষায় উভয় ফুৎকারের মধ্যে চল্লিশের ব্যবধান হইবে। লোকগণ-জিজ্ঞাসা করিল, হে আবু হোরায়রা ! চল্লিশ বৎসর ? তিনি বলিলেন, তাহা আমি শুনি নাই ; তাহারা বলিল, চল্লিশ মাস ? তিনি বলিলেন, তাহা আমি জানি না। তাহারা বলিল, চল্লিশ দিন ? তিনি বলিলেন, আমি তাহাও বলিতে পারি না।

তিনি আরও বলিলেন, মানব-দেহের সর্ববংশই বিনষ্ট হইয়া যাইবে। কিন্তু তাহার মেরুদণ্ডের সর্ব নিম্ন অস্থি খণ্ডটা অক্ষয় থাকিবে এবং উহা হইতেই তাহার দেহের পুনঃ নির্মান হইবে।

ব্যাখ্যা :—এই হাদীছে প্রকৃত প্রস্তাবেই চল্লিশের উদ্দেশ্য নির্দ্ধারিত ছিল না। তাই আবু হোরায়রা (রাঃ) এই হাদীছ বর্ণনা প্রসঙ্গে উহা নির্দ্ধারিত করিতে

অস্বীকার করিয়াছেন। অবশ্য অল্প এক হাদীছ মারফৎ উহা নির্দ্বারিত হয় যে, চল্লিশের উদ্দেশ্য চল্লিশ বৎসর। (ফৎহুল বারী—৮ × ৪৪৮)

১৯৯২। হাদীছঃ—আবুল্লাহ ইবনে মসউদ (রাঃ) বর্ণনা করিয়াছেন, একদা কাবা শরীফের নিকটবর্তী “ছক্ফিফ” ও “কোরায়েশ” উভয় গোত্রের তিনজন লোক একত্রিত হইল। তাহারা মেদবুল ছিল বটে, কিন্তু তাহাদের জ্ঞান ছিল অতি কম। তাহাদের একজন প্রশ্ন উত্থাপন করিল, আমাদের কথাবার্তা কি আল্লাহ তায়ালা শুনিয়া থাকেন? অপর একজন উত্তর করিল, সশব্দে কথা বলিলে তাহা শুনিয়া থাকেন, আর বিনা শব্দে বলিলে তাহা শুনেন না। তৃতীয় জন মন্তব্য করিল, যদি সশব্দে বলিলে শুনেন তবে নিঃশব্দে বলিলেও শুনিবেন। (অর্থাৎ কোন প্রকার কথাই শুনেন না।) তাহাদের এই শ্রেণীর আলোচনার প্রতি কটাক্ষ করিয়াই এই আয়াত নাযেল হইয়াছিল—

وَمَا كُنْتُمْ تَسْتَشِيرُونَ أَنْ يَشْهَدَ عَلَيْكُمْ سَمْعُكُمْ وَلَا أَبْصَارُكُمْ وَلَا جُلُودُكُمْ
وَلَكِنْ ظَنَنْتُمْ أَنَّ اللَّهَ لَا يَعْلَمُ كَثِيرًا مِمَّا تَعْمَلُونَ - وَذَلِكُمْ ظَنُّكُمُ
الَّذِي ظَنَنْتُمْ بِرَبِّكُمْ أَرَدْتُمْ أَنْ تُصَبِّحْتُمْ مِنَ الْخُسْرَىٰ -

“ছনিয়াতে পাপ করা কালে নিজ নিজ কান, চক্ষু, চর্ম ইত্যাদি অঙ্গ সমূহের সাক্ষী থাকা হইতে লুকাইবার ও বাঁচিবার শক্তি তোমাদের ছিল না। (কারণ কোন কাজ উহাদের অসাক্ষাতে করার উপায় নাই। আর আল্লাহ ত সর্ব শক্তিমান তিনি উহাদেরকে বাকশক্তি দান করিবেন। ফলে তোমাদের কার্যাবলীর সাক্ষী সংগ্রহ কোন কঠিন ব্যাপার নহে। এতদৃষ্টে পাপ হইতে বাঁচিয়া থাকাই তোমাদের জ্ঞান অবশ্য কর্তব্য ছিল,) কিন্তু মনে হয় তোমাদের ধারণা এই ছিল যে, তোমাদের কার্যাবলীর খোজ-খবর আল্লাহ তায়ালা নাই। (সুতরাং তিনি কোন কিছুকে সাক্ষী বানাইবেন কিরূপে?) এই ধারণাই তোমাদিগকে ধ্বংসের মুখে ঠেলিয়া দিয়াছে (যে, তোমরা বেপরওয়া ভাবে পাপ করিয়াছ। মানুষকে লজ্জা বা ভয় করিয়া পাপ করিবার সময় তাহাদের হইতে লুকাইয়াছ; কিন্তু আল্লাহ তায়ালা হইতে লুকাইতে পার না, তাঁহার সাক্ষীদের হইতে লুকাইতে পারিতেছ না; তাহা লক্ষ্য করতঃ আল্লাহকে লজ্জা ও ভয় করিয়া পাপ হইতে বিরত থাক নাই।) ফলে তোমরা ক্ষতিগ্রস্ত ও ধ্বংসপ্রাপ্ত হইয়াছ।” (২৪ পারা ১৭ রুকু)

ব্যাখ্যাঃ—এই আয়াতের পূর্ববর্তী আয়াতে অঙ্গ প্রত্যঙ্গের সাক্ষ্য দানের বিস্তারিত বিবরণ বর্ণিত আছে—

وَيَوْمَ يُحْشَرُ أَعْدَاءُ اللَّهِ إِلَى النَّارِ فَهُمْ يُوزَعُونَ - حَتَّىٰ إِذَا مَا جَاءُوهَا
شَهِدَ عَلَيْهِمْ سَمْعُهُمْ وَأَبْصَارُهُمْ وَجُلُودُهُمْ بِمَا كَانُوا يَعْمَلُونَ - وَقَالُوا
لِجُلُودِهِمْ لِمَ شَهِدْتُمْ عَلَيْنَا فَاَلَا نَذْكُرُ أَنَّ اللَّهَ الَّذِي أَنْزَلَ كُلَّ شَيْءٍ
وَهُوَ خَلَقَكُمْ أَوَّلَ مَرَّةٍ وَالْبَاطِلَ يُرْجَعُونَ -

“বিভীষিকাপূর্ণ অবস্থার দিক দিয়া একটি স্মরণীয় দিন—যে দিন আল্লাহ
দুশমনগণকে দোষখের পথে (হিসাব নিকাশের মাঠ—হাশর-ময়দানের দিকে)
হাঁকাইয়া আনা হইবে, সকলকে একত্রিত ও সমবেতভাবে চালিত করা হইবে।
যখন তাহারা তথায় পৌঁছিবে তখন তাহাদের কর্ণ, চক্ষু ও চৰ্ম্ম তাহাদের বিরুদ্ধে
তাহাদের কার্যাবলী সম্পর্কে সাক্ষ্য দিবে। তাহারা নিজেদের চৰ্ম্মকে সম্বোধন
করিয়া বলিবে, তোমরা আমার বিরুদ্ধে সাক্ষ্য দিলে কেন? তাহারা বলিবে,
আজ আল্লাহ আমাদিগকে বাকশক্তি দিয়াছেন। যিনি অত্যাচার বহু জিনিষকে
বাকশক্তি দিয়া ছিলেন এবং তিনি তোমাদিগকে প্রথমেও সৃষ্টি করিয়া ছিলেন এবং
পুনরায় তাহার প্রতি তোমাদিগকে আসিতে হইয়াছে।” (২৪ পারা ১৭ রুকু)

উল্লেখিত বিষয়টি ছুরা ইয়াছীনের মধ্যে এইরূপে বর্ণিত আছে—

الْيَوْمَ نَخْتِمُ عَلَىٰ أَصْوَابِهِمْ وَنُكَلِّمُنَا أَيْدِيَهُمْ فَوَشَّهْنَا أُرْجُلَهُمْ بِمَا
كَانُوا يَكْسِبُونَ -

“কেয়ামতের দিন আমি তাহাদের মুখের বাকশক্তি কিছু সময়ের জন্ত রহিত
করিয়া দিব এবং তাহাদের হাত আমার সম্মুখে কথা বলিবে, তাহাদের পা তাহাদের
কার্যাবলী সম্পর্কে সাক্ষ্য দান করিবে।” ১৮ পাতা—ছুরা নূর ৩ রুকুতে বর্ণিত আছে—

يَوْمَ نَشْهَدُ عَلَيْهِمْ أَسْمُهُمْ وَأَيْدِيهِمْ وَأُرْجُلُهُمْ بِمَا كَانُوا يَعْمَلُونَ - يَوْمَ نَدَّبَهُمُ اللَّهُ إِلَىٰ يَوْمِ الْحِسَابِ اللَّهُ الَّذِي يُعَلِّمُ الْوَحْيَ وَإِلَيْهِ يُرْجَعُ الْكُلُّ مَطْوً -

“যে দিন তাহাদের বিরুদ্ধে সাক্ষ্য দিবে তাহাদের মুখ, তাহাদের হাত, তাহাদের
পা—তাহাদের কার্য-কলাপ সম্পর্কে। ঐ দিন আল্লাহ তাহাদিগকে তাহাদের
প্রকৃত কর্মকল পূর্ণরূপে ভোগ করাইবেন এবং ঐ দিন সকলেই উপলব্ধি করিবে,
নিশ্চয় আল্লাহ সঠিক বিচারক এবং প্রতিটি বিষয়ের বাস্তবরূপ প্রকাশকারী।”

উল্লেখিত তিনটি আয়াতের সমষ্টি দ্বারা প্রমাণিত হইল যে, বদকার মানুষের বিরুদ্ধে তাহার হাত, পা, চোখ, কান, চামড়া সাক্ষ্য দিবে। এতদ্ভিন্ন এক হাদীছে বর্ণিত আছে—সর্ব প্রথম সাক্ষ্য হইবে বাম পার্শ্বের উরুর।

অঙ্গ-প্রত্যঙ্গের সাক্ষ্যদান সম্পর্কে মোছলেম শরীফের এক হাদীছে বর্ণিত আছে—কেয়ামতের দিন আল্লাহ তায়ালা (লোকদের হিসাব-নিকাশের ও ছওয়াল-জওয়াবের সময়) এক ব্যক্তিকে ডাকিবেন এবং তাহার প্রদত্ত নেয়ামত সমূহ স্বরণ ও স্বীকার করাইয়া প্রশ্ন করিবেন, তোর কি এরূপ আকিদা ও বিশ্বাস ছিল যে, মৃত্যুর পর পুনরায় জীবিত হইয়া হিসাবের জন্ত আমার সম্মুখে আসিতে হইবে? তখন সে বলিবে, না—আমার এরূপ আকিদা ছিল না। তখন আল্লাহ তায়ালা বলিবেন, *قد اذناك كما نسيتني* “যেমন তুই আমাকে ভুলিয়া রহিয়াছিলি, আমিও তোকে ভুলিয়া থাকিব (তোকে রহমত দান করিব না।) তারপর অল্প একজনকে ডাকিয়া আল্লাহ পাক এরূপ প্রশ্নই করিবেন; সেও এরূপ উত্তর দিবে। আল্লাহ পাক তাহাকেও এরূপ বলিবেন। তারপর তৃতীয় আর একজনকে ডাকিয়া এরূপ প্রশ্ন করিলে সে দাবী করিয়া বসিবে, হে আল্লাহ! আমি তোমার উপর, তোমার কিতাবের উপর, তোমার রসুলের উপর ঈমান আনিয়াছিলাম, ছদকা-খয়রাত করিয়াছিলাম—এরূপ ভাবে সে যতদূর পারে নেক আমলের দাবী করিবে। (অর্থাৎ তোমার নিকট হিসাবের জন্ত হাজির হইতে হইবে এই বিশ্বাস আমার ছিল, তাই আমি এই সব করিয়াছি।) কিন্তু প্রকৃত পক্ষে সে মোনাফেক, তাহার সব দাবী মিথ্যা। তখন আল্লাহ তায়ালা তাহাকে বলিবেন, আচ্ছা। তুমি দাঁড়াও, তোমার মিথ্যা দাবী-দাওয়ার বিরুদ্ধে সাক্ষ্য দেওয়াইতেছি। সে ভাবিতে থাকিবে যে, এখানে আমার বিরুদ্ধে কে সাক্ষ্য দিবে? এমন সময় তাহার বাকশক্তি বন্ধ করিয়া দেওয়া হইবে এবং তাহার অঙ্গ-প্রত্যঙ্গকে লুকুম করা হইবে, তোমরা সাক্ষ্য দাও। (আল্লাহ তায়ালা সব কিছু জানেন তাহা সত্ত্বেও এরূপ করা হইবে) যেন তাহার জন্ত ওজর-আপত্তির কোন পথ না থাকে (সম্পূর্ণরূপে দুষী সাব্যস্ত হইয়া মিথ্যাবাদী প্রমাণিত হয়)।

অঙ্গ-প্রত্যঙ্গের সাক্ষ্য দান প্রসঙ্গে মোছলেম শরীফের অল্প আর এক হাদীছে বর্ণিত আছে—কেয়ামতের দিন পাপী ব্যক্তিগণ এরূপ দাবীও করিবে যে, হে আল্লাহ! তুমিই বলিয়াছ—আমাদের উপর জুলুম করিবা না; কাজেই আমার বিরুদ্ধে অপরের সাক্ষ্য গ্রহণ যোগ্য হইতে দিব না। সে মনে করিবে এইরূপ হইলে আমি আমার বিরুদ্ধে সাক্ষ্য দিবই না এবং আমার গোনাহ খাতার সাক্ষীও পাওয়া যাইবে না।) তখন আল্লাহ তায়ালা বলিবেন—

كفى بنفسك اليوم عليك شهيداً وبالكرام الكائنين شهدوا

অর্থাৎ কেরামুন-কাতেবীন ফেরেশতাদের সাক্ষ্য ত আছেই ইহা ছাড়া আজ তোর সাক্ষ্যই যথেষ্ট হইবে। এই বলিয়া তাহার বাকশক্তি বন্ধ করিয়া দিয়া তাহার অঙ্গ-প্রত্যঙ্গকে সাক্ষ্য দিবার জন্ত হুকুম করা হইবে। অঙ্গ-প্রত্যঙ্গ পরিষ্কার ভাবে প্রত্যেকটি কাজের সাক্ষ্য দিবে। তারপর যখন পুনরায় তাহার বাকশক্তি খুলিয়া দেওয়া হইবে তখন সে ক্রোধান্বিত হইয়া নিজ অঙ্গ-প্রত্যঙ্গকে লক্ষ্য করিয়া বলিবে, তোরা ছাই-ভয় হইয়া যা ; তোদের মত নিমক-হারামদের জন্ত আমি ছুনিয়াতে কত ঝগড়া-বিবাদ করিয়া তোদেরকে রক্ষা করিয়াছিলাম, পরিপুষ্ট করিয়াছিলাম।

সাক্ষ্য গ্রহণের সময় তাহার বাকশক্তি বন্ধ করিয়া দেওয়া হইবে ; কারণ সাক্ষ্য দেওয়ার সময় যেন মিথ্যা প্রতিবাদ ও ঝগড়া-বিবাদ করার সুযোগ না থাকে। যেমন ছুনিয়াতে সাধারণতঃ হইয়া থাকে এবং আখেরাতেও কাফেরগণ প্রথমে ঐরূপ পন্থা অবলম্বন করিবে। যেমন এক হাদীছে বর্ণিত আছে, এক শ্রেণীর কাফের বা মোনাফেককে যখন ডাকিয়া হিসাব লওয়া হইবে তখন সে দাবী করিয়া বসিবে, আমি যে সকল গোনার কাজ করি নাই তাহাও ফেরেশতা আমার নামে লিখিয়া রাখিয়াছেন। তখন ঐ ফেরেশতা বলিবে, ওহে ! তুমি অমুক দিন অমুক জায়গায় এই গোনাহ করিয়াছিলে না ? সে বলিবে, আমি শপথ করিয়া বলিতেছি, কস্মিনকালেও এই গোনাহ আমি করি নাই। তখন তাহার বাকশক্তি বন্ধ করিয়া দেওয়া হইবে এবং তাহার অঙ্গ-প্রত্যঙ্গ সাক্ষ্য দিবে। (কহল মায়ানী)

১৯৪৩। হাদীছ :- আবদুল্লাহ ইবনে মনউদ (রাঃ) বর্ণনা করিয়াছেন, হযরত রসুলুল্লাহ ছালাল্লাহু আলাইহে অসাল্লাম মক্কাবানীগণকে দ্বীন-ইসলামের প্রতি আহ্বান জানাইলে তাহারা তাঁহার কথা অস্বীকার ও অমান্য করিয়াছিল। তখন হযরত (দঃ) তাহাদিগকে শাস্তি করার উদ্দেশ্যে তাহাদের জন্ত এই বদ-দোয়া

করিয়াছিলেন—**أَيُّهَا آلَ اللَّهِ أَعْنِي عَلَيْهِمْ بِسَبْعِ كَسْبِعِ يُوسُفَ** !

আমাকে তাহাদের মোকাবেলায় সাহায্য কর তাহাদিগকে সাত বৎসরের ছুভিক্ষে নিপতিত করিয়া—যেরূপ ছুভিক্ষে ইউসুফ নবীর যুগে হইয়াছিল।” ফলে তাহাদের উপর এমন ছুভিক্ষে আসিল যে, উহাতে সমুদয় চিহ্ন-বস্তু নিঃশেষ হইয়া গেল। তাহারা প্রাণ বাঁচাইবার জন্ত অস্থি, চর্ম, মৃতদেহ ইত্যাদি খাইতে লাগিল। ক্ষুধার তাড়নায় তাহারা চোখে ধূঁয়া দেখিতে লাগিল। পবিত্র কোরআনে ইহারই ভবিষ্যদ্বাণী করা হইয়াছিল—

فَأَرْتَقِبْ يَوْمَ تَأْتِي السَّمَاءُ بِدُحَانٍ مُّبِينٍ يَغْشَى النَّاسَ هَذَا ذَابُّ الْأَيْمِ

“আপনি অপেক্ষা করুন ঐ দিনের যে দিন উপরের দিকে তাহাদের নজরে ধুঁয়া দৃষ্ট হইবে, সেই ধুঁয়া (দেখার কারণ—ভীষণ ছুভিক্ষ) তাহাদের সকলকে ঘিরিয়া ধরিবে যাহা তাহাদের উপর এক কঠিন আজাব হইবে।” (২৫ পারা ১৪ রুকু)

দুর্ভিক্ষে পতিত মক্কাবাসীদের তৎকালীন সর্দার আবু সুফিয়ান হযরতের নিকট উপস্থিত হইয়া বলিল, হে মোহাম্মদ (দঃ)! আপনার বংশধর মক্কাবাসী মোজার গোত্রীয় লোকগণ ধ্বংসের সম্মুখীন। অতএব আপনি আল্লার নিকট বৃষ্টির জন্ম দোয়া করুন—আল্লাহ যেন বৃষ্টিবর্ষণ করিয়া ছুভিক্ষের আজাব দূরীভূত করিয়া দেন। হযরত (দঃ) বলিলেন, তুমি আমাকে মোজার বংশীয় লোকদের জন্ম দোয়া করিতে বল (যাহারা আল্লার দুশমন) ? তুমি ত বড়ই ছঃসাহসী! শেষ পর্যন্ত হযরত (দঃ) তাহাদের জন্ম দোয়া করিলেন। ফলে তাহাদের অঞ্চলে বৃষ্টিপাত হইল। এই সম্পর্কেও ভবিষ্যদ্বাণী ছিল—

إِنَّا كَاشِفُو الْعَذَابِ قَلِيلًا أَتَّكُم عَائِدُونَ -

“আমি আজাবকে তোমাদের হইতে কিছু দিনের জন্ম দূরীভূত করিয়া দিব, কিন্তু (আজাব দূরীভূত হওয়ার পর) নিশ্চয় তোমরা (তোমাদের দুষ্কৃতির প্রতী) পুনরায় ফিরিয়া আসিবে।”

অবস্থা তাহাই হইল। তাহারা যখন সুখ-স্বাচ্ছন্দ্যের সুযোগ পাইল পুনরায় খোদাদ্রোহিতার ময়দানে উন্মাদ হইয়া ছুটিল।

অতঃপর আল্লাহ তায়ালা তাহাদিগকে পুনঃ পাকড়াও করিলেন—প্রতিশোধ গ্রহণের পাকড়ানো, তাই উহা হইতে আর তাহারা রক্ষা পাইল না। পূর্বোন্নিখিত আয়াতের সঙ্গে এই বিষয়টিও উল্লেখ রহিয়াছে—

يَوْمَ نَبِطِشُ الْبَطِشَةَ الْكُبْرَى إِنَّا مُنْتَقِمُونَ

“যে দিন আমি তাহাদিগকে ভীষণ ভাবে পাকড়াও করিব, সে দিন অবশ্যই প্রতিশোধ গ্রহণ করিব।” এই পাকড়াও হইয়াছিল বদরের জেহাদের দিন। (সেই দিন তাহাদের বড় বড় সর্দারগণ নিহত হইয়া চির জাহান্নামী হইয়াছিল।)

১৯৪৪। হাদীছ :—আয়েশা (রাঃ) বর্ণনা করিয়াছেন, রসুলুল্লাহ ছাল্লাল্লাহু আলাইহে অসাল্লামকে আমি কখনও পূর্ণমুখ খুলিয়া হাসিতে দেখিনাই। তাঁহার অভ্যাস ছিল মুচকি হাসি দেওয়া। তাঁহার আরও একটি অভ্যাস ছিল যে, ঘনঘটা ও মেঘপুঞ্জ বা ঝড় দেখিলে তাঁহার চেহারা মোবারকের উপর মলিনতা আসিয়া যাইত।

একদা আয়েশা (রাঃ) বলিলেন, ইয়া রসূলুল্লাহ ! মেঘ দেখিলে মানুষ বৃষ্টির আশায় অনন্দিত হয়। আপনাকে দেখি—আপনি মেঘ দেখিলে চিন্তিত হইয়া পড়েন ! নবী (দঃ) বলিলেন, মেঘপূঞ্জে আজাবের আশঙ্কা হইতে আমি নিশ্চিত থাকিতে পারি না। পূর্ব যুগের এক জাতি আজাব বাহক মেঘপূঞ্জ দেখিয়া আনন্দে বলিয়াছিল, “এই ত মেঘমালা আসিতেছে আমাদিগকে বৃষ্টি বর্ষণ করিবে।”

ব্যাখ্যা :—ঘটনাটি আদ জাতির ; তাহারা দীর্ঘ দিন অনাবৃষ্টির দরুণ হুভিক্ষে ভুগিতেছিল। একদিন তাহারা তাহাদের বস্তির দিকে কাল মেঘপূঞ্জ আসিতে দেখিয়া আনন্দিত হইল এবং বলিতে লাগিল—“এই ত মেঘমালা আসিতেছে ; আমাদের উপর বৃষ্টি বর্ষণ করিবে”। বস্তুতঃ উহা দ্বারা প্রলয়ঙ্করী ঘূর্ণিবাত সৃষ্টি হইল এবং সাত রাত আটদিন পর্যন্ত ঝঞ্ঝা বহিয়া তাহাদের সম্পূর্ণরূপে ধ্বংস করিয়া দিল। পবিত্র কোরআন ২৭ পাঃ ৮ রুকুতে এই ঘটনা বর্ণিত হইয়াছে। বিস্তারিত বিবরণ চতুর্থ খণ্ড দ্রষ্টব্য। নবী (দঃ) এই ঘটনার প্রতিই ইঙ্গিত করিয়াছেন।

এক হাদীছে আছে—আয়েশা (রাঃ) বর্ণনা করিয়াছেন নবী (দঃ) আকাশে মেঘপূঞ্জের সঞ্চারণ দেখিলেই কাজ কর্ম ছাড়িয়া উহার প্রতি তাকাইতেন এবং এই দোয়া করিতেন—

اللَّهُمَّ إِنِّي أَعُوذُ بِكَ مِنْ شَرِّ مَا فِيهِ

ইহার মধ্যে যাহা কিছু অনিষ্ট আছে উহা হইতে তোমার আশ্রয় প্রার্থনা করি।

অতঃপর পর সেই মেঘপূঞ্জ দূরীভূত হইয়া গেলে আল্লাহ তায়ালার শোকর আদায় করিতেন। আর বৃষ্টি বর্ষণ আরম্ভ হইলে এই দোয়া পড়িতেন—

اللَّهُمَّ سُبْحَانَكَ يَا غِيَا

“হে আল্লাহ উপকারী বৃষ্টি দান করুন।” (মেশকাত শরীফ ১৩৩)

এতদ্ভিন্ন তৃতীয় খণ্ডে ১৫৮৫ নং হাদীছ খানাও এই বিষয়ে বর্ণিত হইয়াছে। উহাতে উল্লেখ আছে—মেঘপূঞ্জ দেখিলে নবীজী (দঃ) বিচলিত হইয়া উঠিতেন। এবং বৃষ্টি বর্ষিত হইলে তাঁহার বিচলন দূর হইত।

১৯৪৫। হাদীছ ৪—ইবনে আবী মোলায়কা (রাঃ) (আবুহুলাহ ইবনে যোরায়ের (রাঃ) হইতে) বর্ণনা করিয়াছেন, মোসলমানদের মধ্যে সর্বোত্তম ব্যক্তিদ্বয়—আবু বকর (রাঃ) ও ওমর (রাঃ) ভয়ঙ্কর ক্ষতির সম্মুখীন হইয়া পড়িয়াছিলেন তাঁহাদের কণ্ঠ-স্বর নবী ছালাল্লাহু আলাইহে অসাল্লামের সম্মুখে উচ্চ হইয়া যাওয়ার কারণে।

ঘটনা এই ছিল—একদা বনী-তামীম গোত্রের এক দল লোক হযরতের খেদমতে পৌঁছিল। তাহাদের অভিপ্রায়ে হযরত (দঃ) সেই গোত্রের জন্ত একজন প্রতিনিধি প্রেরণের সিদ্ধান্ত করিলেন। আবুবকর (রাঃ) কা'-কা'-ইবনে মা'বাদ (রাঃ) নামক

ছাহাবীর নাম প্রস্তাব করিলেন। ওমর (রাঃ) বলিলেন, না—বরং আক্‌রা-ইবনে হাবেস (রাঃ) নামক ছাহাবীকে প্রেরণ করা হউক। এতচ্ছুবণে আবুবকর (রাঃ) ওমর (রাঃ)কে কটাক্ষ করিয়া বলিলেন, আপনার ইচ্ছাই হইল আমার বিরোধিতা করা। ওমর (রাঃ) বলিলেন, আপনার বিরোধিতার প্রতি আমার মোটেও লক্ষ্য নাই। এইভাবে তাঁহাদের মধ্যে বিতর্ক বাঁধিল এবং (হযরতের সম্মুখেই) তাঁহাদের উভয়ের কণ্ঠ-স্বর উচ্চ হইয়া গেল। তৎক্ষণাৎ আল্লাহ তায়ালার তরফ হইতে এই আয়াত নাযেল হইল :—

يَا أَيُّهَا الَّذِينَ آمَنُوا لَا تَرْفَعُوا أَصْوَاتَكُمْ فَوْقَ صَوْتِ النَّبِيِّ وَلَا تَجْهَرُوا
لَهُ بِالْأَقْوَالِ كَجَهْرِ بَعْضِكُمْ لِبَعْضٍ أَن تَحْبَطَ أَعْمَالِكُمْ وَأَنتُمْ لَا تَشْعُرُونَ -
إِنَّ الَّذِينَ يَمْضُونَ أَصْوَاتَهُمْ عِنْدَ رَسُولِ اللَّهِ أُولَئِكَ الَّذِينَ امْتَحَنَ
اللَّهُ قُلُوبَهُمْ لِلتَّقْوَى - لَهُمْ مَغْفِرَةٌ وَأَجْرٌ عَظِيمٌ -

“হে মোমেনগণ! নবীর (সম্মুখে পরস্পর কথা-বার্তার মধ্যেও তাঁহার) আওয়াজ অপেক্ষা উচ্চ আওয়াজে কথা বলিতে পারিবে না। এবং নবীর সঙ্গে কথা বলিতে পরস্পর কথা বলার ছায় সম স্বরেও কথা বলিতে পারিবে না। (নবী ছাল্লাল্লাহু আলাইহে অসাল্লামের সঙ্গে এই সব আদব-তমীযের নিয়মাধীন না চলিলে) আশঙ্কা আছে—তোমাদের অলক্ষ্যে তোমাদের সারা জীবনের নেক আগল নষ্ট ও বরবাদ হইয়া যাইতে পারে। নিশ্চয় যাহারা আল্লাহর রসুলের সম্মুখে (এমন আদব-তমীযের প্রতি পূর্ণ লক্ষ্য রাখিয়া চলে, এমনকি তাহাদের কণ্ঠ-স্বর অত্যন্ত মোলায়েম ও সংযত রাখে, আল্লাহর রহমতে তাহাদের অন্তর খাঁচী তাকওয়া-পরহেজগারীতে পরিপূর্ণ। তাঁহাদের জ্ঞান মাগফেরাত ও অতি বড় প্রতিদান নির্দ্বারিত রহিয়াছে। (ছুরা হুজরাত—২৬ পারা ১৩ রুকু)।

এই ঘটনার ও এই আয়াত নাযেল হওয়ার পর বিশেষভাবে ওমর (রাঃ) রসুলুল্লাহ ছাল্লাল্লাহু আলাইহে অসাল্লামের সঙ্গে কথা বলিতে এত দূর সংযত ও ছোট আওয়াজে কথা বলিতেন যে, অনেক সময় পুনঃ না বলিলে তাঁহার কথা ধরা যাইত না।

১৯৪৬। হাদীছ :—আনাছ (রাঃ) বর্ণনা করিয়াছেন, একদা হযরত নবী ছাল্লাল্লাহু আলাইহে অসাল্লাম তাঁহার মজলিসে ছাবেত ইবনে ক্বায়স (রাঃ) নামক ছাহাবীকে খোঁজ করিয়া পাইলেন না। এক ব্যক্তি আরজ করিল, ইয়া রসুলুল্লাহ! আমি আপনার জ্ঞান তাহার সংবাদ নিয়া আসিব।

সেমতে ঐ ব্যক্তি ছাবেত ইবনে কায়সের নিকট আসিল এবং দেখিতে পাইল, তিনি ভীষণ অনুতপ্ত ও আতঙ্কগ্রস্তরূপে অবনত মস্তকে ঘরে বসিয়া আছেন ; ঘর হইতে বাহিরই হন না। ঐ ব্যক্তি তাঁহাকে জিজ্ঞাসা করিলেন, আপনার কি হইয়াছে ? তিনি বলিলেন, এই নরাধমের অবস্থা খুবই খারাপ। এই নরাধমের আওয়াজ নবী ছাল্লাল্লাহু আলাইহে অসাল্লামের আওয়াজ হইতে উচ্চ হইয়া থাকিত। (সৃষ্টিগতভাবে স্বাভাবিক রূপেই ঐ ছাহাবীর স্বর উচ্চ ছিল।) অতএব (পবিত্র কোরআনের আয়াত অনুসারে) এই নরাধমের সমুদয় আমল নষ্ট ও বরবাদ হইয়া গিয়াছে।

এতক্ষণে ঐ ব্যক্তি হযরত নবী ছাল্লাল্লাহু আলাইহে অসাল্লামের নিকট ফিরিয়া আসিয়া সেই ছাহাবীর সমুদয় উক্তি তাঁহার নিকট ব্যক্ত করিলেন। (হযরত (দঃ) তাহাকে পুনঃ ঐ ছাহাবীর নিকট পাঠাইলেন)। সেই ব্যক্তি দ্বিতীয়বার তাঁহার নিকট এক মহান সুসংবাদ বহন করিয়া আসেন—হযরত (দঃ) তাহাকে বলিলেন :—

أُذْهِبَ إِلَيْهِ ذَنْبُهُ لَمْ يَكُنْ لَكَ مِنَ أَهْلِ النَّارِ وَلَكِنَّكَ مِنْ أَهْلِ الْجَنَّةِ

“তুমি তাহার নিকট যাও এবং তাহাকে সুসংবাদ দাও—নিশ্চয় আপনি দোষখী হইবেন না, বরং আপনি হইবেন বেহেশতী।”*

* তথা কথিত মাওলানা আকরম খাঁর “মোস্তফা চরিত” দেখার দুর্ভাগ্য হইতে আল্লাহ তায়ালা বাঁচাইয়া ছিলেন এবং ঐ পবিত্র নামের অপবিত্র বই খানা পঁচা গুদামে পরিত্যক্ত হইয়া ছিল। ইদানিং দৈনিক পত্রিকা আজাদ মারফৎ উহার প্রচার আরম্ভ হইয়াছে।

উহার ভূমিকায়ই ইসলামের মূলে কুঠারাঘাতকারী জঘন্তম মিথ্যা ও ভুল উক্তি রহিয়াছে। তাহারই বাক্যে সেই কুখ্যাত উক্তিটা শুনুন—“সর্বাপেক্ষা প্রমাণ ছহি-বোখারী ও ছহি-মোছলেম হইতে কতকগুলি নমুনা উদ্ধৃত করিয়া দিতেছি। এই হাদীছ গুলির ছন্দ ছহীহ হওয়া সম্বন্ধে কোন তর্কই নাই—কারণ এগুলি বোখারী ও মোসলেমের হাদীছ। ঐ হাদীছ গুলি প্রকৃত ও সত্য হাদীছ বলিয়া কোন মতেই গৃহিত হইতে পারে না।”

কি জঘন্ত উক্তি! যে, বোখারী-মোছলেম শরীফেও এমন হাদীছ আছে যাহা সত্য বলিয়া গৃহিত হইতেই পারে না, অর্থাৎ ঐ হাদীছের মিথ্যা হওয়া অবধারিত।

পাঠকবর্গ! লক্ষ্য করুন কি পাগলামী! আকরম খাঁ সাহেব জীবিত থাকা কালে বক্ষমান গ্রন্থেই তাহার এই শ্রেণীর অনেক উক্তির সমালোচনাই আমরা করিয়াছি, এখন তিনি তাহার কর্মফল ভোগের জায়গায় পৌঁছিয়াছেন আমাদের সমালোচনার প্রয়োজন আর নাই। তবুও পাঠকদের ঈমান রক্ষার্থে তাহার পাগলামীটা ধরাইয়া দেওয়া আবশ্যিক।

বোখারী শরীফে মিথ্যা হাদীছ আছে বলিয়া আকরম খাঁ যে সব নমুনা পেশ করিয়াছেন উহার প্রথমটিই হইল আলোচ্য হাদীছটি। এই হাদীছটি সম্পর্কে তাহার কি নির্লজ্জ উক্তি যে—“এই হাদীছটি কখনই অভ্রান্ত সত্য বলিয়া গৃহিত হইতে পারে না। তাঁহার দাবী মিথ্যা প্রমাণ করার বিস্তারিত বিবরণ পঞ্চম খণ্ডের অবতরণিকায় বর্ণিত রহিয়াছে।

১৯৪৭। হাদীছ :—আনাছ (রাঃ) হইতে বর্ণিত আছে, হযরত নবী ছাল্লাল্লাহু আলাইহে অসাল্লাম বলিয়াছেন, (কেয়ামতের হিসাব-নিকাশান্তে অসংখ্য ও অগণিত) দোষথীকে দোষখে নিক্ষেপ করা হইবে, কিন্তু (তবুও দোষখ পরিপূর্ণ হইবে না এবং তাহার স্পৃহা কমিবে না।) সে বলিতে থাকিবে, আরও অধিক আছে কি ? এমনকি অবশেষে আল্লাহ তায়ালা তাহার উপর স্বীয় কুদরতের এমন প্রভাব প্রয়োগ করিবেন যাহাতে দোষখের গভীরতা এবং প্রশস্ততা সংকোচিত হইয়া যাইবে। তখন সে বলিবে, যথেষ্ট হইয়াছে—যথেষ্ট হইয়াছে।

ব্যাখ্যা :—পবিত্র কোরআনে জাহান্নামের গভীরতা ও প্রশস্ততার বিবরণে আল্লাহ তায়ালা বলিয়াছেন :—

يَوْمَ نَقُولُ لِجَهَنَّمَ هَلِ امْتَلَأْتِ وَتَقُولُ هَلْ مِنْ مَزِيدٍ -

“একটি স্মরণীয় দিন—যে দিন আমি জাহান্নামকে জিজ্ঞাসা করিব, তোমার পেট পূরিয়াছে কি ? সে বলিবে, আরও অধিক আছি কি ?” (ছুরা কাফ—২৬ পারা।)

উল্লেখিত হাদীছখানা উক্ত আয়াতের তাৎপর্যেই বর্ণিত হইয়াছে।

১৯৪৮। হাদীছ :—আবু হোরায়রা (রাঃ) হইতে বর্ণিত আছে, হযরত নবী ছাল্লাল্লাহু আলাইহে অসাল্লাম বলিয়াছেন, বেহেশত ও দোষখের মধ্যে বিতর্ক হইল— দোষখ বলিল, বড় বড় মানুষ যাহারা ফখর ও গর্বকারী তাহারা আমার ভাগে আসিবে। তখন বেহেশত আল্লাহ তায়ালা নিকট ফরিয়াদ করিল, হে পরওয়ার-রদেগার ! আমার ভাগে শুধু দুর্বল ও নিম্নস্তরের বিবেচিত লোকগণ কেন হইবে ? তত্বত্তরে আল্লাহ তায়ালা বেহেশতকে বলিয়াছেন, তুমি আমার রহমতের স্থান। তোমার দ্বারা আমি আমার বান্দাদেরকে রহমত দান করিব যাহাকে ইচ্ছা করিব। (আমার রহমতের ক্ষেত্রে কাহারও আত্মস্মৃতি ও গর্ব-ফখর কাজে আসিবে না, নম্রতার দ্বারাই উহা লাভ হইতে পারিবে।) আর দোষথকে বলিয়াছেন, তুমি আমার আজাব ও শাস্তিদানের স্থান ; তোমার দ্বারা আমি শাস্তি দান করিব যাহাকে ইচ্ছা করিব, (কাহারও প্রভাব প্রতিপত্তি উহা প্রতিরোধ করিতে পারিবে না।)

আল্লাহ তায়ালা তাহাদের উভয়কে ইহাও বলিয়াছেন, তোমাদের প্রত্যেককেই এই পরিমাণ অধিবাসী প্রদান করা হইবে যে, তোমরা পরিপূর্ণ হইয়া যাইবে। অবশ্য দোষখ পরিপূর্ণ না হওয়ার দরুণ আল্লাহ তায়ালা উহার উপর স্বীয় বিশেষ কুদরত প্রয়োগ করিবেন। যদ্বরূপ সে বলিতে বাধ্য হইবে যথেষ্ট হইয়াছে, যথেষ্ট হইয়াছে, যথেষ্ট হইয়াছে—বস্তুতঃ তখন দোষখের গভীরতা ও প্রশস্ততা কমিয়া গিয়া সে ভরিয়া যাইবে। (দোষখ পূর্ণ করিবার জন্ত কোন নূতন সৃষ্টির ব্যবস্থা করা হইবে না, কারণ) আল্লাহ তায়ালা কোন জীবকে বিনা অপরাধে দোষখে

ফেলিবেন না। পক্ষান্তরে বেহেশতকে পরিপূর্ণ করার জন্তু আল্লাহ তায়ালা নূতন মখলুক পয়দা করিবেন। (তাঁহারা বেহেশতবাসী মানুষের অধীনস্থ হইবেন।)

১৯৪৯। হাদীছ :- আল্লাহ তায়ালা যে, রসূলুল্লাহ ছালাল্লাহু আলাইহে অসাল্লামকে লক্ষ্য করিয়া বলিয়াছেন :-

نَا مِيرَ عَلَى مَا يَتَوَلَوْنَ وَسَبِّحْ بِحَمْدِ رَبِّكَ قَبْلَ طُلُوعِ الشَّمْسِ وَقَبْلَ
الْغُرُوبِ - وَمِنَ اللَّيْلِ فَسَبِّحْهُ وَأَدْبَارَ السُّجُودِ -

“আপনি বিরোধীদের ব্যঙ্গ-বিদ্‌ম্বপ, লাঞ্ছনা-ভৎসনার উপর ধৈর্যধারণ করিয়া চলুন এবং (তাহাদের ব্যথাদায়ক কথাবার্ত্তা ভুলিয়া থাকার সহায়করূপে আল্লার সঙ্গে সম্পর্কে দৃঢ় করার জন্তু) সকাল-বিকাল স্বীয় প্রভুর গুণগানে (—নামায ও জিক্র-আজ্কারে) মশগুল হউন, বিশেষরূপে রাত্রেও কিছু অংশে এবং প্রত্যেক নামাযের পরে প্রভুর তছবীহ—পবিত্রতার জিক্র করুন।” (ছুরা কাফ—২৬ পাঃ)

উক্ত আয়াতের শেষ বাক্যটি লক্ষ্য করিয়া ইবনে আব্বাস (রাঃ) বলেন, আল্লাহ তায়ালা হযরত (দঃ)কে প্রত্যেক নামাযের পরে তছবীহ পড়ার আদেশ করিয়াছেন।

১৯৫০। হাদীছ :- মসরুক (রঃ) বর্ণনা করিয়াছেন, আমি আয়েশা (রাঃ)কে জিজ্ঞাসা করিলাম, আম্মাজান! হযরত মোহাম্মদ (দঃ) কি তাঁহার প্রভু পরওয়ার-দেগারকে দেখিয়াছিলেন? আয়েশা (রাঃ) বলিলেন, তোমার কথায় আমার শরীর শিহরিয়া উঠিয়াছে। তুমি তিনটি বিষয় জ্ঞাত নও কি? যে তিনটি বিষয় ঘটয়াছে বলিয়া উক্তি করিলে তাহা মিথ্যা ও অবাস্তব হইবে। (১) যে বলিবে হযরত মোহাম্মদ (দঃ) তাঁহার প্রভু পরওয়ারদেগারকে দেখিয়াছেন তাহার কথা অবাস্তব। আয়েশা (রাঃ) তাঁহার এই উক্তির সমর্থনে কোরআন শরীফের আয়াত তেলাওয়াত করিলেন :-

لَا تَذَرِكُهُ الْآبْصَارُ وَهُوَ يُدْرِكُ الْآبْصَارَ

“কোন মানুষের দৃষ্টি আল্লাহ তায়ালাকে আয়ত্ত্ব করিতে পারে না, কিন্তু (সব কিছু, এমনকি) সকলের দৃষ্টিও তাঁহার আয়ত্ত্বে।” আরও একটি আয়াত তেলাওয়াত করিলেন :-

وَمَا كَانَ لِبَشَرٍ أَنْ يُكَلِّمَهُ اللَّهُ إِلَّا وَحْيًا أَوْ مِنْ وَرَاءِ حِجَابٍ -

“কোন মানুষের জন্তু (ইহজগতে) এই সুযোগ নাই যে, আল্লাহ তাহার সঙ্গে কলাম করেন তিন পন্থার কোন পন্থা ব্যতিরেকে—[ক] কাশফ ও এলহামরূপে

বাণী পৌঁছাইয়া। [খ] (মানবের দৃষ্টির) অন্তরাল হইতে। [গ] ফেরেশতা প্রেরণ করিয়া—যে ফেরেশতা বাণী পৌঁছাইয়া থাকেন।” * (ছুরা শূরা—২৫ পাঃ)

(২) আর যে ব্যক্তি বলিবে, হযরত মোহাম্মদ (দঃ) আগামী দিনের অগ্রিম খবর জানিতেন তাহার উক্তিও অবাস্তব। আয়েশা (রাঃ) তাঁহার এই দাবীর সমর্থনেও আয়াত তেলাওয়াত করিলেন—
وَمَا تَدْرِي نَفْسٌ مَّاذَا تَكْسِبُ إِذًا
“কোন মানুষ জানে না, সে আগামী কাল কি করিবে।

(৩) আর যে ব্যক্তি বলিবে যে, হযরত মোহাম্মদ (দঃ) (উম্মৎগণকে পৌঁছাইবার মত) কোন বস্তু গোপন রাখিয়া ছিলেন, তাহার উক্তিও মিথ্যা এবং অবাস্তব। আয়েশা (রাঃ) এই দাবীর সমর্থনেও এই আয়াত তেলাওয়াত করিলেন :—

يَا أَيُّهَا الرَّسُولُ بَلِّغْ مَا أُنزِلَ إِلَيْكَ - وَإِنْ لَمْ تَفْعَلْ فَمَا بَلَّغْتَ رِسَالَتَهُ

“হে রসুল (দঃ)! আপনার নিকট যত কিছু নাযেল ও অবতীর্ণ করা হইয়াছে সবটুকুই আপনি লোকদের নিকট পৌঁছাইয়া দিন; অথথাই আপনি আপনার রসুল হওয়ার পদের দায়িত্ব পালনকারী গণ্য হইবেন না।”

অতঃপর আয়েশা (রাঃ) হযরত (দঃ) কর্তৃক আল্লাহ তায়ালাকে দেখিবার প্রমাণ

রূপে কথিত পবিত্র কোরআন ছুরা নজমের আয়াত—
مَا كَذَّبَ الْفُؤَادُ مَا رَأَى
“হযরত (দঃ) যাহা দেখিয়াছিলেন তাহা দেখিবার সময় তাঁহার জ্ঞানশক্তি একটুও

বিভ্রান্ত হইয়াছিল না।” এবং
وَلَقَدْ رَآهُ نَزْلَةً أُخْرَى
“হযরত (দঃ) তাঁহাকে দ্বিতীয়বার দেখিয়াছিলেন ছিদরাতুল-মোন্তাহার নিকট।” এই ধরণের আয়াত সমূহের বিষয় বস্তুর প্রতি ইঙ্গিত করিয়া বলেন, উক্ত আয়াত সমূহে যাহাকে দেখিবার কথা উল্লেখ হইয়াছে তিনি ছিলেন ফেরেশতা জিব্রাইল (আঃ)। ফেরেশতা জিব্রাইল (আঃ) রসূলুল্লাহ ছাল্লাল্লাহু আলাইহে অসাল্লামের নিকট সর্বদা যাতায়াত করিলেও হযরত (দঃ) তাঁহাকে তাঁহার আসল আকৃতিতে শুধুমাত্র দুইবার দেখিয়াছিলেন। উহারই বর্ণনা ছুরা নজমের মধ্যে ব্যক্ত হইয়াছে।

ব্যাখ্যা :—মেরাজ উপলক্ষে হযরত (দঃ) আল্লাহ তায়ালা দর্শন লাভ করিয়াছিলেন কি—না সে সম্পর্কে ছাহাবীগণের মধ্যেই মতভেদ ছিল। আবদুল্লাহ ইবনে আব্বাস (রাঃ) এবং আরও কতিপয় ছাহাবীর মতে দর্শন লাভ করিয়াছিলেন; যেহেতু তাহা এই জগতের সীমার বাহিরের ঘটনা, তাই উহা সম্ভব হইয়াছিল।

* আয়েশা রাজিয়াল্লাহু আনহার উদ্দেশ্য এই যে, সামনা-সামনি দেখারূপে কথা বলা ও শুনা যেরূপ অসাধ্য যাহা উক্ত আয়াতের মর্ম তরুপ দেখা-সাক্ষাৎও অসাধ্য।

আয়েশা (রাঃ) এবং আরও কতিপয় ছাহাবীর মতে দর্শন লাভ করেন নাই। আবুল্লাহ ইবনে মসউদ রাজিয়াল্লাহু তায়ালা আনহুর মতও ইহাই ছিল। সেই জন্তই তিনিও ছুরা নজমের আয়াত সমূহ জিব্রাইল ফেরেশতাকে দেখা প্রসঙ্গে বলিয়া মত প্রকাশ করিয়াছেন।

১৯৫১। হাদীছ :—আবুল্লাহ ইবনে মসউদ (রাঃ) ছুরা নজমের আয়াতের ব্যাখ্যায় বলিয়াছেন, হযরত মোহাম্মদ (দঃ) জিব্রাইল ফেরেশতাকে তাঁহার আসল আকৃতিতে দেখিয়াছিলেন—তখন জিব্রাইল ফেরেশতা ছয় শত ডানা বিশিষ্ট ছিলেন।

১৯৫২। হাদীছ :—আবুল্লাহ ইবনে মসউদ (রাঃ) ছুরা নজমের এক আয়াতের ব্যাখ্যায় ইহাও বলিয়াছেন, হযরত নবী (দঃ) সম্মুখ দিকে আকাশের উর্দ্ধ কিনারায় সবুজ বর্ণের মখমল দেখিতে পাইয়া ছিলেন, যাহা এত বড় আকারের ছিল যে, আকাশের কিনারা পরিপূর্ণ করিয়া রাখিয়াছিল।

ব্যাখ্যা :—ঐ মখমল হযরত গালিচা-বিশিষ্ট ছিল যাহার উপর জিব্রাইল (আঃ) কুরছি বা আসনে উপবিষ্ট ছিলেন, কিম্বা জিব্রাইল আলাইহেছালামের গায়ের পোষাক ছিল ঐ মখমল বা তাঁহার ডানাগুলির সৌন্দর্য্য সবুজ মখমলের স্থায় ছিল।

১৯৫৩। হাদীছ :—আবুল্লাহ ইবনে কায়স (রাঃ) হইতে বর্ণিত আছে, হযরত রসূলুল্লাহ ছাল্লাল্লাহু আলাইহে অসাল্লাম বলিয়াছেন, (এক শ্রেণীর মোমেনের জন্ত বেহেশতের মধ্যে ফল-ফুলাদির আরাম-আয়েশ পূর্ণ মনোরম) দুই দুইটি বাগান থাকিবে। যাহার বাংলা, কুঠি ও পাত্র (ইত্যাদি ফাগিচার সমূহ এবং) সমুদয় জিনিষ রৌপ্যের তৈরী হইবে। অপর (এক শ্রেণীর মোমেনের জন্ত) দুই দুইটি বাগান থাকিবে যাহার পাত্র সমূহ এবং সমুদয় জিনিষ স্বর্ণের তৈরী হইবে। আর বেহেশতীগণ চিরস্থায়ী বেহেশতের মধ্যে তাঁহাদের প্রভু পরওয়ারদেগারের দীদার ও সাক্ষাৎ লাভ করিবেন—এমন পরিচ্ছন্ন পরিবেশে যে, প্রভু পরওয়ারদেগারের মহত্বের প্রভাবময় আভা ব্যতীত মধ্যস্থলে কোন প্রকার আবরণ থাকিবে না।

ব্যাখ্যা :—পবিত্র কোরআন ছুরা রহমানের মধ্যে উক্ত দুই শ্রেণীর বাগানের উল্লেখ রহিয়াছে..... **وَلِمَنْ خَافَ مَقَامَ رَبِّهِ جَنَّاتٍ** “যে ব্যক্তি স্বীয় প্রভু পরওয়ারদেগারের সম্মুখে হিসাবের জন্ত দণ্ডায়মান হওয়াকে ভয় করিয়া চলে তাহার জন্ত দুইটি বিশেষ বাগান প্রস্তুত রহিয়াছে।..... **وَمِنْ دُونِهِمَا جَنَّاتٍ** “উক্ত বাগানদ্বয় অপেক্ষা নিম্নস্তরের আরও দুইটি বাগান আছে.....”

উক্ত ছুরায় উল্লেখিত দুই শ্রেণীর বাগানের তুলনা মূলক তফসীল ও ব্যবধানও ব্যক্ত হইয়াছে। এতদ্ব্যতীত আলোচ্য হাদীছে আর একটি তফসীল এবং ব্যবধান

বণিত হইয়াছে যে, প্রথম শ্রেণীর বাগানের সমুদয় চিজ-বস্ত্র স্বর্ণ নিশ্চিত হইবে এবং দ্বিতীয় শ্রেণীর বাগানের সমুদয় চিজ-বস্ত্র রৌপ্য নিশ্চিত হইবে।

প্রথম শ্রেণীর বাগানগুলি হইবে বিশিষ্ট মোমেনদের জন্ম—তাঁহারা প্রত্যেকে উহার দুইটি করিয়া বাগান লাভ করিবেন। দ্বিতীয় শ্রেণীর বাগানগুলি হইবে সর্ব সাধারণ মোমেনদের জন্ম, তাঁহারা প্রত্যেকে উহার দুই দুইটি বাগান লাভ করিবেন।

১৯৫৪। হাদীছ :- আবহুল্লাহ ইবনে মসউদ (রাঃ) একদা বলিলেন, আল্লার লা'নৎ ও অভিশাপ ঐ সব নারীদের উপর যাহারা শরীরে চিত্র বা নাম ইত্যাদি খোদাই করিয়া অঙ্কিত করার প্রতি সমাজকে প্রলুব্ধ করে বা নিজ শরীরে উহা গ্রহণ করে এবং যাহারা ললাট বা কপালের উর্দ্ধাংশ মাথার চুল উপড়াইয়া কপাল প্রশস্ত করে বা ভ্রূর লোম উপড়াইয়া উহাকে সরু করে এবং যাহারা রেতি ইত্যাদির সাহায্যে দাঁত ঘর্ষণ ও ক্ষয় করিয়া দাঁতকে সরু করে এবং দাঁতের মধ্যে ফাঁক সৃষ্টি করে। এই শ্রেণীর নারীগণ রূপ-সজ্জার প্রবণতায় অঙ্গ-প্রত্যঙ্গের স্বাভাবিক সৌষ্ঠব ও গঠনের প্রাকৃতিক ও সৃষ্টিগত আকৃতি পরিবর্তন ও বিকৃত করিয়া ফেলে। (রূপ সজ্জার এই অবাঞ্ছিত চাক-চিক্যের সাহায্যে তাহারা নিশ্চয়ই বেগানাদের চোখে ফুটিয়া উঠিতে চায়, স্তবরাং তাহারা লা'নৎ ও অভিশাপের পাত্র।)

আবহুল্লাহ ইবনে মসউদ রাজিয়াল্লাহু আনহুর এই উক্তি শুনিতে পাইয়া উম্মে-ইয়াকূব নাম্নী এক মহিলা তাঁহার নিকট আসিলেন এবং বলিলেন, আমি শুনিয়াছি—আপনি এই ক্ষেত্রে লা'নৎ করিয়া থাকেন? তিনি বলিলেন, হযরত রসূলুল্লাহ (দঃ) যাহাকে লা'নৎ করিয়াছেন, আল্লার কেতাব কোরআনে যাহার প্রতি লা'নৎ করা হইয়াছে তাহার প্রতি আমি লা'নৎ করিব না কেন? এতচ্ছবণে মহিলাটি বলিল, আমি কোরআন শরীফ প্রথম হইতে শেষ পর্যন্ত পড়িয়াছি, কোথাও আমি এই শ্রেণীর লা'নৎ ও অভিশাপ পাই নাই। আবহুল্লাহ ইবনে মসউদ (রাঃ) তাঁহাকে বলিলেন, তুমি যদি লক্ষ্য করিয়া পড়িতে তবে নিশ্চয় (দেখিতে) পাইতে। তুমি কি এই আয়াত কোরআন শরীফে পড় নাই :-

وَمَا آتَاكُمُ الرَّسُولُ فَخُذُوهُ وَمَا نَهَاكُمْ عَنْهُ فَانْتَهُوا

“রসূল (দঃ) তোমাদিগকে যাহা আদেশ করেন তোমরা উহাকে মজবুতরূপে গ্রহণ ও অবলম্বন কর। আর যাহা হইতে নিষেধ করেন উহা হইতে বিরত থাক।”

মহিলা বলিলেন, এই আয়াত ত কোরআন শরীফে তেলাওয়াত করিয়াছি। আবহুল্লাহ ইবনে মসউদ (রাঃ) বলিলেন, এই আয়াতে রসূলের নিষেধাজ্ঞা হইতে বিরত থাকার আদেশ করা হইয়াছে। আর উল্লেখিত কার্য্যাবলীকে রসূল (দঃ) নিষেধ করিয়াছেন।

অতঃপর মহিলা বলিলেন, আপনার স্ত্রীও ত ঐ কাজ করিয়া থাকে ! আবছুল্লাহ ইবনে মসউদ (রাঃ) বলিলেন, এখনই তুমি আমার গৃহে যাও এবং ভালরূপে খুঁজিয়া দেখ। মহিলা তাহাই করিলেন, কিন্তু তাহার দাবীর সত্যতা তিনি দেখিতে পাইলেন না। তখন আবছুল্লাহ ইবনে মসউদ (রাঃ) বলিলেন, আমার স্ত্রী ঐরূপ কাজ করিলে কখনও আমার গৃহে তাহার ঠাই হইত না।

ব্যাখ্যা :—বিশিষ্ট ছাহাবীগণের অগ্ৰতম ছাহাবী আবছুল্লাহ ইবনে মসউদ (রাঃ) এস্থলে একটি অতিশয় গুরুত্বপূর্ণ বিষয় সুস্পষ্টরূপে প্রকাশ করিয়া দিয়াছেন যাহা বর্তমান যুগের একটি মারাত্মক ব্যাধির প্রতিষেধক। অধুনা অনেক কৃত্রিম মোসলেম নামধারীকে দেখা যায়, কোরআনের প্রতি ভক্তি ও শ্রদ্ধা ঠিকঠিক দেখাইয়া সূন্নাহকে অস্বীকার করিতে চায়। ঈমান ও ইসলামের মূল কর্তনকারী এই ব্যাধি সম্পর্কে ভবিষ্যৎবাণী ও কঠোর সতর্কবাণী দ্বয়ং হযরত রসুলুল্লাহ (দঃ)ও অনেক করিয়া গিয়াছেন। এস্থলে ছাহাবী আবছুল্লাহ ইবনে মসউদ (রাঃ) পবিত্র কোরআনের আয়াত দ্বারাই স্পষ্টরূপে প্রমাণিত করিয়া দেখাইয়া দিলেন যে, রসুলের আদেশ-নিষেধ তথা সূন্নার বরখেলাফকারী বস্তুতঃ কোরআনেরও বরখেলাফকারী।

এক্ষেত্রে আবছুল্লাহ ইবনে মসউদ (রাঃ) একটি অতি মূল্যবান আদর্শও দেখাইয়াছেন। অনেক লোককে দেখা যায় তাহারা অপরকে পরহেজগারীর নছিহত করিয়া থাকে, কিন্তু নিজের পরিবার-পরিজনকে পরহেজগার বানাইবার প্রতি আদৌ লক্ষ্য করে না। আবছুল্লাহ ইবনে মসউদ রাজিয়াল্লাহু তায়ালা আনহুর প্রতি ঐরূপ কটাক্ষ করা হইলে তৎক্ষণাৎ তিনি কটাক্ষকারিনীকে তাহার গৃহে যাওয়া তল্লাসী লওয়ার অনুমতি দিলেন। অধিকন্তু পরিষ্কার ভাষায় বলিয়া দিলেন—
 لَسَوْ كَذَبْتَ كَذَلِكَ مَا جَاءَ مَعَنَا
 লিপ্ত থাকিলে, আমার নিকট তাহার ঠাই হইত না।”

১৯৫৫। **হাদীছ :**—আবু হোরায়রা (রাঃ) হইতে বর্ণিত আছে, এক ব্যক্তিকে হযরত নবী ছাল্লাল্লাহু আলাইহে অসাল্লামের খেদমতে উপস্থিত হইল এবং সে অতিশয় ক্ষুধার্ত বলিয়া প্রকাশ করিল। তখন হযরত (দঃ) প্রথমতঃ নিজ গৃহে স্বীয় স্ত্রীগণের নিকট (তাহার জন্ত খাওয়া চাহিয়া) সংবাদ পাঠাইলেন। নবী-পত্নীগণ সকলেই উত্তর পাঠাইলেন, আমাদের নিকট একমাত্র পানি ভিন্ন কিছুই নাই। তখন হযরত (দঃ) আহ্বান জানাইলেন, কেহ আছে কি ! এই ব্যক্তিকে অল্প রাত্রে মেহমানরূপে গ্রহণ করিয়া লয় ? মদীনাবাসী এক ছাহাবী দাঁড়াইয়া বলিলেন, হাঁ—আমি প্রস্তুত আছি ইয়া রসুলুল্লাহ ! এই বলিয়া তিনি মেহমানকে সঙ্গে নিয়া বাড়ী ফিরিলেন এবং স্ত্রীকে বলিলেন, রসুলুল্লাহ ছাল্লাল্লাহু আলাইহে অসাল্লামের

মেহমান নিয়া আসিয়াছি। পুরাপুরীভাবে রসুলুল্লাহ মেহমানের খাতির-তাওয়াজু কর। মেহমানকে না দিয়া কোন বস্তু গৃহে জমা রাখিও না। স্ত্রী বলিল, গৃহে শুধুমাত্র ছেলে-মেয়েদের কিছু আহার রহিয়াছে। উহা ভিন্ন আর কিছুই নাই। তখন ঐ ছাহাবী স্ত্রীকে বলিলেন, ঐ খাণ্ডটুকুই মেহমানের জন্ত প্রস্তুত কর এবং ছেলে-মেয়েকে ঘুম পাড়াইয়া দাও। আর (আমাদের ছাড়া মেহমান খাণ্ড গ্রহণ করিতে চাহিবে না, কিন্তু খাণ্ড অল্প—আমরা খাইলে মেহমানের পেট ভরিবে না, তাই) খাওয়ার সময় বাতি নিভাইয়া দিও।

স্ত্রী তাহাই করিল—ছেলে-মেয়েদেরকে ঘুম পাড়াইয়া দিল এবং ঐ খাণ্ড মেহমানের জন্ত প্রস্তুত করিয়া বাতি জ্বালাইয়া দিল। অতঃপর গৃহস্বামী মেহমানকে লইয়া খাইতে বসিলেন, তখন স্ত্রী বাতির সলিতা ঠিক করার ভান করিয়া বাতি নিভাইয়া দিল এবং অন্ধকারের মধ্যে গৃহস্বামী ও তাহার স্ত্রী হাত নাড়াচাড়া করিয়া মেহমানকে এইরূপ বুঝাইলেন যে, তাঁহারাও তাহার সঙ্গে খাইতেছেন। বস্তুতঃ তাহারা কিছুই খান নাই। সব খাণ্ডটুকু মেহমানকে খাইবার সুযোগ দিয়াছেন। এই ভাবে গৃহস্বামী ও তাহার স্ত্রী উভয়ে অনাহারে রাত্রি যাপন করিলেন। ভোর বেলা ঐ ছাহাবী হযরতের খেদমতে উপস্থিত হইলে হযরত (দঃ) বলিলেন, অমুক স্বামী ও অমুক স্ত্রীর প্রতি আল্লাহ তায়ালা অত্যধিক সন্তুষ্ট হইয়াছেন এবং তাহাদের প্রশংসায় কোরআনের এই আয়াত নাযেল করিয়াছেন :—

وَيُؤْتِرُونَ عَلَىٰ أَنْفُسِهِمْ وَلَوْ كَانَ بِهِمْ خِرَافَةٌ - وَمِنْ يُوقِ
شَحْمَ نَفْسِهِ نَا وَلِذَلِكَ هُمُ الْمُفْلِحُونَ -

“তাহারা ক্ষুধার্ত হইয়াও নিজে না খাইয়া অপরকে খাওয়ায়; যে ব্যক্তি নিজের দেলকে বখিলী ও রূপণতা হইতে পবিত্র রাখিতে পারিয়াছে সে সফলকাম হইবেই।” (ছুরা হাশর—২৮ পারা)

১৯৫৬। হাদীছ :— যায়দ ইবনে আরকাম (রাঃ) বর্ণনা করিয়াছেন, কোন এক জেহাদ উপলক্ষে আমরা হযরত রসুলুল্লাহ ছাল্লাল্লাহু আলাইহে অসাল্লামের সঙ্গে মদীনার বাহিরে গেলাম। ঐ সময় লোকদের মধ্যে খাণ্ডের খুব অভাব পড়িল; সেই সুযোগে আবুত্বল্লাহ ইবনে উবাই মোনাফেক সর্দারকে (দুরভিসন্ধি মূলক ভাবে) এই প্রচারণা চালাইতে শুনলাম যে, সে মদীনাবাসী আনছারগণকে পরামর্শ দিয়া বলিতেছে, “তোমরা রসুলুল্লাহ সঙ্গী (—মোহাজের)-গণকে কোন প্রকার সাহায্য করিও না। তোমরা তাহাদের উপর কোন খাণ্ডদ্রব্য খরচ করিও না যেন তাহারা অশ্রুত চলিয়া যাইতে বাধ্য হয়।”

এতদ্ভিন্ন (এই সময় একজন মোহাজের এবং একজন আনছারী ছাহাবীর মধ্যে কিছুটা ঝগড়ার সৃষ্টি হইল * সেই সুযোগে মোনাফেক-প্রধান) আবছুল্লাহ ইবনে উবাইকে (মোহাজের ও আনছারদের মধ্যে ঘৃণা বিদেষ সৃষ্টির উস্কানী দান স্বরূপ) এই দস্তোক্তিও করিতে শুনিলাম—“এইবার মদীনায় ফিরিয়া যাইয়া সবল সংখ্যাগুরু তথা দেশবাসীগণ দুর্বল সংখ্যালঘু বিদেশীগণকে মদীনা হইতে তাড়াইয়া দিবে।”

যায়েদ ইবনে আরকাম (রাঃ) বলেন, আবছুল্লাহ ইবনে উবাই মোনাফেকের এই সব দুরভিসন্ধি মূলক কথাগুলি আমি আমার চাচার নিকট বলিলাম, আমার চাচা ঐগুলি নবী ছাল্লল্লোছ আলাইহে অসাল্লামের গোচরীভূত করিলেন। সেমতে নবী (দঃ) আমাকে ডাকিলেন, আমি হযরত (দঃ)কে সমুদয় ঘটনা খুলিয়া বলিলাম।

হযরত (দঃ) আবছুল্লাহ ইবনে উবাই এবং তাহার সাজ্জো-পাজ্জগণকে ডাকাইলেন। তাহারা হযরতের নিদট কসম করতঃ সম্পূর্ণ ঘটনা অস্বীকার করিল। (যেহেতু আমার সাক্ষী ছিল না। আর তাহারা কসম করিয়াছে, তাই আইনতঃ) আমি হযরতের নিকট মিথ্যাবাদী হইলাম এবং তাহারা সত্যবাদী গণ্য হইল। ইহাতে আমি এত অধিক চিস্তিত ও ব্যাথিত হইলাম যে, সারা জীবনে কখনও এইরূপ হই নাই। এমনকি, আমি বাহিরে চলা-ফেরা ছাড়িয়া দিয়া গৃহভ্যন্তরে বসিয়া গেলাম। আমার চাচা আমাকে মালামত করিয়া বলিলেন, এমন ঘটনায় কেন পতিত হইয়াছিলেন যদ্বরণ তুমি হযরতের নিকট মিথ্যাবাদী সাব্যস্ত হইয়াছ এবং তিনি অসন্তুষ্ট হইয়াছেন?

অল্প সময়ের মধ্যেই আল্লাহ তায়ালা মোনাফেকগণকে মিথ্যাবাদী ঘোষণা করিয়া এবং তাহাদের এই সব দুরভিসন্ধির এবং উস্কানীমূলক কথার স্পষ্ট বিবরণ দান করিয়া **إِنَّ جَاءَكَ مِنَ الْمُنَافِقِينَ**—পূর্ণ ছুরা “মোনাফেকুন” নাযেল করিলেন তৎক্ষণাৎ হযরত নবী (দঃ) আমাকে সংবাদ দিয়া আনিলেন এবং উক্ত ছুরা আমার সম্মুখে তেলাওয়াত করিয়া বলিলেন, হে যায়েদ! আল্লাহ তায়ালা তোমার সত্যবাদীতার সাক্ষ্য ও ঘোষণা দিয়াছেন।

১৯৫৭। হাদীছ :—জাবের (রাঃ) বর্ণনা করিয়াছেন, আমরা এক জেহাদের ছফরে ছিলাম। তখন এই ঘটনা ঘটিল—এক মোহাজের কোন ব্যাপারে উত্তেজিত হইয়া একজন আনছারী তথা মদীনাবাসী মোসলমানকে তাহার নিতম্বের উপর আঘাত করিল, ফলে আনছারী ব্যক্তি “হে আনছার ভাইগণ!” বলিয়া তাহার সাহায্যের জ্ঞপ্তি আহ্বান করিল। অপর দিকে মোহাজের ব্যক্তি “হে মোহাজেরগণ!” বলিয়া তাহার সাহায্যের প্রতি আহ্বান করিল এবং তাহা হযরত (দঃ)ও শুনিলেন।

* পরবর্তী হাদীছে সেই ঝগড়ার বিষয় উল্লেখ রহিয়াছে।

এইরূপে দলীয় ভিত্তিতে সাহায্যের প্রার্থী হইয়া মোসলমানদের মধ্যে বিভেদ সৃষ্টি করার প্রতি রসুলুল্লাহ (দঃ) অতিশয় ঘৃণা ভরে বলিলেন, জাহেলিয়ত বা অন্ধকার যুগের রীতি-নীতির ডাকা-ডাকি কেন? লোকগণ হযরতের নিকট ঘটনা ব্যক্ত করিল যে, এক মোহাজের এক আনছারীকে তাহার নিতম্বে আঘাত করিয়াছে। হযরত (দঃ) বলিলেন, এই ধরণের ডাকা-ডাকি পরিত্যাগ করা আবশ্যিক, ইহা বড়ই ঘণার বস্তু।

উক্ত ঝগড়ার ঘটনাটি আবহুল্লাহ ইবনে উবাই মোনাফেকেরও গোচরীভূত হইল (এবং ইহার দ্বারা মোসলমানদের মধ্যে বিভেদ সৃষ্টি করার পথ আবিষ্কারের উদ্দেশ্যে) সে বলিল, তাহাদের তথা মোহাজেরগণের এতই সাহস হইয়া গিয়াছে যে, তাহারা এই কাজ করিয়াছে? খোদার কসম—এইবার মদীনায় ফিরিয়া যাওয়ার পর সবল সংখ্যাগুরু (তথা মদীনাবাসীগণ) দুর্বল সংখ্যালঘু (তথা বিদেশী মোহাজের) গণকে তাড়াইয়া দিবে।

জাবের (রাঃ) বলেন, হযরত নবী ছালাল্লাহু আলাইহে অসাল্লামের মদীনায় আসার প্রথম দিকে মদীনাবাসী মোসলমানদের সংখ্যাই অনেক অধিক ছিল, অবশ্য পরে মোহাজেরগণেরও সংখ্যাধিক্য হইয়াছিল।

আবহুল্লাহ ইবনে উবাই মোনাফেকের এই উক্তি জ্ঞাত হইয়া ওমর (রাঃ) দাঁড়াইয়া বলিলেন, ইয়া রসুলুল্লাহ! আপনি আমাকে বাধা দিবেন না। আমি এই মোনাফেকের শিরচ্ছেদ করিয়া দেই। হযরত নবী (দঃ) বলিলেন, সহ্য করিয়া থাক; কেহ যেন এই কথা বলার সুযোগ না পায় যে, মোহাম্মদ (দঃ) তাহার দলভুক্তকেও মারিয়া ফেলে। (আবহুল্লাহ ইবনে উবাই “মোনাফেক” তথা প্রকাশ্যে মোসলমান ছিল। তাই হযরত (দঃ) তাহাকে মারিয়া ফেলার বিপক্ষে এই কথা বলিয়াছেন।)

ব্যাখ্যা :—উদ্বেষিত হাদীছদ্বয়ে বর্ণিত ঘটনার বিবরণ দান ও মোনাফেকদের অবস্থা বর্ণনায় ২৮ পারার ছুরা মোনাফেকুন নাবেল হইয়াছিল, যাহার তরজমা এই—

মোনাফেকরা আপনার সম্মুখে আসিলে বলে, আমরা শপথ করিয়া বলি এবং সাক্ষ্য দেই যে, আপনি নিশ্চয় আল্লার রসুল। আল্লাহ ত জানেনই, আপনি নিশ্চয় তাহার রসুল, কিন্তু আল্লাহ সাক্ষ্য ও ঘোষণা দিতেছেন, মোনাফেকরা মিথ্যাবাদী, (তাহারা প্রকৃত প্রস্তাবে ইহা বিশ্বাস ও স্বীকার করে না যে, আপনি রসুল।) তাহারা মিথ্যা কসমের আড়ালে থাকিয়া লোকদিগকে আল্লার পথ হইতে বিভ্রান্ত করে। তাহাদের এই কুকর্ম বড়ই জঘণ্য। এরূপ জঘণ্য কাজে তাহারা লিপ্ত রহিয়াছে এই কারণে যে, তাহারা মুখে ঈমান প্রকাশ করিয়া (অন্তরে সর্বদা কুফরী পোষণ করে এবং সুযোগ প্রাপ্তে) আবার মুখেও কুফরী প্রকাশ করে, ফলে তাহাদের দিলের উপর মোহর লাগিয়া গিয়াছে, সুতরাং তাহাদের আর সুবুদ্ধির উদয় হইবে না।

আপনি তাহাদিগকে দেখিলে তাহাদের দৈহিক আকার-আকৃতি আপনার দৃষ্টিতেও ভাল লাগিবে, তাহারা কথা বলিলে আপনিও তাহাদের কথা শুনিবেন। (তাহাদের বাহ্যিক আকৃতি এবং মিঠা মিঠা কথা খুবই ভাল দেখায়, কিন্তু বস্তুতঃ ইসলামের ভিতর তাহারা মোটেই ঢুকে নাই—) তাহাদের দৃষ্টান্ত এরূপ যেন কতগুলি থাম বা খুঁটি যাহার কোন অংশই মাটির ভিতরে ঢুকে নাই—কোন কিছুতে হেলান লাগান অসম্ভব দাঁড়াইয়া আছে। (এরূপ খুঁটিগুলি মোটা মোটা দেখাইলেও দাঁড়ানোর মধ্যে উহাদের কোনই শক্তি নাই, যে কোন মামুলী কারণে উহা পড়িয়া যায়। তদ্রূপ মোনাফেকদের বাহ্যিক অবস্থা ভাল দেখাইলে কি হইবে ঈমান ও ইসলামে স্থিতিশীলতার লেশ মাত্র তাহাদের নাই; যে কোন সুযোগে ইসলামদ্রোহী কথা ও ষড়যন্ত্রে তাহারা লিপ্ত হইয়া পড়ে। এই দুর্বলতার কারণে তাহারা সর্বদা আতঙ্কিত ও ভীত থাকে;) কোন শব্দ শুনিলে মনে করে তাহাদের বুঝি বিপদ আসিল! (তাই তখন মিথ্যা কথা ও মিথ্যা কসমের দ্বারা আত্মরক্ষার চেষ্টা করে।)

তাহারা (আপনার মিশনের) চিরশত্রু, তাহাদের হইতে আপনি সতর্ক থাকিবেন। আল্লাহ তাহাদেরকে ধ্বংস করুন; তাহাদের বুঝ কতই না উন্টা! যখন তাহাদিগকে বলা হয় আস—দিলে—মুখে ইসলাম ও ঈমানকে গ্রহণ করিয়া আস! আল্লার রসূল তোমাদের পূর্ব ক্রটির জন্ত আল্লার দরবারে ক্ষমা প্রার্থনা করিবেন তখন তাহারা মাথা নাড়াইয়া অবজ্ঞা প্রকাশ করে এবং দেখিবেন তাহারা আত্মসন্ত্রস্তিতা পূর্বক ষাড় ফিরাইয়া চলিয়া যাইতেছে। এমতাবস্থায় তাহাদের জন্ত আপনার ক্ষমা প্রার্থনা করা না করা সমান; আল্লাহ তায়ালা কস্মিনকালেও তাহাদেরে ক্ষমা করিবেন না। এরূপ নাফরমানদেরকে আল্লাহ হেদায়েতেরও তৌফিক দেন না!

ইহারাই বলিয়াছে, রসূলের দলে যাহারা আছে তাহাদের জন্ত এক পয়সাও খরচ করিও না; তবেই তাহারা দল ছাড়িয়া ছত্রভঙ্গ হইয়া যাইবে। স্মরণ রাখিও—আসমান জমিনের সমুদয় ভাণ্ডার আল্লার হাতে, কিন্তু মোনাফেকদের সেই বুঝ নাই।

ইহারাই বলিয়াছে, এইবারে মদীনায় পৌঁছিয়া শক্তিশালীগণ (তথা মদীনার অধিবাসী সংখ্যাগুরুগণ) দুর্বলগণকে (তথা সংখ্যালবু বিদেশী মোহাজিরদিগকে) মদীনা হইতে তাড়াইয়া দিবে। স্মরণ রাখিও—প্রকৃত প্রস্তাবে শক্তিশালী হইলেন আল্লাহ, আল্লার রসূল এবং মোমেন দল, কিন্তু মোনাফেকদের সেই জ্ঞান নাই।

হে মোমেনগণ! তোমাদের ধন-জন যেন তোমাদিগকে আল্লার ইয়াদ হইতে গাফেল—উদাসীন করিতে না পারে। যে ব্যক্তি এরূপ গাফেল হইবে তাহার জন্ত ধ্বংস অনিবার্য। আর তোমরা আমার প্রদত্ত ধন-সম্পদ হইতে আমার পথে ব্যয় কর ইহার পূর্বক যে, কাহারও মৃত্যু উপস্থিত হয়, আর তখন সে বলিতে থাকে, প্রভু হে!

আমাকে কিছু সময়ের সুযোগ দেন না কেন যেন আমি দান-খয়রাত করিতে পারি এবং নেককারদের দলভুক্ত হইতে পারি।

আল্লাহ কখনও অবকাশ দেন না কোন জীবকে তাহার আয়ুষ্কাল শেষ হওয়ার পর। আল্লাহ তোমাদের যাবতীয় কার্য-কলাপের খবর রাখেন।

১৯৫৮। হাদীছ :—আবু সায়ীদ (রাঃ) হইতে বর্ণিত আছে, তিনি হযরত রসূলুল্লাহ ছালাল্লাহু আলাইহে অসাল্লামের মুখে এই বিবরণ শুনিয়াছেন যে, কেয়ামতের দিন আমাদের প্রভু পরওয়ারদেগার “সাক” তথা তাঁহার এক বিশেষ ছিফত বিকশিত করিবেন। ইহার প্রভাবে সকল মোসলমান নারী-পুরুষ তাঁহার দরবারে সেজদাবনতঃ হইয়া পড়িবে। অবশ্য যাহারা ছুনিয়াতে রিযা তথা শুধু লোক-দেখান এবং শুধু প্রচার ও নাম-রটান উদ্দেশ্যে সেজদা করিয়া থাকিত (আর যাহারা কাকের ছিল—যাহারা খোদা ভিন্ন অত্কে সেজদা করিয়াছে) তাহারা ঐ সময় সেজদা করার সুযোগ হইতে বঞ্চিত থাকিবে। তাহারা সেজদার জগ্ প্রস্তুত হইবে বটে, কিন্তু তখন তাহাদের পিঠ ও কোমর আস্ত কাঠের গায় হইয়া যাইবে।

ব্যাখ্যা :—ছুরা কলম ২৯ পারায় আল্লাহ তায়ালা বলিয়াছেন :—

يَوْمَ يَكْشَفُ عَنْ سَاقٍ وَيَدْعُونَ إِلَى السُّجُودِ فَلَا يَسْتَجِيبُونَ - خَاشِعَةً
أَبْصَارَهُمْ تَرَاهُمْ زَلَّةً - وَقَدْ كَانُوا يَدْعُونَ إِلَى السُّجُودِ وَهُمْ سَلِيمُونَ -

“একটি স্মরণীয় দিন—যে দিন “সাক” বিকশিত হইবে। যাহার প্রভাবে সকল মানুষ সেজদার প্রতি ধাবমান হইবে। কিন্তু (আল্লাহ-ত্যাগী নাফরমান যাহারা) তাহারা সেজদা করিতে সক্ষম হইবে না। তাহাদের দৃষ্টি লজ্জাবনত থাকিবে, সব দিক দিয়াই অপমান ও লাঞ্ছনা তাহাদিগকে ঘিরিয়া ধরিবে। (ছুনিয়ার জিন্দেগীতে) তাহাদিগকে (এক আল্লার জগ্) সেজদা করার প্রতি কত ভাবে ডাকা হইত এবং তখন তাহাদের অঙ্গ সমূহ সম্পূর্ণ সুস্থ ছিল। (ইচ্ছা করিলেই সেজদা করিতে সক্ষম হইত, কিন্তু তখন তাহারা সেজদা করে নাই। তাই আজ তাহাদের ইচ্ছা হইবে, কিন্তু সেজদা করার শক্তি পাইবে না, পিঠ ও কোমর কাঠের গায় হইয়া থাকিবে।)

১৯৫৯। হাদীছ :—(ছুরা কলম ২৯ পারায় হযরত নূহ আলাইহেছালামের জাতির কুফরীর বিবরণ দান উপলক্ষে আল্লাহ তায়ালা তাহাদের কতিপয় দেব-দেবীর নাম উল্লেখ করিয়াছেন, যথা—) ওয়াদ্, সুয়া, ইয়াগুছ্, ইয়াউক্, নস্ৰ। এ সম্পর্কে আবুল্লাহ ইবনে আব্বাস (রাঃ) বর্ণনা করিয়াছেন, প্রকৃত প্রস্তাবে এই সব নাম নূহ আলাইহেছালামের জাতির বিশিষ্ট নেককার লোকদের নাম ছিল। তাঁহাদের মৃত্যুর পর শয়তান তাঁহাদের সমাজের লোকগণকে এই উস্কানী দিল যে, তাঁহাদের

স্মৃতি রক্ষার্থে তাঁহাদের খানকায় তাঁহাদের নামে তাঁহাদের আকৃতির স্মৃতিফলক প্রতিষ্ঠিত করা হউক। লোকগণ তাহাই করিল। তখন ঐ সব স্মৃতিফলকের কোন প্রকার পূজা-পাঠ করা হইত না, কিন্তু ঐ সব স্মৃতিফলক প্রতিষ্ঠাকারী—যাহারা উহার মূল তথ্য জ্ঞাত ছিল তাহাদের মৃত্যু হইলে পর পরবর্তী অজ্ঞ লোকগণ ঐ সব স্মৃতিফলকের পূজা আরম্ভ করিয়া দিল এবং উহা দেব-দেবীতে পরিণত হইয়া গেল। এমনকি অব্‌দুল্লাহ ইবনে আব্বাস (রাঃ) দেখাইয়া দেন যে, বর্তমান যুগেও আরবের বিভিন্ন গোত্রে ঐ সব দেব-দেবীর প্রচলন রহিয়াছে যথা—দৌমাতুল্-জন্দল নামক স্থানে কাব্ গোত্রে “ওয়াদ্”, হোজায়েল গোত্রে “সুয়া”, জুর্ফ নামক স্থানে মোরাদ গোত্রে “ইয়াগুছ্” হাম্দান গোত্রে “ইয়াউক্”, হিম্‌ইয়ার গোত্রে “নছ্‌র” নামীয় দেবতার প্রচলন এখনও রহিয়াছে।

● ৩০ পারা ছুরা “আবাহা” ১৩—১৬ আয়াত সমূহে আল্লাহ তায়ালা কোরআন শরীফের পবিত্রতা ও উচ্চ সম্মান সম্পর্কে বলিয়াছেন—“(এই কোরআন লৌহে মাহফুজের) অতি সম্মানিত, উচ্চ মর্যাদা সম্পন্ন পাক-পবিত্র পত্রসমূহে লিপিবদ্ধ ; অতি মহৎ ও মহান ফেরেশতা লিখকগণের হস্তে সুরক্ষিত।”

১৯৬০। হাদীছ :—আয়েশা (রাঃ) নবী ছাল্লাল্লাহু আলাইহে অসাল্লাম হইতে বর্ণনা করিয়াছেন—যে ব্যক্তি কোরআন পাঠ করে এবং সে কোরআনের সুসংরক্ষক ও সুদক্ষ ; কেয়ামতের দিন সে মহৎ ও মহান ফেরেশতা লিখকগণের তুল্য বিশেষ মর্যাদা লাভকারী হইবে।

আর যে ব্যক্তি কোরআন পাঠ করে এবং উহা তাহার পক্ষে কঠিন হওয়া সত্ত্বেও সে বার বার উহাকে আওড়াইতে থাকে তাহার জগ্ম দ্বিগুণ ছওয়াব নির্দারিত রহিয়াছে।

১৯৬১। হাদীছ :—জুন্‌ছব ইবনে ছুফিয়ান বর্ণনা করিয়াছেন, এক সময় হযরত রসূলুল্লাহ ছাল্লাল্লাহু আলাইহে অসাল্লাম অসুস্থতা বোধ করিলেন। তাই তিনি ছুই বা তিন রাত্র তাহাজ্জুদের জগ্ম উঠিলেন না। (তাহাজ্জুদের মধ্যে যে, তিনি সুদীর্ঘ কোরআন তেলাওয়াত করিয়া থাকিতেন এই ছুই-তিন রাত্র তাহাও শ্রুত হইল না।) এতদ্ভিন্ন এই ছুই তিন দিন ওহী-বাণী প্রচারিত হইয়া ছিল না। (নূতন কোন ওহী-বাণী প্রচারিত হইয়া ছিল না।) এই ঘটনাকে উপলক্ষ্য করিয়া হযরতের প্রতিবেশিনী একটি নারী হযরতের সম্মুখে আসিয়া বলিল, হে মোহাম্মদ ! আমার মনে হয়—তোমার নিকট যে ভূতটি আসিয়া থাকিত সে তোমাকে ছাড়িয়া দিয়াছে। ছুই-তিন রাত্র যাবৎ তোমার নিকট তাহার আগমনের কোন খোঁজ পাই না।

(এইরূপ কটুক্তি ও কটাক্ষ হযরতের মনে যেন আঘাত হানিতে না পারে,) তাই আল্লাহ তায়ালা স্নেহপূর্ণ ভাষায় এই ছুরাটি নাযেল করিলেন—

وَالصَّحَى وَاللَّيْلِ إِذَا سَجَى - مَا وَدَّعَكَ رَبُّكَ - وَمَا قَلَى

“দিনের আলো ও অন্ধকারাচ্ছন্ন রজনীর শপথ—আপনার প্রভু আপনাকে ভুলেন নাই, ছাড়েন নাই এবং আপনার প্রতি বিরাগী হন নাই……”

ব্যাখ্যা :—এই নাপাক কটুক্তিকারিণী নারীটি ছিল হযরত রসূলুল্লাহ ছালাল্লাহু আলাইহে অসাল্লামের প্রতি সর্বাধিক বিদ্বেষ পোষণকারিণী হযরতের যাতায়াত পথে কাঁটা নিক্ষেপকারিণী সর্ব পরিচিতা—আবু লাহাবের স্ত্রী উম্মে-জমীল। যাহার সম্পর্কে পবিত্র কোরআনের ঘোষণা রহিয়াছে যে, গলায় কাছি বাঁধিয়া তাহাকে ভয়ঙ্কর শিখায়ুক্ত দোষখের আগুনে নিক্ষেপ করা হইবে। এহেন খবিস ঐরূপ বলিবে তাহাতে আশ্চর্যের কিছু নাই।

কটাক্ষের উত্তরে আল্লাহ তায়ালা যে শপথ উল্লেখ করিয়াছেন তাহা অতি তাৎপর্যপূর্ণ। ওহী বাহক জিব্রাইলের আগমন দিবালোকের আগমন স্বরূপ এবং তাঁহার অনাগমন দিবালোকের অনাগমন তথা অন্ধকারাচ্ছন্ন রজনী স্বরূপ। অন্ধকারাচ্ছন্ন রজনী দৃষ্টে কেহ বলিতে পারে না, বিশ্ববাসী বিরাগভাজন হইয়া গিয়াছে, বরং দিবালোক ও অন্ধকারাচ্ছন্ন রজনী উভয়টিই মানুষের পক্ষে মঙ্গল জনক।

১১৬২। হাদীছ :—আনাছ (রাঃ) বর্ণনা করিয়াছেন, একদা নবী ছালাল্লাহু আলাইহে অসাল্লাম উবাই ইবনে কাআ'ব (রাঃ)কে বলিলেন, আল্লাহ আমাকে আদেশ করিয়াছেন, “লাম্‌ইয়াকুনিলাযীনা কাফারু” ছুরা তোমাকে পড়িয়া শুনাইবার জ্ঞ।

উবাই (রাঃ) জিজ্ঞাসা করিলেন, আল্লাহ তায়ালা কি আমার নাম উল্লেখ করিয়াছেন? নবী (দঃ) বলিলেন, হাঁ। উবাই (রাঃ) বলিলেন, আমি রব্বুল আলামীনের দরবারে আলোচিত হইয়াছি। এই বলিয়া তিনি (আনন্দে) কাঁদিয়া উঠিলেন।

ব্যাখ্যা :— নং হাদীছে বর্ণিত হইয়াছে, উবাই ইবনে কাআ'ব (রাঃ) ছাহাবীগণের মধ্যে পবিত্র কোরআনের বিশেষ সুদক্ষ ছিলেন। সম্মুখেও নং হাদীছে উল্লেখ হইবে চারজন ছাহাবী হইতে কোরআন শিক্ষা করার পরামর্শ নবী (দঃ) দিয়াছেন। তন্মধ্যে একজন উবাই ইবনে কাআ'ব (রাঃ)।

১১৬৩। হাদীছ :—পবিত্র কোরআনের আয়াত—**إِنَّا عَظَمْنَاكَ الْكَوْثَرَ**

আমি আপনাকে “কাওছার” দান করিয়াছি। এই “কাওছার” সম্পর্কে আবছল্লাহ ইবনে আব্বাস (রাঃ) বলিয়াছেন, উহার উদ্দেশ্য হইল সমুদয় (মঙ্গল ও কল্যাণ ইত্যাদির) সুসম্পদ-ভাণ্ডার যাহা আল্লাহ তায়ালা রসূলুল্লাহ (দঃ)কে দান করিয়াছেন।

আবহুরাহ ইবনে আব্বাস (রাঃ) হইতে এই বিবরণ বর্ণনাকারী সায়ীদ ইবনে জোবায়েরকে তাঁহার শাগেদ বলিল, সর্বসাধারণ তো বলিয়া থাকে কাওছার হইল একটি নহর বা হাওজের নাম যাহা বেহেশতের মধ্যে আছে। তিনি উত্তরে বলিলেন, ঐ হাওজটিও উক্ত সুসম্পদ-ভাণ্ডারের অন্তর্ভুক্ত যাহা আল্লাহ তায়ালা হযরত (দঃ)কে দান করিয়াছেন। (অর্থাৎ কাওছার বলিতে অনেক কিছু সম্পদই উদ্দেশ্যে ; সুপ্রসিদ্ধ হাওজে-কাওছার উহারই একটি।)

১৯৬৩। হাদীছ :- জিরর ইবনে আবী লুবাযহ (রাঃ) বর্ণনা করিয়াছেন, আমি বিশিষ্ট ছাহাবী উবাই ইবনে কাআ'ব (রাঃ)কে ছুরা কুল্ আউ'জু বে-রাব্বিন্নাহ ও ছুরা কুল্ আউ'জু বে-রাব্বিল্ ফালাক্ সম্পর্কে জিজ্ঞাসা করিলাম। তিনি বলিলেন, এই প্রশ্ন আমিও হযরত রসুলুল্লাহ (দঃ)কে কবিয়া ছিলাম। হযরত (দঃ) বলিয়াছেন, এই দুইটি ছুরার মধ্যে আমাকে শিক্ষা দেওয়া হইয়াছে, আমি যেন এই ভাবে আল্লাহ তায়ালায় আশ্রয় গ্রহণ করি—তাহা আমি করিয়াছি।

উবাই ইবনে কাআ'ব (রাঃ) বলেন, আমরাও হযরত রসুলুল্লাহ (দঃ) মারফৎ ঐ শিক্ষা লাভ করিয়া তাঁহারই ন্যায় আশ্রয় প্রার্থনা করিব।

ব্যাখ্যা :- এই হাদীছে একটি জটিল প্রশ্নের মীমাংসা হইয়াছে। অনেকে মনে করিয়া থাকে এই ছুরা দুইটির বিষয়-বস্তুর আরম্ভেই বলা হইয়াছে, “হে মোহাম্মদ (দঃ)! আপনি বলুন, আমি আশ্রয় গ্রহণ করিতেছি প্রভু পরওয়ারদে-গারের.....”, অতএব ইহা হযরতের ব্যক্তিগত সম্পর্কীয় বিষয়বস্তু, অতএব সঙ্গে ইহার সম্পর্ক কেন হইবে? অথচ কোরআন পাক ত সারা বিশ্ব মানবের জন্ত।

এই প্রশ্নের উত্তরই আলোচ্য হাদীছে দেওয়া হইয়াছে যে, এস্থলে আল্লাহ তায়ালা হযরত (দঃ)কে উপস্থিত লক্ষ্যস্থল স্বরূপ উল্লেখ করিয়া আশ্রয় প্রার্থনা শিক্ষা দিয়াছেন এবং হযরত (দঃ) সে অনুযায়ী আশ্রয় গ্রহণ করিয়াছেন। আমরাও তাঁহার শিক্ষায় শিক্ষা গ্রহণ করিয়া ঐরূপ আমল করিব। যেমন উপরস্থ ব্যক্তিকে লক্ষ্য করিয়া কোন আদেশ করা হয়, কিন্তু সেই আদেশ তাহার উপরই নিবন্ধ থাকে না, তাহার নিম্নস্থগণও উহার আওতাভুক্ত হইয়া থাকে। এই ধরণের ভুরি ভুরি নজির কোরআন শরীফে বিद्यমান রহিয়াছে।

কোরআন শরীফের অবতরণ ও সংরক্ষণ বৃত্তান্ত

১৯৬৫। হাদীছ :- আবু ওসমান (রাঃ) উছামা (রাঃ) হইতে বর্ণনা করিয়াছেন, একদা হযরত নবী ছাল্লাল্লাহু আলাইহে অসাল্লামের নিকট উম্মুল-মোমেনীন উম্মে-ছালামাহ (রাঃ) উপস্থিত ছিলেন এমতাবস্থায় জিব্রাইল (আঃ) ফেরেশতার আগমন